

欽定南史

卷六十八之七十四





南史卷六十八

唐 李 延 壽 撰

列傳第五十八

趙知禮 蔡景歷子微 宗元饒 韓子高 華陵 劉師知 謝岐 毛喜

沈君理 陸山才

趙知禮字齊旦天水隴西人也父孝穆梁侯官令知禮涉獵文史善書翰陳武帝之討元景仲也或薦之引為書記知禮為文贍速每占授軍書下筆便就率皆稱旨由是恆侍左右深被委任當時計畫莫不預焉武帝征侯景至白茅灣上表於梁元帝及與王僧辯論軍事其文並知禮所製及景平授中書侍郎封始平縣子陳受命位散騎常侍太府卿權知領軍事天嘉元年進爵為伯王琳平授吳州刺史知禮沉靜有謀謨每軍國大事文帝輒令璽書問之再遷右將軍領前軍卒贈侍中諡曰忠子元恭嗣

蔡景歷字茂世濟陽考城人也祖點梁尚書左戶侍郎父大同輕車岳陽王記室參軍景歷少俊爽有孝行家貧好學善尺牘工草隸為海陽令政有能名在侯景中與南康嗣王會理通謀匡復事泄被執賊黨王停保護之獲免因客游京口侯景平陳武帝鎮朱方素聞其名以書要之景歷對使人答書筆不停輟

文無所改帝得書甚加欽賞卽日授征北府中記室參軍仍領記室衡陽獻王昌爲吳興太守帝以鄉里  
父老尊卑有數恐昌年少接對乖禮乃遣景厯輔之承聖中還掌記室武帝將討王僧辯獨與侯安都等  
數人謀之景厯弗之知部分旣畢召令草檄景厯援筆立成辭義感激事皆稱旨及受禪遷祕書監中書  
通事舍人掌詔誥永定二年坐妻弟受周寶安餉馬爲御史中丞沈炯所劾降爲中書侍郎舍人如故三  
年武帝崩時外有強寇文帝鎮南皖朝無重臣宣后呼景厯及江大權杜稜定議祕不發喪疾召文帝景  
厯躬共宣者及內人密營斂服時旣暑熱須營梓宮恐斤斧之聲聞外乃以蠟爲祕器文詔依舊宣行文  
帝卽位復爲祕書監舍人如故以定策功封新豐縣子累遷散騎常侍文帝誅侯安都景厯勸成其事以  
功遷太子左衛率進爵爲侯常侍舍人如故坐妻兄劉裕依倚景厯權前後姦詭并受歐陽威餉絹百匹  
免官華皎反以景厯爲武勝將軍吳明徹軍司皎平明徹於軍中輒戮安成內史楊文通又受降人馬仗  
有不分明景厯又坐不能匡正被收久之獲宥宣帝卽位累遷通直散騎常侍中書通事舍人掌詔誥仍  
復封邑太建五年都督吳明徹北侵所向剋捷大破周梁士彥於呂梁方進圍彭城時宣帝銳意河南以  
爲指麾可定景厯稱師老將驕不宜過窮遠略帝惡其沮衆大怒猶以朝廷舊臣不加深罪出爲豫章內  
史未行爲飛章所劾以在省之日臧污狼籍帝令有司案問景厯但承其半於是御史中丞宗元饒奏免

景厯所居官徙居會稽及吳明徹敗帝追憲景厯前言卽日追還以爲征南鄱陽王諮議數日遷員外散騎常侍兼御史中丞復本爵封入守度支尙書舊式拜官在午後景厯拜日適逢輿駕幸玄武觀在位皆侍宴帝恐景厯不預特令早拜其見重如此卒官贈太常卿諡曰敬十三年改葬重贈中領軍禎明元年配享武帝廟庭二年車駕親幸其宅重贈景厯侍中中撫軍將軍諡曰忠敬給鼓吹一部於墓所立碑景厯屬文不尙雕靡而長於敘事應機敏速爲當時所稱有文集三十卷子徵嗣江大樞字伯謀濟陽考城人位少府封四會縣伯太建二年卒於通直散騎常侍

徵字希祥幼聰敏精識強記年六歲詣梁吏部尙書河南褚翔嗟其穎悟七歲丁母憂居喪如成人禮繼母劉氏性悍忌視之不以道徵供侍益謹初無怨色徵本名覽景厯以其有王祥之性更名字焉陳武帝爲南徐州召補迎主簿尋授太學博士太建中累遷太子中舍人兼東宮領直襲封新豐侯至德中位太子中庶子中書舍人掌詔誥尋授左戶尙書與僕射江總知撰五禮事後主器其才幹任寄日重遷吏部尙書每十日一往東宮於皇太子前論述古今得失及當時政務又敕以廷尉寺獄事無大小取徵議決俄敕遣徵收募兵士自爲部曲徵善撫卹得物情旬月之間衆近一萬位望旣重兼聲位熏灼物議咸忌憚之尋徙中書令中書清簡無事或云徵有怨言後主聞之大怒收奪人馬將誅之左右致諫獲免禎明

二年隋軍濟江後主以徵有幹用令權知中領軍事徵日夜勤苦備盡心力後主嘉焉謂曰事寧有以相報及決戰於鍾山南岡敕徵守宮城西北大營尋令督衆軍戰事陳亡隨例入長安徵美容儀有口辯多所詳究至於士流官宦陳宗戚屬及當朝制度憲章儀軌戶口風俗山川土地問無不對然性頗便佞進取不能以退素自業初拜吏部尙書啟後主借鼓吹後主謂所司曰鼓吹軍樂有功乃授蔡徵不自量揆索我朝章然其父景歷既有締構之功宜且如啟拜訖卽追還徵不修廉隅皆此類也隋文帝聞其敏贖召見顧問言輒會旨然累年不調久之除太常丞歷尙書戶部儀曹郎轉給事郎卒子翼位司徒屬入隋爲東宮學士

宗元饒南郡江陵人也少好學以孝聞士梁爲征南府外兵參軍及司徒王僧辯幕府初建元饒與沛國劉師知同爲主簿陳武帝受禪稍遷廷尉卿尙書左丞宣帝初軍國務廣事無巨細一以貫之臺省號爲稱職遷御史中丞知五禮事時合州刺史陳襲賊汚狼籍遣使就渚斂魚又令人於六郡乞米百姓甚苦之元饒劾奏免之吳興太守武陵王伯禮豫章內史南康嗣王方泰等驕蹇放橫元饒案奏皆見削黜元饒性公平善持法諳曉故事明練政體吏有犯法政不便時及於名教不足者隨事糾正多所裨益遷南康內史以秩米三千餘斛助人租課存問高年拯救乏絕百姓甚賴焉以課最入朝詔加散騎常侍後爲

吏部尙書卒

韓子高會稽山陰人也家本微賤侯景之亂寓都下景平陳文帝出守吳興子高年十六爲總角容貌美麗狀似婦人於淮渚附部伍寄載欲還鄉里文帝見而問曰能事我乎子高許諾子高本名鸞子帝改名之性恭謹恆執備身刀及傳酒炙帝性急子高恆會意旨稍長習騎射頗有膽決願爲將帥及平杜龔配以士卒文帝甚愛之未嘗離左右帝嘗夢騎馬登山路危欲墮子高推捧而升文帝之討張彪也沈泰等先降帝據有州城周文育鎮北郭香巖寺張彪自剡縣夜還襲城文帝自北門出倉卒闔夕軍人擾亂唯子高在側文帝乃遣子高自亂兵中往見文育反命酬答於闔中又往慰勞衆軍文帝散兵稍集子高引入文育營因共立柵明日敗彪彪奔松山浙東平文帝乃分麾下多配子高子高亦輕財禮士歸之者甚衆文帝嗣位除右軍將軍封文招縣子及王琳平子高所統益多將士依附之其有所論進帝皆任使焉天嘉六年爲右衛將軍文帝不豫入侍醫藥廢帝卽位加散騎常侍宣帝入輔子高兵權過重深不自安好參訪臺閣又求出爲衡廣諸鎮光大元年八月前上虞縣令陸昉及子高軍主告其謀反宣帝在尙書省因召文武在位議立皇太子子高預焉執送廷尉其夕與到仲舉同賜死父延慶及子弟並原有

華陵晉陵旣陽人也世爲小吏皎梁代爲尙書比部令史侯景之亂事景之黨王偉陳武帝南下文帝爲



景所囚陵遇文帝甚厚及景平文帝爲吳興太守以陵爲都錄事深見委任及文帝平杜龕仍配以甲兵御下分明善於撫接解衣推食多少必均天嘉元年封懷仁縣伯王琳東下陵隨侯瑱拒之琳平知江州事後隨都督吳明徹征周迪迪平以功進爵爲侯仍授都督湘州刺史陵起自下吏善營產業又征川洞多致銅鼓及生口並送都下廢帝卽位改封重安縣公韓子高誅後陵內不自安光大元年密啟求廣州以觀時主意宣帝僞許之而詔書未出陵亦遣使引周兵又崇奉梁明帝士馬甚盛詔乃以吳明徹爲湘州刺史實欲以輕兵襲之慮陵先發乃前遣明徹率衆三萬乘金翅直趣郢州又遣撫軍大將軍滄于量率衆五萬乘大艦繼之時梁明帝遣水軍爲陵聲援周武帝遣衛公宇文直頓魯山又遣桂國長湖公元定攻圍郢州梁明帝授陵司空巴州刺史戴僧朔衡陽內史任蠻奴巴陵內史潘智虔岳陽太守章昭裕桂陽太守曹宣湘東太守錢明並隸於陵又長沙太守曹慶等本隸陵下因爲之用帝恐上流宰守並爲陵扇惑乃下詔赦湘巴二州其賊主帥節將並許開恩出首陵以大艦載薪因風放火俄而風轉自焚陵大敗乃與戴僧朔奔江陵元定等無復船度步趣巴陵巴陵城已爲陳軍所據乃降送于建鄴陵遂終於江陵其黨並誅唯任蠻奴章昭裕曹宣劉廣業獲免

劉師知沛國相人也家本素族祖奚之齊淮南太守以善政聞父景彥梁司農卿師知本名師智以與敬

帝諱同改爲好學有當務才博涉書傳工文筆善儀體臺閣故事多所詳悉紹泰初陳武帝入輔以師知爲中書舍人掌詔誥時兵亂後朝儀多闕武帝爲丞相及加九錫并受禪其儀注多師知所定梁敬帝在內殿師知常侍左右及將加害師知詐帝令出帝覺遽牀走曰師知賣我陳霸先反我本不須作天子何意見殺師知執帝衣行事者加刃焉旣而報陳武帝曰事已了武帝曰卿乃忠於我後莫復爾師知不對武帝受命仍兼舍人性疎簡與物多忤雖位宦不遷而任遇甚重其所獻替皆有弘益及武帝崩六日成服時朝臣共議大行皇帝靈坐俠御人衣服吉凶之制博士沈文阿議宜服吉師知議云旣稱成服本備喪禮案梁昭明太子薨成服俠侍之官悉著衰斬唯著鎧不異此卽可擬愚謂六日成服俠靈坐須服衰經中書舍人蔡景歷江德藻謝岐等同師知議時以二議不同乃敢取左丞徐陵決斷陵云案山陵鹵簿吉部伍中公卿以下導引者爰及武賁鼓吹執蓋奉車並是吉服豈容俠御獨爲衰經若言公卿胥吏並服衰經此與梓宮部伍有何差別若言文物並吉司事者凶豈容衽經而奉華蓋衰衣而升玉路邪同博士議謝岐議曰靈筵祔宗廟梓宮還山陵實如左丞議但山陵鹵簿備有吉凶從靈輿者儀服無變從梓宮者皆服苴衰爰至士禮悉同此制此自是山陵之儀非關成服今謂梓宮靈辰共在西階稱爲成服亦無鹵簿直是爰自胥吏上至王公四海之內必備衰經案梁昭明太子薨略是成例豈容凡百士庶悉此

日服重而侍中至於武衛最是近官反鳴玉紆青與平吉不異左丞既推以山陵事愚意或謂與成服有殊陵重答云老病屬續不能多說古人爭議多成愆府傳玄見尤於晉代王商取陷於漢朝謹自三臧敬同高命若萬一不死猶得屏言庶與羣賢更申揚權文阿猶執所見衆議不能決乃具錄二議奏聞上從師知議遷鴻臚卿舍人如故天嘉元年坐事免尋起爲中書舍人復掌詔誥天康元年文帝不豫師知與尙書僕射到仲舉等入侍醫藥帝崩豫顧命宣帝入輔師知與仲舉等遣舍人殷不佞矯詔令宣帝還府事覺於北獄賜死初文帝敕師知撰起居注自永定二年秋至天嘉元年爲十卷

謝岐會稽山陰人也父達梁太學博士岐少機警好學仕梁爲山陰令侯景亂流寓東陽景平依于張彪彪在吳郡及會稽庶事委之彪每征討恆留岐監郡知後事彪敗陳武帝引參機密爲兼尙書右丞時軍旅屢興糧儲多闕岐所在幹理深被知遇永定元年爲給事黃門侍郎中書舍人兼右丞如故天嘉二年卒贈通直散騎常侍弟嶠篤學爲通儒

毛喜字伯武滎陽武人也祖稱梁散騎侍郎父栖忠中樞司馬喜少好學善草隸陳武帝素知之及鎮京口命喜與宣帝往江陵仍敕宣帝諮稟之及梁元帝卽位以宣帝爲領直喜爲尙書功論侍郎及魏平江陵喜與宣帝俱遷長安文帝卽位喜自周還進和好之策陳朝乃遣周弘正等通聘及宣帝反國又遣



喜入周以家屬爲請周冢宰宇文護執喜手曰能結二國之好者卿也仍迎柳皇后及後主還天嘉三年至都宣帝時爲驃騎將軍仍以喜爲府諮議參軍領中記室府朝文翰皆喜詞也文帝嘗謂宣帝曰我諸子皆以伯爲名汝諸子宜用叔爲稱宣帝以訪喜喜卽條自古名賢杜叔英虞叔卿等二十餘人以啟之文帝稱善文帝崩廢帝沖昧宣帝錄尙書輔政僕射到仲舉等矯太后令遣宣帝還東府當時疑懼無敢曆言喜卽馳入謂宣帝曰今日之言必非太后之意宗社至重願加三思竟如其策右衛將軍韓子高始與仲舉通謀其事未發喜謂宣帝曰宜簡人馬配與子高并賜鐵炭使修器甲宣帝曰子高卽欲收執何更如是喜曰山陵始畢邊寇尙多而子高受委前朝名爲杖順宜推心安誘使不自疑圖之一壯士之力耳宣帝卒行其計及帝卽位除給事黃門侍郎兼中書舍人典軍國機密宣帝議北侵敕喜撰軍制十三條詔頒天下文多不載論定策功封東昌縣侯以太子右衛率右將軍行江夏武陵桂陽三王府國事母憂去職詔封喜母庾氏東昌國太夫人遣員外散騎常侍杜緬圖其墓田上親與緬案圖指畫其見重如此歷位御史中丞五兵尙書參掌選事及得淮南之地喜陳安邊之術宣帝納之卽日施行帝又欲進兵彭汴以問喜喜以爲淮左新平邊人未輯周氏始吞齊國難與爭鋒未若安人保境斯久長之術也上不從吳明徹卒俘于周喜後歷丹陽尹吏部尙書及宣帝崩叔陵構逆敕中庶子陸瓊宣旨令南北諸軍皆

取喜處分賊平加侍中初宣帝委政於喜喜數有諫爭事並見從自明徹敗後帝深悔不用其言謂袁憲曰一不用喜計遂令至此由是益見親重喜乃言無回避時皇太子好酒德每共親幸人爲長夜之宴喜嘗言之宣帝太子遂銜之卽位後稍見疎遠及被始興王傷創愈置酒引江總以下展樂賦詩醉酣而命喜于時山陵初畢未及踰年喜見之不懌欲諫而後主已醉喜言心疾仆于階下移出省中後主醒乃謂江總曰我悔召毛喜知其無病但欲阻我懽宴非我所爲耳乃與司馬申謀曰此人負氣吾欲將乞鄱陽兄弟聽其報讎可乎對曰終不爲官用願如聖旨傳緯爭之曰若許報讎欲置先皇何地後主曰當與一小郡勿令見人事耳至德元年授永嘉內史喜至郡不受奉秩政弘清靜人吏安之遇豐州刺史章大寶舉兵反郡與豐州接而素無備喜乃修城隍器械又遣兵援建安賊平授南安內史禎明元年徵爲光祿大夫領左驍騎將軍道卒有集十卷子處沖嗣

沈君理字仲倫吳興人也祖僧旻梁左戶尙書父巡元帝時位少府卿魏平荊州梁宣帝署金紫光祿大夫君理美風儀博涉有識鑒陳武帝鎮南徐州巡遣君理致謁深見器重命尙會稽長公主及帝受禪拜駙馬都尉封永安亭侯爲吳郡太守時兵革未寧百姓荒弊君理總集士卒修飾器械深以幹理見稱文帝嗣位累遷左戶尙書天嘉六年爲東陽太守天康元年以父憂去職自請往荊州迎柩朝議以在位重

臣謹令出境乃遣長兄君嚴往焉及還將葬詔贈巡侍中領軍將軍諡曰敬子太建中歷位太子詹事吏部尚書宣帝以君理女爲皇太子妃賜爵望蔡縣侯位侍中尚書右僕射卒贈翊左將軍開府儀同三司諡曰貞憲君理弟君高君公君高字季高少知名性剛直有吏能位衛尉卿平越中郎將都督廣州刺史甚得人和卒諡祁子君公自梁元帝敗後常在江陵禎明中與蕭巖蕭巖叛隋歸陳後主擢爲太子詹事君公博學有才辯善談論後主深器之陳亡入隋文帝以其叛亡命斬于建康君理弟叔邁亦方正有幹局位通直散騎常侍侍東宮

陸山才字孔章吳郡吳人也祖翁寶梁尚書水部郎父汎中散大夫山才個儻好尚文史范陽張纘纘弟綰並欽重之紹泰中都督周文育出鎮南豫州不知書疏以山才爲長史政事悉以委之文育南討剋蕭勃禽歐陽頎計畫多出山才後文育重鎮豫章金口山才復爲鎮南長史豫章太守文育爲熊曇朗所害曇朗囚山才等送于王琳未至而侯安都敗琳將常衆爰由是山才獲反累遷度支尚書坐侍宴與蔡景歷言語過差爲有司所奏免官尋授散騎常侍遷西陽武昌二郡太守卒諡曰簡子

論曰趙知禮蔡景歷屬陳武經綸之日居文房書記之任此乃宋齊之初傅亮王儉之職若乃校其才用理不同年而卒能騰務濟時蓋其遇也希祥勞臣之子才名自致迹涉便佞貞介所羞元饒始終任遇無

虧公道名位自卒其殆優乎子高權重爲戮亦其宜也華皎經綸云始既蹈元功殷憂之辰自同勳草雖致奔敗未足爲非師知送往多闕見忌新主謀人之義可無慎哉然晚遇誅夷非其過也毛喜逢時遇主好謀而成見廢昏朝不致公輔惜矣沈陸所以見重固亦雅望之所致焉

南史卷六十八考證

蔡景歷傳景歷對使人答書筆不停輟文無所改○筆監本誤等今改从陳書

前後姦詭并受歐陽威餉絹百匹○陳書詭作訛又歐陽下有武字今各本俱同仍之

宗元饒傳事無巨細一以貫之○貫陳書作咨

劉師知傳好學有當務才○務陳書作世

毛喜傳宣帝曰子高卽欲收執何更如是○陳書高祖驚曰子高謀反卽欲收執何爲更如是耶較詳

南史卷六十八考證



南史卷六十九

唐

李

延

壽

列傳第五十九

沈炯

虞荔

弟寄傳 章華

顧野王

蕭濟

姚察

沈炯字初明吳興武康人也祖瑀梁尋陽太守父續王府記室參軍炯少有儒才為當時所重仕梁為尚書左戶侍郎吳令侯景之難吳郡太守袁君正入援建鄴以炯監郡臺城陷景將宋子仙據吳興使召炯方委以書記炯辭以疾子仙怒命斬之炯解衣將就戮礙於路間桑樹乃更牽往他所或救之僅而獲免子仙愛其才終逼之令掌書記及子仙敗王僧辯素聞其名軍中購得之酬所獲者錢十萬自是羽檄軍書皆出於炯及簡文遇害四方岳牧上表勸進僧辯令炯制表當時莫有逮者陳武帝南下與僧辯會白茅灣登壇設盟炯為其文及景東奔至吳郡獲炯妻虞氏及子行簡並殺之炯弟攜其母逃免侯景平梁元帝怒其妻子嬰戮特封原鄉侯僧辯為司徒以炯為從事中郎梁元帝徵為給事黃門侍郎領尚書左丞魏剋荊州被虜甚見禮遇授儀同三司以母在東恆思歸國恐以文才被留閉門却掃無所交接時有文童隨卽棄毀不令流布嘗獨行經漢武通天臺為表奏之陳己思鄉之意曰臣聞橋山雖掩鼎湖之靈

可祠有魯遂荒大庭之跡無泯伏惟陛下降德猗蘭纂靈豐谷漢道既登神仙可望射之罘於海浦禮日觀而稱功橫中流於汾河指柏梁而高宴何其甚樂豈不然歟既而運屬上僊道窮晏駕甲帳珠簾一朝零落茂陵玉盤遂出人間陵雲故基與原田而撫撫別風餘跡帶陵阜而芒芒羈旅縲臣豈不落淚昔承明見厭殿助東歸駟馬可乘長卿西反恭聞故實竊有愚心黍稷非馨敢望微福但雀臺之甲空槍魏君雍已之祠未光夏后瞻仰煙霞伏增悽戀奏訖其夜夢有宮禁之所兵衛甚嚴炯便以情事陳訴聞有人言甚不惜放卿還幾時可至少日便與王克等並獲東歸厯司農卿御史中丞陳武帝受禪加通直散騎常侍表求歸養詔不許文帝嗣位又表求去詔答曰當敕所由相迎尊累使卿公私無廢也初武帝嘗稱炯宜居王佐軍國大政多預謀謨文帝又重其才欲寵貴之會王琳入寇大雷留異擁據東境帝欲使炯因是立功乃解中丞加明威將軍遣還鄉里收徒衆以疾卒於吳中贈侍中諡恭子有書二十卷行於世虞荔字山披會稽餘姚人也祖權梁廷尉卿永嘉太守父檢平北始興王諮議參軍荔幼聰敏有志操年九歲隨從伯闕候太常陸倕倕問五經十事荔對無遺失倕甚異之又嘗詣徵士何胤時太守衡陽王亦造之胤言於王王欲見荔荔辭曰未有板刺無容拜謁王以荔有高尙之志雅相欽重還郡卽辟爲主簿荔又辭以年小不就及長美風儀博覽墳籍善屬文仕梁爲西中郎法曹外兵參軍兼丹陽詔獄正梁武



帝於城西置士林館蒨乃制碑奏上帝命勒之於館仍用蒨爲士林學士尋爲司文郎遷通直散騎侍郎兼中書舍人時左右之任多參權軸內外機務互有帶掌唯蒨與顧協泊然靜退居於西省但以文史見知尋領大著作及侯景之亂蒨率親屬入臺除鎮西諮議參軍如故臺城陷逃歸鄉里侯景平元帝徵爲中書侍郎貞陽侯僭位授揚州別駕並不就張彪之據會稽蒨時在焉及文帝平彪武帝及文帝並書招之迫切不得已乃應命至都而武帝崩文帝嗣位除太子中庶子仍侍太子讀尋領大著作初蒨母隨蒨入臺卒於臺內尋而城陷情禮不申由是終身蔬食衣布不聽音樂雖任遇隆重而居止儉素淡然無營文帝深器之常引在左右朝夕顧訪蒨性沉密少言論凡所獻替莫有見其際者第二弟寄寓於閩中依陳寶應蒨每言之輒流涕文帝哀而謂曰我亦有弟在遠此情甚切他人豈知乃敕寶應求寄寶應終不遣蒨因以感疾帝欲數往臨視令將家口入省蒨以禁中非私居之所乞停城外帝不許乃作住蘭臺乘輿再三臨問手敕中使相望於道又以蔬食積久非羸疾所堪乃敕曰卿年事已多氣力稍減方欲杖委良須克壯今給卿魚肉不得固從所執蒨終不從卒贈侍中諡曰德子及喪柩還鄉里上親出臨送當時榮之子世基世南並少知名

寄字次安少聰敏年數歲客有造其父遇寄於門嘲曰郎子姓虞必當無智寄應聲曰文字不辨豈得非

愚客大慙入謂其父此子非常人文舉之對不是過也及長好學善屬文性冲靖有樞道志弱冠舉秀才對策高第起家梁宣城王國左常侍大同中嘗驟雨殿前往往有雜色寶珠梁武觀之甚有喜色寄因上瑞雨頌帝謂寄兄荔曰此頌典裁清拔卿之士龍也將如何擢用寄聞之歎曰美盛德之形容以甲擊壤之情耳吾豈買名求仕者乎乃閉門稱疾唯以書籍自娛岳陽王督爲會稽太守寄爲中記室領郡五官掾在職簡略煩苛務存大體曹局之內終日寂然侯景之亂寄隨兄荔入臺及城陷遁還鄉里張彪往臨川強寄俱行寄與彪將鄭瑋同舟而載瑋嘗忤彪意乃劫寄奔晉安時陳寶應據有閩中得寄甚喜陳武帝平侯景寄勸令自結寶應從之乃遣使歸誠承聖元年除中書侍郎寶應愛其才託以道阻不遣每欲引寄爲僚屬委以文翰寄固辭獲免及寶應結昏留異潛有逆謀寄微知其意言說之際每陳逆順之理微以諷諫寶應輒引說他事以拒之又嘗令左右讀漢書臥而聽之至蒯通說韓信曰相君之背貴不可言寶應蹶然起曰可謂智士寄正色曰覆酈驕韓未足稱智豈若班彪王命識所歸乎寄知寶應不可諫慮禍及己乃爲居士服以拒絕之常居東山寺僞稱脚疾不復起寶應以爲假託遣人燒寄所臥屋寄安臥不動親近將扶寄出寄曰吾命有所懸避欲安往所縱火者旋自救之寶應自此方信之及留異稱兵寶應資其部曲寄乃因書極諫曰東山居士虞寄致書於明將軍使君節下寄流離艱故飄寓貴鄉將軍

待以上賓之禮申以國士之眷意氣所感何日忘之而寄沉痾彌留愒陰將盡常恐卒填溝壑酒塵莫報是以敢布腹心冒陳丹款願將軍留須臾之慮少思察之則冥目之日所懷畢矣夫安危之兆禍福之機匪獨天時亦由人事失之毫釐差以千里是以明智之士據重位而不傾執大節而不失豈惑於浮辭哉將軍文武兼資英威動俗往因多難杖劍興師援旗誓衆抗威千里豈不以四郊多壘共謀王室匡時報主寧國庇人乎此所以五尺童子皆願荷戟而隨將軍者也及高祖武皇帝肇基草昧初濟艱難於時天下沸騰人無定主豺狼當道鯨鯢橫擊海內業業未知所從將軍運動微之鑿折從衡之辨策名委質自託宗盟此將軍妙算遠圖發於衷誠者也及主上繼業欽明睿聖選賢與能羣臣頓睦結將軍以維城之重崇將軍以裂土之封豈非宏謨廟略推赤心於物者也屢申明詔款篤懸轡君臣之分定矣骨肉之恩深矣不意將軍惑於邪說翻於異計寄所以疾首痛心泣盡繼之以血萬全之策竊爲將軍惜之寄雖疾侵毒及言無足采干慮一得請陳愚算願將軍少戢雷震除其晷刻使得盡狂瞽之說披肝膽之誠則雖死之日猶生之年也自天厭梁德多難薦臻寶宇分崩英雄互起不可勝紀人人自以爲得之然夷凶翦亂拯溺扶危四海樂推三靈眷命揖讓而居南面者陳氏也豈非麻數有在惟天所授當璧應運其事甚明一也主上承基明德遠被天綱再張地維重紐夫以王琳之疆侯瑱之力進足以搖蕩中原爭衡天下

邇足以屈疆江外雄張偏隅然或命一旅之師或資一士之說琳卽瓦解冰泮投身異域瑱則厥角稽顙委命闕庭斯又天假之威而除其患其事甚明二也今將軍以藩戚之重擁東南之衆盡忠奉上戮力勤王豈不勳高寶融寵過吳芮析珪判野南面稱孤其事甚明三也且聖朝棄瑕忘過寬厚得人改過自新咸加叙擢至如余孝頃潘純陀李孝欽歐陽頴等悉委以心腹任以爪牙胸中豁然曾無纖芥況將軍疊非張繡罪異畢譴當何慮於危亡何失於富貴此又其事甚明四也方今周齊鄰睦境外無虞并兵一向匪朝伊夕非有劉項競逐之機楚趙連從之事可得雍容高拱坐論西伯其事甚明五也且留將軍狼狽一隅亟經摧衄聲實虧喪膽氣衰沮高瓌向文政留瑜黃子玉此數人者將軍所知首鼠兩端唯利是視其餘將帥亦可見矣孰能被堅執銳長驅深入擊馬埋輪奮不顧命以先士卒者乎此又其事甚明六也且將軍之強孰如侯景將軍之衆孰如王琳武皇滅侯景於前今上摧王琳於後此乃天時非復人力且兵革已後人皆厭亂其孰能棄墳墓捐妻子出萬死不顧之計從將軍於白刃之間乎此又其事甚明七也歷觀前古鑒之往事子陽季孟傾蓋相尋餘善右渠危亡繼及天命可畏山川難恃況將軍欲以數郡之地當天下之兵以諸侯之資拒天子之命強弱逆順可得侔乎此又其事甚明八也且非我族類其心必異不愛其親豈能及物留將軍身縻國爵子尚王姬猶且棄天屬而弗顧背明君而孤立危急之日豈

能同憂共患不肯將軍者乎至於師老力屈懼誅利賞必有韓智晉陽之謀張陳并陘之事此又其事甚明九也且北軍萬里遠鬪鋒不可當將軍自戰其地人多顧後梁安背向爲心修旰匹夫之力衆寡不敵將帥不侔師以無名而出事以無機而動以此稱兵未知其利以漢朝吳楚晉室顛駟連城數十長戟百萬拔本塞源自圖家國其有成功者乎又其事甚明十也爲將軍計者莫若不遠而復絕親留氏秦郎快郎隨遣入質釋甲偃兵一遵詔旨且朝廷許以鐵券之要申以白馬之盟朕不食言誓之宗社寄聞明者覽未形智者不再計此成敗之効將軍勿疑吉凶之幾間不容髮方今蕃維尙少皇子幼沖凡預宗枝皆蒙寵樹況以將軍之地將軍之才將軍之名將軍之勢而能克脩蕃服北面稱臣竄與劉澤同年而語其功業哉豈不身與山河等安名與金石相弊願加三思慮之無忽寄氣力緜微餘陰無幾感恩懷德不覺狂言鈇鉞之誅甘之如薺寶應覽書大怒或謂寶應曰虞公病篤言多錯謬寶應乃小釋亦以寄人望且容之及寶應敗走夜至蒲田顧謂其子扞秦曰早從虞公計不至今日扞秦但泣而已寶應旣禽凡諸賓客微有交涉者皆誅唯寄以先識免禍初沙門慧標涉獵有才思及寶應起兵作五言詩以送之曰送馬猶臨水離旗稍引風好看今夜月當照紫微宮寶應得之甚悅慧標以示寄寄一覽便止正色無言慧標退寄謂所親曰標公旣以此始必以此終後竟坐是誅文帝尋敕都督章昭達發遣寄還朝及至謂曰管



靈無恙甚慰勞懷頃之帝謂到仲舉曰衡陽王既出閣須得一人旦夕游處兼掌書記宜求宿士有行業者仲舉未知所對帝曰吾自得之乃手敕用寄寄入謝帝曰所以慙屈卿游蕃非止以文翰相煩乃令以師表相事也後除東中郎建安王諮議加戎昭將軍寄乃辭以疾不堪旦夕陪列王於是令長停公事其有疑議就以決之但朔旦燒脩而已太建八年加太中大夫後卒寄少篤行造次必於仁厚雖僮豎未嘗加以聲色至臨危執節則辭氣凜然白刃不憚也自流寓南土與兄荔隔絕因感氣病每得荔書氣輒奔劇危殆者數矣前後所居官未嘗至秩滿裁朞月便自求解退常曰知足不辱吾知足矣及謝病私庭每諸王爲州將下車必造門致禮命釋鞭板以几杖侍坐嘗出游近寺閭里傳相告語老幼羅列望拜道左或言誓爲約者但指寄便不欺其至行所感如此所制文筆遭亂並多散失

傅縡字宜事北地靈州人也父彝梁臨沂令縡幼聰敏七歲誦古詩賦至十餘萬言長好學能屬文太清末丁母憂在兵亂中居喪盡禮哀毀骨立士友以此稱之後依湘州刺史蕭循循好士廣集墳籍縡肆志尋閩因博通羣書王琳聞其名引爲府記室琳敗隨琳將孫瑒還都時陳文帝使顏晃賜瑒雜物瑒託縡啟謝詞理周洽文無加點晃還言之文帝召爲撰史學士再遷驃騎安成王中記室撰史如故縡篤信佛教從興皇寺慧朗法師受三論盡通其學尋以本官兼通直散騎侍郎使齊還累遷太子庶子後主卽位

遷祕書監右衛將軍兼中書通事舍人掌詔誥繹爲文典麗性又敏速雖軍國大事下筆輒成未嘗起草  
沈思者亦無以加甚爲後主所重然性木強不持檢操負才使氣陵侮人物朝士多銜之會施文慶沈客  
卿以佞見幸專制衡軸而綽益疎文慶等因共譖之後主收綽下獄綽素剛因憤恚於獄中上書曰夫人  
君者恭事上帝子愛黔黎省嗜慾遠諂佞未明求衣日旰忘食是以澤被區宇慶流子孫陛下頃來酒色  
過度不虔郊廟之神專媚淫昏之鬼小人在側官豎弄權惡忠直若仇讐視百姓如草芥後宮曳綺繡靡  
馬餘菽粟兆庶流離轉尸蔽野貨賄公行帑藏損耗神怒人怨衆叛親離恐東南王氣自斯而盡書奏後  
主大怒頃之稍解使謂曰我欲赦卿卿能改過不綽對曰臣心如面臣面可改則臣心可改後主於是益  
怒令宦者李善度窮其事賜死獄中有集十卷綽雖強直有才而毒惡傲慢爲當世所疾及死有惡蛇屈  
尾來上靈牀當前受祭醑去而復來者百餘日時時有彈指聲時有吳興章華字仲宗家本農夫至華獨  
好學與士君子游處頗通經史善屬文侯景之亂游嶺南居羅浮山寺專精習業歐陽頎爲廣州刺史署  
爲南海太守顧子紇敗乃還都後主時除太市令非其所好乃辭以疾禎明初上書極諫其大略曰陛下  
卽位於今五年不思先帝之艱難不知天命之可畏溺於嬖寵惑於酒色祠七廟而不出拜妃嬪而臨軒  
老臣宿將棄之草莽諂佞讒邪升之朝廷今壇場日感隋軍壓境陛下如不改絃易張臣見麋鹿復游於

姑蘇矣書奏後主大怒即日斬之

顧野王字希馮吳郡吳人也祖子喬梁東中武陵王府參軍事父烜信威臨賀王記室兼本郡五官掾以儒術知名野王幼好學七歲讀五經略知大指九歲能屬文嘗制日賦領軍朱异見而奇之十二隨父之建安撰建安地記二篇長而徧觀經史精記嘿識天文地理著龜占候蟲篆奇字無所不通爲臨賀王府記室宣城王爲揚州刺史野王及琅邪王褒並爲賓客王甚愛其才野王又善丹青王於東府起齋令野王畫古賢命王褒書贊時人稱爲二絕及侯景之亂野王丁父憂歸本郡乃召募鄉黨隨義軍援都野王體素清羸裁長六尺又居喪過毀殆不勝哀及杖戈被甲陳君臣之義逆順之理抗辭作色見者莫不壯之城陷逃會稽陳天嘉中敕補撰史學士太建中爲太子率更令尋領大著作掌國史知梁史事後爲黃門侍郎光祿卿知五禮事卒贈祕書監右衛將軍野王少以篤學至性知名在物無過辭失色觀其容貌似不能言其厲精力行皆人所莫及所撰玉篇二十卷輿地志三十卷符瑞圖十卷顧氏譜傳十卷分野樞要一卷續洞冥記一卷玄象表一卷並行於世又撰通史要略一百卷國史紀傳二百卷未就而卒有文集二十卷時有蕭濟字孝康東海蘭陵人也好學博通經史仕梁爲太子舍人預平侯景功封松陽縣侯陳文帝爲會稽太守以濟爲宣毅府長史及卽位授侍中太建中歷位五兵度支祠部三尚書卒



姚察字伯審吳興武康人吳太常卿信之九世孫也父僧坦梁太醫正及元帝在荊州爲晉安王諮議參軍後入周位遇甚重察幼有至性六歲誦書萬餘言不好戲弄勵精學業十二能屬文僧坦精醫術知名梁代二宮所得供賜皆回給察兄弟爲游學之資察並用聚蓄圖書由是聞見日博年十三梁簡文帝時在東宮盛修文義卽引於宣猷堂聽講論難爲儒者所稱及簡文嗣位尤加禮接起家南海王國左常侍兼司文侍郎後兼尙書駕部郎遇梁室喪亂隨二親還鄉里在亂離間篤學不廢元帝於荊州卽位授察原鄉令後爲佐著作撰史陳永定中吏部尙書徐陵領大著作復引爲史佐太建初補宣明殿學士尋爲通直散騎常侍報聘於周江左者舊先在關右者咸相傾慕沛國劉臻竊於公館訪漢書疑事十餘條並爲剖析皆有經據臻謂所親曰名下定無虛士著西聘道里記使還補東宮學士遷尙書祠部侍郎舊魏王肅奏祀天地設宮懸之樂八佾之儻爾後因循不革至梁武帝以爲事人禮禩事神禮簡古無宮懸之文陳初承用莫有損益宣帝欲設備樂付有司立議以梁武爲非時碩學名儒朝端在位咸希旨注同察乃博引經籍獨違羣議據梁樂爲是當時驚駭莫不慙服僕射徐陵因改同察議其不順時隨俗皆此類也後歷仁威淮南王平南建安王二府諮議參軍丁內憂去職俄起爲戎昭將軍知撰梁史後主立兼東宮通事舍人知撰史至德元年除中書侍郎轉太子僕餘並如故初梁室淪沒察父僧坦入長安察蔬食

布衣不聽音樂至是凶問因聘使到江南時察母韋氏喪制適除後主以察羸瘠慮加毀頓乃密遣中書舍人司馬申就宅發哀仍敕申專加譬抑尋以忠毅將軍起兼東宮通事舍人察頻讓不許俄敕知著作郎事服闋除給事黃門侍郎領著作察既累居憂戚齋素日久因加氣疾後主嘗別召見爲之動容命停長齋令從晚食又詔授祕書監領著作奏撰中書表集歷度支吏部二尚書察自居顯要一不交通嘗有私門生不敢厚餉送南布一端花練一匹察謂曰吾所衣著止是麻布蒲練此物於吾無用既欲相款接幸不煩爾此人遜請察厲色驅出自是莫敢饋遺陳亡入隋詔授祕書丞別敕成梁陳二史又敕於朱華閣長參文帝知察疏非別日獨召入內殿賜果菜指謂朝臣曰聞姚察學行當今無比我平陳唯得此人開皇十三年襲封北絳郡公察在陳時聘周因得與父僧坦相見將別之際絕而復蘇至是承襲愈更悲感見者莫不爲之歔歔丁後母杜氏喪解職在服制之中有白鳩巢於戶上仁壽二年詔除員外散騎常侍晉王侍讀煬帝卽位授太子內舍人及改易衣冠刪定朝式預參對問大業二年終於東都遺命薄葬以松板薄棺纔可容身土周於棺而已葬日止鹿車卽送厝舊塋北不須立靈置一小牀每日設清水大齋日設齋食菜果任家有無不須別經營也初察欲讀一藏經並已究竟將終曾無痛惱但西向坐正念云一切空寂其後身體柔軟顏色如恆兩宮悼惜贈賻甚厚察至孝有人倫鑒識沖虛謙遜不以所長

矜人專志著書白首不倦所著漢書訓纂三十卷說林十卷西聘玉璽建康三鍾等記各一卷文集二十卷所撰梁陳史雖未畢功隋開皇中文帝遣中書舍人虞世基索本且進臨亡戒子思廉撰續思廉在陳爲衡陽王府法曹參軍會稽王主簿

論曰沈炯才思之美足以繼踵前良然仕於梁朝年已知命主非不文而位裁邑宰及於運逢交喪驅馳戎馬所在稱美用捨信有時焉虞荔弟兄才行兼著崎嶇喪亂保茲貞一並取貴時主豈虛得乎傳粹聰警特達才氣自負行之平日其猶殆諸處以危邦死其宜矣顧姚栖託藝文蹈履清直文質彬彬各踐通賢之域美矣乎

南史卷六十九

南史卷六十九考證

虞荔傳方欲杖委良須克壯○一本杖作仗克作充

弟寄傳高瓌向文政留瑜黃子玉此數人者○玉監本訛王今改正

至於師老力屈懼誅利賞○屈監本誤君今改从南本

脩旰匹夫之力衆寡不敵將帥不侔○脩旰監本誤宵旰今改从陳書

南史卷六十九考證



南史卷七十

唐

李

延

壽

撰

列傳第六十

循吏

吉翰

杜驥

申恬

杜慧慶

阮長之

甄法崇

孫彬傅琰

孫岐虞恩

王洪軌

李珪之

沈瑀

范述曾

孫謙

從子廉

何遠

郭祖深

昔漢宣帝以為政平訟理其惟良二千石乎前史亦云今之郡守古之諸侯也故長吏之職號曰親人至

於道德齊禮移風易俗未有不由之矣宋武起自匹庶知人事艱難及登庸作宰留心吏職而王略外舉

未遑內務奉師之費日耗千金播茲寬簡雖所未暇而黜己屏欲以儉御身左右無幸謁之私闈房無文

綺之飾故能戎車歲駕邦甸不擾文帝幼而寬仁入纂大業及難興陝服六戎薄伐興師命將動在濟時

費由府實事無外擾自此方內晏安毗庶蕃息奉上供徭止於歲賦晨出暮歸自事而已守宰之職以六

暮為斷雖沒世不徙未及曩時而人有所係吏無苟得家給人足即事雖難轉死溝渠於時可免凡百戶

之鄉有市之邑歌謠舞蹈觸處成羣蓋宋時之極盛也暨元嘉二十七年舉境外捍於是傾資掃蓄猶有

未供深賦厚斂天下騷動自茲迄於孝建兵連不息以區區江東蕞爾迫隘薦之以師放囚之以凶荒向時之盛自此衰矣晉世諸帝多處內房朝晏所臨東西二堂而已孝武末年清暑方構及永初受命無所改作所居唯稱西殿不制嘉名文帝因之亦有合殿之稱及孝武承統制度滋長犬馬餘菽粟土木衣繡繡追陋前規更造正光玉燭紫極諸殿彫鑿綺節珠窗網戶嬖女幸臣賜傾府藏竭四海不供其欲殫人命未快其心明皇繼祚彌篤浮侈恩不卹下以至橫流莅人之官遷變歲屬突不得黔竈未暇暖蒲密之化事未易階豈徒吏不及古人乖於昔蓋由爲上所擾致化莫從齊高帝承斯奢縱輔立幼主思振人瘼風移百城爲政未朞擢山陰令傅琰爲益州刺史乃損華反樸恭己南面導人以躬意存勿擾以山陰大邑獄訟繁滋建元三年別置獄丞與建康爲比永明繼運垂心政術杖威善斷猶多漏網長吏犯法封刃行誅郡縣居職以三周爲小滿水旱之災輒加振卹十許年中百姓無犬吠之驚都邑之盛士女昌逸歌聲舞節秣服華粧桃花淥水之間秋月春風之下無往非適明帝自在布衣達於吏事及居宸扆專務刀筆未嘗枉法申恩守宰由斯而震屬以魏軍入伐擾場大擾兵車連歲不遑敗居軍國糜耗從此衰矣繼以昏亂政由羣孽賦調雲起徭役無度守宰多倚附權門互長貪虐哀刻聚斂侵擾黎甞天下搖動無所措其手足梁武在田知人疾苦及定亂之始仍下寬書東昏時雜調咸悉除省於是四海之內始得息肩



及殿皇極躬覽庶事日昃聽政求瘼屺隲乃命輜軒以省方俗置肺石以達窮人勞已所先事唯急病元年始去人冀計丁爲布在身服浣濯之衣御府無文錦之飾太官常膳唯以菜蔬圓案所陳不過三盞蓋以儉先海內也故每選長吏務簡廉平皆召見於前親勗政道始擢尙書殿中郎到漑爲建安內史左戶侍郎劉讓爲晉安太守漑等居官並以廉潔著又著令小縣有能遷爲大縣令大縣有能遷爲二千石於是山陰令巨仲孚有異績以爲長沙內史武康令何遠清公以爲宣城太守剖符爲吏者往往承風焉斯亦近代獎勵之方也案前史各立循吏傳序其德美今並掇采其事以備此篇云

吉翰字休文馮翊池陽人也初爲龍驤將軍劉道憐參軍隨府轉征虜左軍參軍隨道憐北征廣固賜爵建城縣五等侯參宋武帝中軍軍事臨淮太守復爲道憐驃騎中兵參軍從事中郎爲將佐十餘年清謹勤正甚爲武帝所知賞元嘉中歷位梁南秦二州刺史徙益州刺史加督在任著美績甚得方伯之體論者稱之累遷徐州刺史監徐兗二州豫州梁郡諸軍事時有死罪囚典籤意欲活之因翰入關齋呈事翰省詔語令且去明可更呈明且典籤不敢復入呼之乃來取昨所呈事視詔謂曰卿意當欲宥此囚死命昨於齋坐見其事亦有心活之但此囚罪重不可全貸旣欲加恩卿便當代任其罪因命左右收典籤付獄殺之原此囚生命其刑政類如此自下畏服莫敢犯禁卒於官

杜驥字度世京兆杜陵人也高祖預晉征南將軍曾祖耽避難河西因仕張氏苻堅平涼州父祖始還關中兄坦頗涉史傳宋武帝平長安隨從南還元嘉中位青冀二州刺史晚度北入南朝常以儉荒遇之雖復人才可施每爲清途所隔坦恆以慨然嘗與文帝言及史籍上曰金日磾忠孝淳深漢朝莫及恨今世無復此輩人坦曰日磾之美誠如聖詔假使出乎今世養馬不暇豈辨見知上變色曰卿何量朝廷之薄也坦曰請以臣言之臣本中華高族亡高祖因晉氏喪亂播遷涼土直以南度不早便以荒儉賜隔日磾胡人身爲牧圉便超入內侍齒列名賢聖朝雖復拔才臣恐未必能也上默然北土舊法問疾必遣子弟驥年十三父使候同郡韋華子玄有高名見而異之以女妻焉累遷長沙王義欣後軍錄事參軍元嘉七年隨到彥之入河南加建武將軍魏撤河南戍悉歸河北彥之使驥守洛陽洛陽城廢久又無糧食及彥之敗退驥欲棄城走慮爲文帝誅初武帝平關洛致鍾虜舊器南還一大鍾墜洛水中至是帝遣將姚聳夫領千五百人迎致之時聳夫政率所領牽鍾於洛水驥乃遣使給之曰虜旣南度洛城勢弱今脩理城池並已堅固軍糧又足所乏者人耳君率衆見就共守此城大功旣立取鍾無晚聳夫信之率所領就驥及至城不可守又無糧食於是引衆去驥亦委城南奔白文帝本欲以死固守姚聳夫入城便走人情沮敗不可復禁上怒使建威將軍鄭順之殺聳夫於壽陽聳夫吳興武康人勇果有氣力宋偏裨小將莫

及十七年驥爲青冀二州刺史在任八年惠化著於齊土自義熙至於宋末刺史唯羊穆之及驥爲吏人所稱詠後徵爲左軍將軍兄坦代爲刺史北土以爲榮焉坦長子琬爲員外散騎侍郎文帝嘗有函詔敕坦琬輒開視信未及發又追取之敕函已發大相推檢上遣主書詰責驥并檢開函之主驥答曰開函是臣第四息季文伏待刑坐上特原不問卒官第五子幼文薄於行明帝初以軍功封邵陽縣男尋坐巧妄奪爵後以發太尉廬江王禕謀反事拜給事黃門侍郎廢帝元徽中爲散騎常侍幼文所莅貧橫家累千金與沈勃孫超之居止接近又並與阮佃夫厚善佃夫旣死廢帝深疾之帝微行夜輒在幼文門墉間聽其絃管積久轉不能平於是自率宿衛兵誅幼文勃超之等兄叔文爲長水校尉亦誅

申怙字公休魏郡魏人也曾祖鍾爲石季龍司徒宋武帝平廣固怙父宣宣從父兄永皆得歸晉並以幹用見知武帝踐阼拜太中大夫宣元嘉初歷兗青二州刺史怙兄謨與朱脩之守滑臺魏剋滑臺見虜後得還爲竟陵太守怙初爲驃騎劉道憐長兼行參軍宋受命辟東宮殿中將軍度還臺直省十年不請休息歷下邳北海二郡太守所至皆有政績又爲北譙梁二郡太守郡境邊接任榛屢被寇抄怙到任密知賊來乃伏兵要害出其不意悉皆禽殄元嘉十二年遷督魯東平濟北三郡諸軍事太山太守威惠兼著吏人便之二十一年冀州移鎮歷下以怙爲冀州刺史加督明年加濟南太守孝武踐阼爲青州刺史尋

加督齊地連歲興兵百姓彫弊怙防禦邊境勸課農桑二三年間遂皆優實性清約頓處州郡妻子不免飢寒世以此稱之後拜豫州刺史以疾徵還道卒死之日家無遺財子寔南譙太守謨子元嗣海陵太守元嗣弟謙臨川內史承子坦孝建初爲太子右衛率徐州刺史大明元年魏攻兗州孝武遣太子左衛率薛安都東陽太守沈法系北捍至兗州魏軍已去坦建議任榛亡命屢犯邊人今軍出無功宜因此翦撲上從之亡命先已聞知舉村逃走安都法系坐白衣領職坦棄市羣臣爲請莫得將行刑始興公沈慶之入市抱坦痛哭曰卿無罪爲朝廷所枉誅我入市亦當不久市官以白上乃原生命繫尙方尋被宥復爲驍騎將軍疾卒子令孫明帝時爲徐州刺史討薛安都行至淮陽卽與安都合弟闡時爲濟陰太守戊隹陵城奉順不同安都安都攻圍不能尅會令孫至遣往隹陵說闡闡降殺之令孫亦見殺

杜慧慶交趾朱獻人也本屬京兆曾祖元爲寧浦太守遂居交趾父瑗字道言仕州府爲日南九德交趾太守初九真太守李遜父子勇壯有權力威制交土聞刺史滕遜之當至分遣二子斷遏水陸津要瑗收衆斬遜州境獲盜後爲龍驤將軍交州刺史宋武帝義旗建進號冠軍將軍盧循竊據廣州遣使通好瑗斬之義熙六年卒年八十四贈右將軍慧慶瑗第五子也七年除交州刺史詔書未到其年春盧循襲破合浦徑向交州慧慶乃率文武六千人拒循於石碣破之循雖破餘黨皆習兵事李遜子孫李奕李移李

颺等皆奔竄石碣盤結狸獠各有部曲循知奕等與杜氏有怨遣使招之奕等受循節度六月庚子循晨  
造南津令三軍入城乃食慧慶悉出宗族私財以充勸賞自登高艦合戰放火箭循衆艦俱然一時散潰  
循中箭赴水死斬循及父蝦并循二子並傳首建鄴封慧慶龍編縣侯武帝踐阼進號輔國將軍其年南  
討林邑林邑乞降輸生口大象金銀古貝等乃釋之遣長史江攸奉表獻捷慧慶布衣蔬食儉約質素能  
彈琴頗好莊老禁斷淫祀崇脩學校歲荒人飢則以私祿振給爲政纖密有如居家由是威惠霑洽盜  
不起乃至城門不夜閉道不拾遺卒追贈左將軍以慧慶長子弘文爲振遠將軍交州刺史初武帝北征  
關洛慧慶板弘文行九真太守乃繼父爲刺史亦以寬和得衆龔龍編侯元嘉四年文帝以廷尉王儼  
爲交州刺史弘文被徵會得重疾率以就路親舊見其愚篤勸待病愈弘文曰吾世荷皇恩杖節三世常  
欲投軀帝庭以報所荷況親被徵命而可晏然者乎弘文母阮年老見弘文與疾就路不忍別輿到廣州  
遂卒臨死遺弟弘猷詣建鄴朝廷甚哀之孝建中以豫章太守檀和之爲豫州刺史和之先厯始興太守  
交州刺史所在有威名盜賊屏迹每出獵猛獸伏不敢起

阮長之字景茂一字善業陳留尉氏人也祖思曠金紫光祿大夫父普驪騎諮議參軍長之年十五喪父  
有孝性哀感傍人除服蔬食者猶積載閑居篤學未嘗有惰容初爲諸府參軍母老求補襄垣令督郵無



禮鞭之去職後拜武昌太守時王弘爲江州雅相知重引爲車騎從事中郎元嘉十一年除臨海太守在官常擁敗絮至郡少時母亡葬畢不勝憂卒時郡田祿以苦種爲斷此前去官者則一年秩祿皆入後人始以元嘉末改此科計月分祿長之去武昌郡代人未至以苦種前一日解印綬初發都親故或以器物贈別得便緘錄後歸悉以還之爲中書郎直省夜往鄰省誤著屐出閣依事自列門下以闔夜人不知不受列長之固遣送曰一生不侮暗室前後所莅官皆有風政爲後人所思宋世言善政者咸稱之文帝深惜之曰景茂方堪大用豈直以清苦見惜子師門原鄉令元嘉初文帝遣大使巡行四方兼散騎常侍王歆之等上言宣威將軍陳南頓二郡太守李元德清勤均平姦盜止息彭城內史魏恭子廉情脩慎在公忘私安約守儉久而彌固前宋縣令成浦爲政寬濟遺詠在人前銅陽令李熙國在事有方人思其政故山桑令何道自少清廉白首彌厲應加褒賚以勸於後各被褒賜歆之字叔道河東人曾祖愷期有名晉世官至南蠻校尉歆位左戶尙書光祿大夫卒官

甄法崇中山人也父匡位少府卿以清聞法崇永初中爲江陵令在任嚴整縣境肅然於時南平繆士通爲江安令卒官至其年末法崇在聽事士通前見法崇知其已亡愕然未言坐定云卿縣人宋雅見負米千餘石不還令兒窺窆不自存故自訴法崇因命口受爲辭因遜謝下席而法崇爲問繆家狼狽輸送



太守王華聞而歎美之法崇孫彬彬有行業鄉黨稱善嘗以一束苧就州長沙寺庫質錢後贖苧還於苧  
束中得五兩金以手巾裹之彬得送還寺庫道人驚云近有人以此金質錢時有事不得舉而失檀越乃  
能見還輒以金半仰酬往復十餘彬堅然不受因謂曰五月披羊裘而負薪豈拾遺金者邪卒還金梁武  
帝布衣而聞之及踐阼以西昌侯藻爲益州刺史乃以彬爲府錄事參軍帶郫縣令將行同列五人帝誠  
以廉慎至彬獨曰卿昔有還金之美故不復以此言相屬由此名德益彰及在蜀藻禮之甚厚云

傅琰字季珪北地靈州人也曾祖弘仁宋武帝之外弟以中表歷顯官位太常卿祖劬字彥先員外散騎  
侍郎父僧祐山陰令有能名琰姿儀仕宋爲武康令遷山陰令並著能名二縣皆謂之傅聖賜爵新亭  
侯元徽中遷尙書左丞母喪鄰家失火延燒琰屋抱柩不動鄰人競來赴救乃得俱全琰股髀之間已被  
烟炤齊高帝輔政以山陰獄訟煩積復以琰爲山陰令賣針賣糖老姥爭團絲來詣琰挂團絲於柱鞭  
之密視有鐵屑乃罰賣糖者又二野父爭雞琰各問何以食雞一人云粟一人云豆乃破雞得粟罪言豆  
者縣內稱神明無敢爲偷琰父子並著奇績時云諸傅有理縣譜子孫相傳不以示人昇明中遷益州刺  
史自縣遷州近世罕有齊建元四年徵驍騎將軍黃門郎永明中爲廬陵王安西長史南郡內史行荊州  
事卒琰喪西還詔出臨哭時長沙太守王沉新蔡太守劉聞慰晉平太守丘仲起長城縣令何敬叔故

鄆縣令丘寂之皆有能名而不及瑋也沉字彥流東海人歷錢唐山陰秣陵令南平長沙太守清廉戒慎  
身恆居祿而居處日貧死之日無宅可憩故吏爲營棺柩聞慰自有傳仲起見沈憲傳敬叔見子思澄傳  
寂之字德玄吳興烏程人年十七爲州西曹兼直主簿刺史王彧行夜還前驅已至而寂之不肯開門曰  
不奉墨旨彧方於車中爲教然後開彧歎曰不意鄧君章近在閣下卽轉爲主簿在縣專以廉潔御下於  
時丹徒縣令沈疇之以清廉抵罪寂之聞之曰清吏真不可爲也政當處季孟之間疇之吳興武康人性  
疎直在縣自以清廉不事左右浸潤日至遂鎖繫尙方歎曰一見天子足矣上召問曰復欲何陳答曰臣  
坐清所以獲罪上曰清復何以獲罪曰無以承奉要人上曰要人爲誰疇之以手板四面指曰此赤衣諸  
賢皆是若臣得更鳴必令清譽日至疇之雖危言上亦不責後知其無罪重除丹徒令入縣界吏人候之  
謂曰我今重來當以人肝代米不然清名不立又有汝南周洽歷句容曲阿上虞吳令廉約無私  
水使者無以殯斂吏人爲買棺器齊武帝聞而非之曰洽累歷名邑而居處不理遂坐無事  
棺之此故宜罪貶無論褻恤乃敕不給贈賻瑋子翽爲官亦有能名後爲吳令別建康令  
孫廉廉因問曰  
聞丈人發姦擿伏惠化如神何以至此答曰無他也唯勤而清清則憲綱自行勤則  
事無不理憲綱自行  
則更不能欺事自理則物無疑滯欲不理得乎時臨淮劉玄明亦有更能歷  
陰建康令政常爲天下第

一終於司農卿後嗣又代玄明爲山陰令問玄明曰願以舊政告新令尹答曰我有奇術卿家譜所不載  
臨別當相示既而曰作縣令唯日食一升飯而莫飲酒此第一策也嗣天監中爲建康令復有能名位驥  
騎諂議子岐岐字景平仕梁起家南康王左常侍後兼尙書金部郎母憂去職居喪盡禮服闋後疾廢久  
之復除始新令縣人有因鬪相毆而死家訴郡郡錄其仇人考掠備至終不引咎郡乃移獄於縣岐卽  
令脫械以和言問之便卽首服法當償死會冬節至岐乃放其還家獄曹掾固爭曰古者有此今不可行  
岐曰其若負信縣令當坐竟如期而反太守深相歎異遽以狀聞岐後去縣人無老少皆出境拜送號哭  
聞數十里至都除廷尉正入兼中書通事舍人累遷安西中記室兼舍人如故岐美容止博涉能占對大  
同中與魏和親其使歲中再至常遣岐接對焉太清元年累遷太僕司農卿舍人如故岐在禁省十餘年  
機事密勿亞於朱异此年冬貞陽侯蕭明伐彭城兵敗囚於魏三年明遣使還述魏欲通和好敕有司及  
近臣定議左衛朱异曰邊境且得靜寇息人於事爲便議者並然之岐獨曰高澄旣新得志何事須和必  
是設問故令貞陽遣使令侯景自疑當以貞陽易景景意不安必圖禍亂若許通好政是墮其計中且彭  
城去歲喪師渦陽復新敗退今使就和益示國家之弱和不可許异等固執帝遂從之及遣使景果有此  
疑遂舉兵入寇請誅朱异三年遷中領軍舍人如故二月侯景於闕前通表乞割江右四州安置部下當

解圍還鎮敕許之乃於城西立盟求遣召宣城王出送岐固執宣城王嫡嗣之重不宜許之乃遣石城公大款送之及與景盟訖城中文武喜躍冀得解圍岐獨言於衆曰賊舉兵爲逆豈有求和及景背盟莫不歎服尋有詔以岐勤勞封南豐縣侯固辭不受宮城失守岐帶疾出圍卒於宅

虞愿字士恭會稽餘姚人也祖賚給事中監利侯父望之早卒賚中庭橘樹冬熟子孫競來取之愿年數歲獨不取賚及家人皆異之宋元嘉中爲湘東王國常侍及明帝立以愿儒吏學涉兼蕃國舊恩意遇甚厚除太常丞尙書祠部郎通直散騎侍郎帝性猜忌體肥憎風夏月常著小皮衣拜左右二人爲司風令史風起方面輒先啟聞星文災變不信太史不聽外奏敕靈臺知星二人給愿常內省直有異先啟以相檢察帝以故宅起湘宮寺費極奢侈以孝武莊嚴刹七層帝欲起十層不可立分爲兩刹各五層新安太守巢尙之罷郡還見帝曰卿至湘宮寺未我起此寺是大功德愿在側曰陛下起此寺皆是百姓賣兒貼婦佛若有知當悲哭哀愍罪高佛圖有何功德尙書令袁粲在坐爲之失色帝大怒使人馳曳下殿愿徐去無畏容以舊恩少日中已復召入帝好圍碁甚拙去格七八道物議共欺爲第三品與第一品王抗圍碁依品賭戲抗饒借帝曰皇帝飛碁臣抗不能斷帝終不覺以爲信然好之愈篤愿又曰堯以此教丹朱非人主所宜好也雖數忤旨而蒙賞賜猶異餘人遷兼中書郎帝寢疾愿常侍醫藥帝尤好逐夷以銀鉢

盛蜜漬之一食數鉢謂揚州刺史王景文曰此是奇味卿頗足不景文答曰臣夙好此物貧素尋之甚難帝甚悅食逐夷積多胃腹痞脹氣將絕左右取飲數升酢酒乃消疾大困一食汁滓猶至三升水患積久藥不復効大漸日正坐呼道人合掌便絕愿以侍疾久轉正員郎出爲晉安太守在郡不事生業前政與百姓交關質錄其兒婦愿遣人於道奪取將還郡立學堂教授郡舊出髯蛇膽可爲藥有遺愿蛇者愿不忍殺放二十里外山中一夜蛇還牀下復送四十里山經宿復歸論者以爲仁心所致海邊有越王石常隱雲霧相傳云清廉太守乃得見愿往就觀視清徹無所隱蔽後琅邪王秀之爲郡與朝士書曰此郡承虞公之後善政猶存遺風易遵差得無事以母老解職除後軍將軍褚彥回嘗詣愿愿不在見其眠牀上積塵埃有書數表彥回歎曰虞君之清至於此令人埽地拂牀而去遷中書郎領東觀祭酒兄季爲上虞令卒愿從省步出還家不得詔便歸東除驍騎將軍遷廷尉祭酒如故愿嘗事宋明帝齊初神主遷汝陰廟愿拜辭流涕建元元年卒愿著五經論問撰會稽記文翰數十篇

王洪軌上谷人也宋太始中魏尅青州洪軌得別駕清河崔祖歡女仍以爲妻祖歡女說洪軌南歸宋桂陽王之難隨齊高帝鎮新亭常以身捍矢高帝曰我自有楯卿可自防答曰天下無洪軌何有哉蒼生方亂豈可一日無公帝甚賞之後爲晉壽太守多昧贓賄爲州所按大懼棄郡奔建邨高帝輔政以爲腹心



建武初爲青冀二州刺史悔爲晉壽時貨賦所敗更勵清節先是青州資魚鹽之貨或疆借百姓麥地以種紅花多與部下交以祈利益洪軌至一皆斷之啟求侵魏得黃郭鹽倉等數戍後遇敗死傷塗地深自咎責乃於謝祿山南除地廣設茵席殺三牲招戰亡者魂祭之人人呼名躬自沃盥仍慟哭不自勝因發病而亡洪軌旣北人而有清正州人呼爲虜父使君言之咸落淚永明中有江夏李珪之字孔璋位尙書右丞兼都水使者歷職稱爲清能後兼少府卒

沈瑀字伯瑜吳興武康人也父昶事宋建平王景素景素謀反昶先去之及敗坐繫獄瑀詣臺陳請得免罪由是知名爲奉朝請嘗詣齊尙書左丞殷瀾瀾與語及政事甚器之謂曰觀卿才幹當居吾此職司徒竟陵王子良聞瑀名引爲府行參軍領揚州部傳從事時建康令沈徽爭恃勢傲瑀瑀以法繩之衆憚其強子良甚相知賞雖家事皆以委瑀子良薨瑀復事刺史始安王遙光嘗使送人丁速而無怨遙光謂同使吏曰爾何不學光瑀所爲乃令瑀專知州獄事湖熟縣方山埭高峻冬月公私行侶以爲艱明帝使瑀行脩之瑀乃開四洪斷行客就作三日便辦揚州書佐私行詐稱州使不肯就作瑀鞭之四十書佐歸訴遙光遙光曰沈瑀必不枉鞭汝覆之果有詐明帝復使瑀築赤山塘所費減材官所量數十萬帝益善之爲建德令教人一丁種十五株桑四株柿及梨栗女子丁半之人咸懼悅頃之成林去官遷都兼行選曹



陳伯之軍至江州會梁武起兵圍郢城瑀說伯之迎武帝伯之泣曰余子在都瑀曰不然人情例皆思改計若不早圖眾散難合伯之遂降初瑀在竟陵王家素與范雲善齊末嘗就雲宿夢坐屋梁柱上仰見天中有字曰范氏宅至是瑀爲帝說之帝曰雲得不死此夢可驗及帝卽位雲深薦瑀自旣陽令擢兼尙書右丞時天下初定陳伯之言瑀催督運輸軍國獲濟帝以爲能遷尙書駕部郎兼右丞如故瑀薦族人沈僧隆僧照有吏幹帝並納之以毋憂去職起爲餘姚令縣大姓虞氏千餘家請謁如市前後令長莫能絕自瑀到非訟訴無所通以法繩之縣南又豪族數百家子弟縱橫遞相庇廕厚自封植百姓甚患之瑀召其老者爲石頭倉監少者補縣僮皆號泣道路自是權右屏跡瑀初至富吏皆鮮衣美服以自彰別瑀怒曰汝等下縣吏何得自擬貴人悉使著芒屨羶布侍立終日足有蹉跌輒加榜捶瑀微時嘗至此鬻瓦器爲富人所辱故因以報焉由是士庶駭怨瑀廉潔自守故得遂行其意後爲安南長史尋陽太守江州刺史曹景宗卒仍爲信威蕭穎達長史太守如故瑀性屈強每忤穎達穎達銜之天監八年因入諮事辭又激厲穎達作色曰朝廷用君作行事邪瑀出謂人曰我死而後已終不能傾側面從是日於路爲人所殺多以穎達害焉子續累訟之遇穎達尋卒事不窮竟續乃布衣蔬食終其身

范述曾字子玄一字穎彥吳郡錢唐人也幼好學從餘杭呂道惠受五經略通章句道惠曰此子必爲王

者師齊文惠太子竟陵文宣王幼時齊高帝引述曾爲之師友起家宋晉熙王國侍郎齊初至南郡王國  
郎中令遷太子步兵校尉帶開陽令述曾爲人蹇諤在官多所諫爭太子雖不能全用然亦弗之罪也竟  
陵王深相器重號爲周舍太子左衛率沈約亦以述曾方汲黯齊明帝卽位爲永嘉太守爲政清平不尙  
威猛眩俗便之所部橫陽縣山谷嶮峻爲逋逃所聚前後二千石討捕莫能息述曾下車開示恩信凡諸  
凶黨穢負而出編戶屬籍者二百餘家自是商旅流通居人安業勵志清白不受饋遺明帝下詔褒美徵  
爲游擊將軍郡送故舊錢二十餘萬一無所受唯得白桐木火籠朴十餘枚而已東昏時拜中散大夫還  
鄉里梁武帝踐阼乃輒行詣闕仍辭還武帝下詔褒美以爲太中大夫述曾生平所得奉祿皆以分施及  
老遂壁立無資以天監八年卒注易文言著雜詩賦數十篇後有吳興巨師施亦廉潔稱罷臨安縣還唯  
有二十籠簿書並是倉庫券帖當時以比述曾位至臺郎

孫謙字長遜東莞莒人也客居歷陽躬耕以養弟妹鄉里稱其敦睦仕宋爲句容令清慎強記縣人號爲  
神明宋明帝以爲巴東建平二郡太守郡居三峽恆以威力鎮之謙將述職敕募千人自隨謙曰蠻夷不  
賓蓋待之失節耳何煩兵役以爲國費固辭不受至郡布恩惠之化蠻獠懷之競餉金寶謙慰諭而遣一  
無所納及掠得生口皆放還家奉秩出吏人者悉原除之郡境翕然威恩大著視事三年徵還爲撫軍中

兵參軍遷越騎校尉征北司馬府主建平王將稱兵患謙強直託事遣使至都然後作亂及建平誅遷左軍將軍齊初爲錢唐令御煩以簡獄無繫囚及去官百姓以謙在職不受餉遺追戴縑帛以送之謙辭不受每去官輒無私宅借空車廡居焉永明初爲江夏太守坐被代輒去郡繫尙方頃之免爲中散大夫明帝將廢立欲引謙爲心膂使兼衛尉給甲仗百人謙不願處際會輒散甲士帝雖不罪而弗復任焉梁天監六年爲零陵太守年已衰老猶強力爲政吏人安之先是郡多猛獸暴謙至絕迹及去官之夜猛獸卽害居人謙爲郡縣常勤勸課農桑務盡地利收入常多於鄰境九年以老徵爲光祿大夫及至帝嘉其清潔甚禮異焉每朝見猶請劇職自効帝笑之曰朕當使卿智不使卿力十四年詔加優秩給親信二十人并給扶謙自少及老歷二縣五郡所在廉潔居身儉素牀施蓬蔭屏風冬則布被莞席夏日無幃帳而夜臥未嘗有蚊蚋人多異焉年逾九十強壯如五六十者每朝會輒先衆到公門力於仁義行己過人甚遠從兄靈慶嘗病寄謙謙行出還問起居靈慶曰向飲冷熱不調卽時猶渴謙退遣其妻有彭城劉融行乞疾篤無所歸友人輿送謙舍謙開聽事以受之及融死以禮殯葬衆咸服其行義末年頭生二肉角各長一寸十五年卒官時年九十二臨終遺命諸子曰吾少無人間意故自不求聞達而仕歷三代官成兩朝如我資名或蒙贈諡自公體耳氣絕卽以幅巾就葬每存儉率比見輻車過精非吾志也士安束以遷蔭

王孫保入后地雖是匹夫之節取於人情未允今使棺足周身曠足容柩旒書爵里無曰不然旒表命數  
差可停息直儼輜牀裝之以廢以常所乘者爲魂車他無所用第一子貞巧乃織細麗裝輜以篋爲輪佩  
雖素而華帝爲舉哀甚悼惜之

從子廉字思約父奉伯位少府卿淮南太守廉便辟巧宦齊時已歷大縣尙書右丞天監初沈約范雲當  
朝用事廉傾意奉之及中書舍人黃睦之等亦尤所結附凡貴要每食廉必日進滋旨皆手自煎調不辭  
勤劇遂得爲列卿御史中丞晉陵吳興太守廣陵高爽有險薄才客於廉廉委以文記爽嘗有求不遂乃  
爲屐謎以喻廉曰刺鼻不知嚏踢面不知噴齧齒作步數持此得勝人譏其不計恥辱以此取名位然處  
官平直遂以善政稱武帝嘗曰東莞二孫謙廉而已

何遠字義方東海鄞人也父慧炬齊尙書郎遠仕齊爲奉朝請豫崔慧景敗亡事抵尙書令蕭懿懿深保  
匿焉會赦出噴之懿遭難子弟皆潛伏遠求得懿弟融藏之旣而發覺遠踰垣以免融遇禍遠家屬繫尙  
方遠遂亡度江因降魏入壽陽見刺史王肅求迎梁武帝肅遣兵援送武帝見遠謂張弘策曰何遠丈夫  
而能破家報舊德未易人也武帝踐阼以奉迎勳封廣興男爲後軍鄱陽王恢錄事參軍遠與恢素善在  
府盡其志力知無不爲恢亦推心仗之恩寄甚密遷武昌太守遠本儻尙輕俠至是乃折節爲吏杜絕

交游饋遺秋毫無所受武昌俗皆汲江水盛夏遠患水溫每以錢買人井寒水不取錢者則擲水還之其  
他事率多如此跡雖似僞而能委曲用意車服尤弊素器物無銅漆江左水族甚賤遠每食不過乾魚數  
片而已然性剛嚴吏人多以細事受鞭罰遂爲人所訟徵下廷尉被劾十數條當時士大夫坐法皆不受  
測遠度已無贓就測立三七日不款猶以私藏禁仗除名後爲武康令愈厲廉節除淫祀正身率職人甚  
稱之太守王彬巡屬縣諸皆盛供帳以待焉至武康遠獨設糗水而已彬去遠送至境進斗酒隻鵝而別  
彬戲曰卿禮有過陸納將不爲古人所笑乎武帝聞其能擢爲宣城太守自縣爲近畿大郡近代未之有  
也郡經寇抄遠盡心綏理復著名迹暮年遷樹功將軍始興內史時泉陵侯朗爲桂州緣道多剽掠入始  
興界草木無所犯遠在官好開途巷修葺牆屋人居市里城隍廐庫所過若營家焉田秩奉錢並無所取  
歲暮擇人尤窮者充其租調以此爲常然其聽訟猶人也不能過絕而性果斷人畏而惜之所至皆生爲  
立祠表言政狀帝每優詔答焉後歷給事黃門侍郎信武將軍監吳郡在吳頗有酒失遷東陽太守遠處  
職疾強富如仇歸視貧細如子弟特爲豪右所畏憚在東陽歲餘復爲受罰者所謗坐免歸遠性耿介無  
私曲居人聞絕請謁不造詣與貴賤書疏抗禮如一其所會遇未嘗以顏色下人是以多爲俗士所疾惡  
其清公實爲天下第一居數郡見可欲終不變其心妻子飢寒如下貧者及去東陽歸家經年歲口不言



榮辱士類益以此多之其輕財好義周人之急言不虛妄蓋天性也每戲語人云卿能得我一妄語則謝卿以一嫌衆共伺之不能記也後爲征西諮議參軍中撫軍司馬卒

郭祖深襄陽人也梁武帝初起以客從後隨蔡道恭在司州陷北還上書言境上事不見用選爲長兼南梁郡丞徙後軍行參軍帝溺情內教朝政縱弛祖深輿櫬詣闕上封事其略曰大梁應運功高百王慈悲旣弘憲律如替愚輩罔識褻慢斯作各競奢侈貪穢遂生頗由陛下寵勳太過馭下太寬故廉潔者自進無途貪苛者取人多徑直弦者淪溺溝壑曲鉤者升進重膏飾口利辭競相推薦訥直守信坐見埋沒勞深勳厚祿賞未均無功側入反加寵擢昔宋人賣酒犬惡致酸陛下之犬其甚矣哉臣聞人爲國本食爲人命故禮曰國無六年之儲謂非其國也推此而言農爲急務而郡縣苛暴不加勸獎本年豐歲稔猶人有饑色設遇水旱何以救之陛下昔歲尙學置立五館行吟坐詠誦聲溢境比來慕法普天信向家家齋戒人人懺禮不務農桑空談彼岸夫農桑者今日濟育功德者將來勝因豈可墮本勤末置邇効賒也今商旅轉繁游食轉衆耕夫日少杼軸日空陛下若廣興屯田賤金貴粟勤農桑者擢以階級惰耕織者告以明刑如此數年則家給人足廉讓可生夫君子小人智計不同君子志於道小人謀於利志於道者安國濟人志於利者損物圖己道人者害國小人也忠良者捍國君子也臣見疾者詣道士則勸齋章僧尼



則令齋講俗師則鬼禍須解鑿諺則湯熨散丸皆先自爲也臣謂爲國之本與療病相類療病當去巫鬼  
尋華扁爲國當黜佞邪用管晏今之所任腹背之毛耳論外則有勉捨說內則有雲旻雲旻所議則傷俗  
盛法勉捨之志唯願安枕江東主慈臣惟息謀外甸使中國士女南望懷寃若賈誼重生豈不慟哭臣今  
直言犯顏罪或容宥而乖忤貴臣則禍在不測所以不憚鼎鑊區區必聞者正以社稷計重而螻蟻命輕  
使臣言入身滅臣何所恨夫謀臣良將何代無之貴在見知要在用耳陛下皇基兆運二十餘載臣子之  
節諫爭是誰執事皆同而不和答問唯唯而已入對則言聖旨神衷出論則云誰敢逆耳過實在下而謫  
見於上遂使聖皇降誠躬自引咎宰輔晏然曾無謙退且百僚卿士鈔有奉公尸祿競利不尙廉潔累金  
積緡侍列如仙不田不商何故而爾法者人之父母惠者人之仇讐法嚴則人思善德多則物生惡惡不  
可長欲不可縱伏願去貪濁進廉平明法令嚴刑罰禁奢侈薄賦斂則天下幸甚謹上封事二十九條伏  
願抑獨斷之明少察愚瞽時帝大弘釋典將以易俗故祖深尤言其事條以爲都下佛寺五百餘所窮極  
宅麗僧尼十餘萬資產豐沃所在郡縣不可勝言道人又有白徒尼則皆畜養女皆不貫人籍天下戶口  
幾亡其半而僧尼多非法養女皆服羅紈其蠹俗傷法抑由於此請精加檢括若無道行四十已下皆使  
還俗附農罷白徒養女聽畜奴婢唯著青布衣僧尼皆令蔬食如此則法興俗盛國富人殷不然恐方

來處處成寺家家剝落尺土一人非復國有朝廷擢用勳舊爲三陲州郡不顧御人之道唯以貪殘爲務  
迫脅良善害甚豺狼江湖人尤受其弊自三關以外是處遭毒而此勳人投化之始但有一身及被任用  
皆募部曲而揚徐之人逼以衆投多役其募利其貨財皆虛名上簿止送出三津名在遠役身歸鄉里又  
懼本屬檢問於是逃亡他境僑戶之興良由此故又梁興以來發人征役號爲三五及投募將客主將無  
恩存卹失理多有物故輒刺叛亡或有身殞戰場而名在叛目監符下討稱爲逋叛錄質家丁合家又叛  
則取同籍同籍又叛則取比伍比伍又叛則望村而取一人有犯則合村皆空雖肆眚時降蕩滌惟始而  
盤符猶下舊日限以嚴程上下任信下轉相督促臺使到州州又遣押使至郡州郡競急切同趣下城令  
宰多庸才望風畏伏於是斂戶課薦其篋篋使人納重貨許立空文其百里微欲矯俗則嚴科立至自是  
所在恣意貪利以事上官又請斷界首將生口入北及關津廢替須加糺擿又言廬陵年少不宜鎮襄陽  
左僕射王暕在喪被起爲吳郡曾無辭讓其言深刻又請復郊四星帝雖不能悉用然嘉其正直擢爲豫  
章鍾陵令員外散騎常侍普通七年改南州津爲南津校尉以祖深爲之加雲騎將軍秩二千石使募部  
曲二千及至南州公嚴清刻由來王侯勢家出入津不忌憲綱依藏亡命祖深搜檢姦惡不避強禦動致  
刑辟奏江州刺史邵陵王太子詹事周捨贓罪遠近側足莫敢縱恣淮南太守畏之如上府常服故布襦

素木案食不致一肉有姥餉一旱青瓜祖深報以疋帛後有富人効之以貨鞭而猶衆朝野憚之絕於干請所領皆精兵令行禁止有所討遂越境追禽江中嘗有賊祖深自率討之列陣未敢進仍令所親人先登不時追斬之遂大破賊威振遠近長江肅清

論曰善政之於人猶良工之於埴也用功寬而成器多焉漢世戶口殷盛刑務簡闊郡縣之職外無橫擾勸賞威刑事多專斷尺一詔書希經邦邑吏居官者或長子孫皆敷德政以盡人和興義讓以存簡久故龔黃之化易以有成降及晚代情僞繁起人滅昔時務殷前世立績垂風難易百倍若以上古之化御此世之人今吏之良撫前代之俗則武城弦歌將有未暇淮陽臥鎮如或可勉未必今才陋古蓋化有醇薄者也

南史卷七十

南史卷七十考證

循吏傳敘彫樂綺節珠窗網戶○樂監本訛奕一本作奕今从南本

杜驥傳年十三父使候同郡韋華○韋監本訛世今从閣本改

杜慧慶傳慧慶悉出宗族私財以充勸賞○出監本訛爲今改正

傅琰傳久之復除始新令○始監本訛如今改从南本

虞愿傳帝尤好逐夷以銀鉢盛蜜漬之食數鉢○逐夷鯨魚腸胃之別名也

沈瑀傳司徒竟陵王子良聞瑀名引爲府行參軍領揚州部傳從事○閣本無傳字

郭祖深傳僧尼十餘萬資產豐沃○監本缺僧字今增入

南史卷七十考證



唐

李

延

壽

撰

列傳第六十一

儒林

伏曼容

子瞻子挺

何佟之

嚴植之

司馬筠

卞華

崔靈恩

孔僉

盧廣

沈峻

太史叔明峻子文阿

孔子祛

皇侃

沈洙

戚褒

鄭灼

張崖賀德基

陸羽

沈德威

全緩

張譏

顧越

龔孟舒

沈不害

王元規

陸慶

蓋今之儒者本因古之大學以弘風正俗斯則王政之所先也自秦氏坑焚其道用缺及漢武帝時開設學校立五經博士置弟子員射策設科勸以官祿傳業者故益眾矣其後大學生徒動至萬數郡國饗舍悉皆充滿其學於山澤者或就而為列肆焉故自兩漢登賢咸資經術洎魏正始以後更尚玄虛公卿士庶罕通經業時荀顛摯虞之徒雖議創制未有能易俗移風者也自是中原橫潰衣冠道盡逮江左草創日不暇給以迄宋齊國學時或開置而勸課未博建之不能十年蓋取文具而已是時鄉里莫或開館公卿罕通經術朝廷大儒獨學而弗肯養眾後生孤陋擁經而無所講習大道之鬱也久矣乎至梁武創業

深愍其弊天監四年乃詔開五館建立國學總以五經教授置五經博士各一人於是以平原明山賓吳郡陸璣吳興沈峻建平嚴植之會稽賀瑒補博士各主一館館有數百生給其餼廩其射策通明經者卽除爲吏於是懷經負笈者雲會矣又選學生遣就會稽雲門山受業於廬江何胤分遣博士祭酒到州郡立學七年又詔皇太子宗室王侯始就學受業武帝親屈輿駕釋奠於先師先聖申之以讌語勞之以束帛濟濟焉洋洋焉大道之行也如是及陳武創業時經喪亂衣冠殄瘁寇賊未寧敦獎之方所未遑也天嘉以後稍置學官雖博延生徒成業蓋寡其所采綴蓋亦梁之遺儒今並集之以備儒林云

伏曼容字公儀平昌安丘人晉著作郎滔之曾孫也父胤之宋司空主簿曼容早孤與母兄客居南海少篤學善老易倜儻好大言常云何晏疑易中九事以吾觀之晏了不學也故知平叔有所短聚徒教授以自業爲驃騎行參軍宋明帝好周易常集朝臣於清暑殿講詔曼容執經曼容素美風采明帝恆以方穉叔夜使吳人陸探微畫叔夜像以賜之爲尙書外兵郎嘗與袁粲罷朝用會言玄理時論以爲一臺二絕昇明末爲輔國長史南海太守至石門作食泉銘齊建元中上書勸封禪高帝以爲其禮難備不從仕爲太子率更令侍皇太子講衛將軍王儉深相愛好令與河內司馬憲吳郡陸澄共撰喪服及竟又欲與定禮樂會儉薨建武中拜中散大夫時明帝不重儒術曼容宅在瓦官寺東施高坐於聽事有賓客輒升高

坐爲講說生徒常數十百人梁臺建召拜司徒司馬出爲臨海太守天監元年卒官年八十二曼容多伎術善音律射馭風角醫筭莫不閑了爲周易毛詩喪服集解老莊論語義子暉

暉字玄曜幼傳父業能言玄理與樂安任昉彭城劉曼俱知名仕齊位東陽郡丞鄒令時曼容已致仕故類以外職處暉令得養焉梁武帝踐阼兼五經博士與吏部尚書徐勉中書侍郎周捨總知五禮事出爲永陽內史在郡清潔政務安靜郡人何貞秀等一百五十四人詣州言狀湘州刺史以聞詔勘有十五事爲吏人所懷帝善之徙新安太守在郡清恪如永陽時人賦稅不登者輒以太守田米助之郡多麻苧家人乃至無以爲繩其厲志如此屬縣始新遂安海寧並同時生爲立祠徵爲國子博士領長水校尉時始興內史何遠累著清績武帝擢爲黃門侍郎俄遷信武將軍監吳郡事暉自以名輩素在遠前爲吏俱稱廉白遠累見擢暉循階而已意望不滿多託疾居家尋求假到東陽迎妹喪因留會稽築宅自表解職詔以爲豫章內史乃出拜書侍御史虞瞻奏曰風聞豫章內史伏暉去歲啟假以迎妹喪爲辭因停會稽不去入東之始貨宅賣車以此而推則是本無還意暉歷典二邦少免貪濁此自爲政之本豈得稱功常謂人才品望居何遠之右而遠以清見擢在位轉隆暉深懷誹怨形於辭色天高聽卑無私不照去年十二月二十一日下詔曰國子博士領長水校尉伏暉爲政廉平宜加將養勿使憲望致虧士風可豫章內史

豈有人臣奉如此之詔而不亡魂破膽歸罪有司而冒寵不辭者斯苟得故以士流解體行路沸騰辨跡  
求心無一可恕請以暉大不敬論有詔勿論暉遂得就郡徵爲給事黃門侍郎  
父曼容與樂安任遙皆昵於齊太尉王儉遙子昉及暉並見知頃之昉才遇稍感  
暉獨滯於參軍事及終名位略相侔性儉素車服纓惡外雖退靜內不免心競故見譏於時然能推薦  
後來常若不及少年士子或以此依之子挺

挺字士標幼敏悟七歲通孝經論語及長博學有才思爲五言詩善効謝康樂體父友樂安任昉深相歎  
異常曰此子日下無雙齊末州舉秀才策爲當時第一梁武帝師至挺迎謁於新林帝見之甚悅謂之顏  
子引爲征東行參軍時年十八天監初除中軍參軍事居宅在潮溝於宅講論語聽者傾朝挺三世同時  
聚徒教授罕有其比累爲晉陵武康令罷縣還仍於東郊築室不復仕挺少有盛名又善處當世朝中勢  
素多與交游故不能久事隱靜後遂出仕除南臺書侍御史因事納賄被劾懼罪乃變服出家名僧挺久  
之藏匿後遇赦乃出大心寺會邵陵王爲江州攜挺之鎮王好文義深被恩禮挺不堪疏素因此還俗侯  
景亂中卒著邈說十卷文集二十卷子知命以其父宦途不進怨朝廷後遂盡心侯景襲郢州圍巴陵軍  
中書檄皆其文也言及西臺莫不劇筆及景篡位爲中書舍人權傾內外景敗被送江陵於獄幽死挺弟

擢亦有才名爲邵陵王記室參軍

何佟之字士威廬江潯人晉豫州刺史憚大世孫也祖礪之宋員外散騎常侍父歆齊奉朝請佟之少好三禮師心獨學強力專精手不輟卷讀禮論三百餘篇略皆上口太尉王儉雅相推重起家揚州從事仍爲總明館學士仕齊初爲國子助教爲諸王講喪服結草爲經屈手巾爲冠諸生有未曉者委曲誘誨都下稱其高儒建武中爲鎮北記室參軍侍皇太子講時步兵校尉劉瓛徵士吳苞皆已卒都下碩儒唯佟之而已當時國家吉凶禮則皆取決焉後爲驃騎司馬永元末都下兵亂佟之常集諸生講論孜孜不怠性好絮一日之中洗滌者十餘遍猶恨不足時人稱爲水淫有至性父母亡後常設一屋晦朔拜伏流涕如此者二十餘年當世服其孝行於時又有遂安令劉澄爲性彌絮在縣埽拂郭邑路無橫草水窮蟲穢百姓不堪命坐免官然甚真正善醫術與徐嗣伯埒名子聰能世其家業佟之自東昏卽位以其兇虐乃謝病終身不涉其流梁武帝踐阼以爲尙書左丞時百度草創佟之依禮定議多所裨益天監二年卒官故事左丞無贈官者帝特詔贈黃門侍郎儒者榮之所著文章禮議百許篇子朝隱朝晦

嚴植之字孝源建平穉歸人也少善莊老能立言精解喪服孝經論語及長徧習鄭氏禮周易毛詩左氏春秋性淳孝謹厚不以所長高人少遭父憂因菜食二十三載仕齊爲廣漢王國右常侍仍侍王讀及王



誅國人莫敢視植之獨奔哭手營殯斂徒跣送喪墓所爲起家葬畢乃還當時義之後爲康樂令植之在縣清白人吏稱之梁天監二年詔求通儒脩五禮有司奏植之主凶禮四年初置五經博士各開館教授以植之兼五經博士植之館在潮溝生徒常百數講說有區段次第析理分明每當登講五館生畢至聽者千餘人遷中撫記室參軍猶兼博士卒於館植之自疾後便不受廩奉妻子困乏及卒喪無所寄生徒爲市宅乃得成喪植之性慈仁好行陰德在閭室未嘗怠也少嘗山行見一患者問其姓名不能答載與俱歸爲營醫藥六日而死爲棺斂殯之卒不知何許人也又嘗緣柵塘行見患人臥塘側問之云姓黃家本荊州爲人傭賃疾篤船主將發棄之於岸植之惻然載還療之經年而愈請終身充奴僕以報厚恩植之不受遣以資糧遣之所撰凶禮儀注四百七十九卷

司馬筠字貞素河內溫人也晉譙王承七代孫祖亮宋司空從事中郎父端字敬文齊奉朝請始安王遙光使掌文記遙光之敗曹武入城見之端曰身蒙始安厚恩君宜見殺武叱令速去答曰死生命也君見事不捷便以義師爲賊武捨之去尋兵至見殺筠少孤貧好學師沛國劉瓛強力專精深爲瓛所器及長博通經術尤明三禮梁天監初爲旣陽令有清績入拜尙書祠部郎七年安成國太妃陳氏薨江州刺史安成王秀荊州刺史始興王憺並以慈母表解職詔不許還攝本任而太妃在都喪祭無主中書舍人周



捨議曰賀彥先稱慈母之子不服慈母之黨婦又不從夫而服慈姑小功服無從故也庾蔚之云非徒子不從母而服其黨孫又不從父而服其慈母由斯而言慈祖母無服明矣尋門內之哀不容自同於常案父之祥禫子並受弔今二王諸子宜以成服日單衣一日爲位受弔制曰二王在遠世子宜攝祭事捨又曰禮云縞冠玄武子姓之冠則世子衣服宜異於常可著細布衣絹爲領帶三年不聽樂又禮及春秋庶母不世祭蓋謂無王命者耳吳太妃既朝命所加得用安成禮秩則當祔廟五世親盡乃毀陳太妃命數之重雖則不異慈孫既不從服廟食理無傳祀子祭孫止是會經文武帝由是敕禮官議皇子慈母之服筭議宋朝五服制皇子服訓養母禮依庶母慈已宜從小功之制案曾子問云子游曰喪慈母禮歟孔子曰非禮也古者男子外有傅內有慈母君命所使教子也何服之有鄭玄注云此指謂國君之子也若國君之子不服則王者之子不服可知又喪服經云君子子爲庶母慈已者傳曰君子子者貴人子也鄭玄引內則三母止施於卿大夫以此而推則慈母之服上不在五等之嗣下不逮三士之息儻其服者止卿大夫尋諸侯之子尚無此服況乃施之皇子謂宜依禮刊除以反前代之惑武帝以爲不然曰禮言慈母凡有三條一則妾子之無母使妾之無子者養之命爲母子服以三年喪服齊衰章所言慈母如母是也二則嫡妻之子無母使妾養之慈撫隆至雖均乎慈愛但嫡妻之子妾無爲母之義而恩深事重故服以

小功喪服小功章所以不直言慈母而云庶母慈已者明異於三年之慈母也其三則子非無母正是擇  
賤者視之義同師保而不無慈愛故亦有慈母之名師保既無其服則此慈亦無服矣內則云擇於諸母  
與可者使爲子師其次爲慈母次爲保母此其明文擇諸母是擇人而爲此三母非謂擇取兄弟之母  
也何以知之若是兄弟之母其先有子者則是長妾長妾之禮寔有殊加何容次妾生子乃退成保母斯  
不可也又有多兄弟之人於義或可若始生之子便應三母俱闕邪由是推之內則所言諸母是謂三母  
非兄弟之母明矣子游所問自是師保之慈非三年小功之慈也故夫子得有此對豈非師保之慈母無  
服之證乎鄭玄不辯三慈混爲訓釋引彼無服以注慈已後人致謬實此之由經言君子子者此雖起於  
大夫明大夫猶爾自斯以上彌應不異故傳云君子子者貴人之子也總言曰貴無所不包經傳互文交  
相顯發則知慈加之義通乎大夫以上矣宋代此科不乖禮意便加除削良是所疑於是筠等請依制改  
定嫡妻之子母沒爲父妾所養服之五月貴賤並同以爲永制後爲尙書左丞卒於始興內史子壽傳父  
業明三禮位尙書祠部郎曲阿令

卞華字昭岳濟陰宛句人晉驃騎將軍靈六世孫也父倫之齊給事中華幼孤貧好學年十四召補國子  
生通周易及長徧習五經與平原明山賓會稽賀瑒同業友善梁天監中爲安成王功曹參軍兼五經博

士異徒教授華博涉有機辯說經析理爲當時之冠江左以來鍾律絕學至華乃通焉位尙書儀曹郎吳令卒

崔靈恩清河東武城人也少篤學徧習五經尤精三禮三傳仕魏爲太常博士天監十三年歸梁累遷步兵校尉兼國子博士靈恩聚徒講授聽者常數百人性拙朴無風采及解析經理甚有精致都下舊儒咸稱重之助教孔奐尤好其學靈恩先習左傳服解不爲江東所行乃改說杜義每文句常申服以難杜遂著左氏條義以明之時助教虞僧誕又精杜學因作申杜難服以答靈恩世並傳焉僧誕會稽餘姚人以左氏教授聽者亦數百人該通義例當世莫及先是儒者論天互執渾蓋二義論蓋不合渾論渾不合蓋靈恩立義以渾蓋爲一焉出爲長沙內史遷除國子博士講衆尤盛又出爲桂州刺史卒官靈恩集注毛詩二十二卷集注周禮四十卷制三禮義宗三十卷左氏經傳義二十二卷左氏條例十卷公羊穀梁文句義十卷

孔奐會稽山陰人少師事何膺通五經尤明三禮孝經論語講說並數十篇生徒亦數百人三爲五經博士後爲海鹽山陰二縣令奐儒者不長政術在縣無績太清亂卒於家子淑玄願涉文學官至太學博士奐兄子元素又善三禮有盛名早卒

盧廣范陽涿人自云晉司空從事中郎諶之後也少明經有經術天監中歸梁位步兵校尉兼國子博士  
徧講五經時北來人儒學者有崔靈恩孫詳蔣顯並聚徒講說而音辭鄙拙唯廣言論清雅不類北人僕  
射徐勉兼通經術深相賞好後爲尋陽太守武陵王長史卒官

沈峻字士嵩吳興武康人也家世農夫至峻好學與舅太史叔明師事宗人沈麟士在門下積年晝夜自  
課睡則以杖自擊其篤志如此遂博通五經尤長三禮爲兼國子助教時吏部郎陸倕與僕射徐勉書薦  
峻曰凡聖賢所講之書必以周官立義則周官一書實爲羣經源本此學不傳多歷年世北人孫詳蔣顯  
亦經聽習而音革楚夏故學徒不至唯助教沈峻特精此書比日時開講肆羣儒劉崑沈宏沈熊之徒並  
執經下坐北面受業莫不歎服人無間言弟謂宜卽用此人令其專此一學周而復始使聖人正典廢而  
更興勉從之奏峻兼五經博士於館講授聽者常數百人及中書舍人賀琛奉敕撰梁官乃啟峻及孔子  
祛補西省學士助撰錄書成入兼中書通事舍人出爲武康令卒官傳峻業者又有吳郡張及會稽孔子  
雲官皆至五經博士尙書祠部郎太史叔明吳興烏程人吳太史慈後也少善莊老兼通孝經論語禮記  
尤精三玄每講說聽者常五百餘人爲國子助教邵陵王綸好其學及出爲江州攜叔明之鎮王遷郢州  
又隨府所至輒講授故江州人士皆傳其學峻子文阿

文阿字國衛性剛強有旅力少習父業研精章句祖舅太史叔明舅王慧興並通經術而文阿頗傳之又博采先儒異同自爲義疏通三禮三傳位五經博士梁簡文引爲東宮學士及撰長春義記多使文阿提異聞以廢之及侯景寇逆簡文別遣文阿募士卒援都臺城陷與張暕保吳興暕敗文阿竄於山野景素聞其名求之甚急文阿窮迫登樹自縊遇有所親救之自投而下折其左臂及景平陳武帝以文阿州里表爲原鄉令監江陰郡紹泰元年入爲國子博士尋領步兵校尉兼掌儀禮自太清之亂臺閣故事無有在者文阿父峻梁武時常掌朝儀頗有遺藁於是斟酌裁撰禮度皆自之出及陳武帝受禪文阿輒棄官還武康帝大怒發使往誅之時文阿宗人沈恪爲郡請使者寬其死卽面縛鎖頸致於上前上視而笑之曰腐儒復何爲者遂赦之武帝崩文阿與尚書左丞徐陵中書舍人劉師知等議大行皇帝靈座依御父親之制語在師知傳及文帝卽位尅日謁廟尙書左丞庾持奏詔遣博士議其禮文阿議曰人物推移質文殊軌聖賢因機而立教王公隨時以適宜夫千人無君不敗則亂萬乘無主不危則亡當隆周之日公且叔父呂召爪牙成王在喪禍幾覆國是以旣葬便有公冠之儀始殯受麻冕之策斯蓋示天下以有主慮社稷之艱難逮乎末葉從橫漢承其弊雖文景刑厝而七國連兵或踰月卽尊或崩日稱詔此皆有爲而爲之非無心於禮制也今國諱之日雖抑哀於璽紱之重猶未序於君臣之儀古禮朝廟退坐正寢聽



羣臣之政今皇帝拜廟還宜御太極前殿以正南面之尊此卽周康在朝一二臣衛者也其壤奠之節周禮以玉作贄公侯以珪子男執璧此玉作瑞也莫贄竟又復致享天子以璧王后用琮秦燒經典威儀散滅叔孫通定禮尤失前憲莫贄不珪致享無帛公王同璧鴻臚奏賀若此數事未聞於古後相沿襲至梁行之夫稱觴奉壽家國大慶四廂雅樂歌奏懽欣今君臣吞哀兆庶抑割豈同於惟新之禮乎且周康賓稱奉珪無萬壽之獻此則前準明矣愚以今坐正殿止行薦璧之儀無賀酒之禮謹撰謁廟還升正寢羣臣陪薦儀注如別詔可施行尋遷通直散騎常侍兼國子博士領羽林監仍令於東宮講孝經論語天嘉中卒贈廷尉卿所撰儀禮八十餘條春秋禮記孝經論語義記七十餘卷經典大義十八卷並行於時儒者多傳其學

孔子祛會稽山陰人也少孤貧好學耕耘樵採常懷書自隨役閑則誦讀勤苦自勵遂通經術尤明古文尚書爲兼國子助教講尚書四十篇聽者常數百人爲西省學士助賀琛撰錄書成兼司文侍郎不就累遷兼中書通事舍人加步兵校尉梁武帝撰五經講疏及孔子正言專使子祛檢閱羣書以爲義證事寬敕子祛與右衛朱昇左丞賀琛於士林館遞日執經後加通直正員郎卒官子祛凡著尚書義二十卷集注尚書二十卷續朱昇集注周易一百卷續何承天集禮論一百五十卷



皇侃吳郡人青州刺史皇象九世孫也少好學師事賀瑒精力專門盡通其業尤明三禮孝經論語爲兼國子助教於學講說聽者常數百人撰禮記講疏五十卷書成奏上詔付祕閣頃之召入壽光殿說禮記義梁武帝善之加員外散騎侍郎侃性至孝常日限誦孝經二十遍以擬觀世音經丁母憂還鄉里平西邵陵王欽其學厚禮迎之及至因感心疾卒所撰論語義禮記義見重於世學者傳焉

沈洙字弘道吳興武康人也祖休季梁餘杭令父山卿梁國子博士中散大夫洙少方雅好學不妄交游通三禮春秋左氏傳精識強記五經章句諸子史書問無不答仕梁爲尚書祠部郎時年蓋二十餘大同中學者多涉獵文史不爲章句而洙獨積思經術吳郡朱异會稽賀琛甚嘉之及异琛於士林館講制旨義常使洙爲都講侯景之亂洙竄於臨安時陳文帝在焉親就習業及陳武帝入輔除國子博士與沈文阿同掌儀禮武帝受禪加員外散騎常侍位揚州別駕從事史大匠卿有司奏建康令沈孝軌門生陳三鬼牒稱主人翁靈柩在周主人奉使關右因欲迎喪久而未反此月晦卽是再周主人弟息見在此者爲至月末除靈內外卽吉爲待主人還情禮申竟以事諮左丞江德藻德藻議謂王衛軍云久喪不葬唯主人不變其餘親各終月數而除此蓋引禮文論在家內有事故未得葬者耳孝軌旣在異域雖已迎喪還期無指諸弟若遂不除永絕昏嫁此於人情或未爲允中原淪陷以後理有事例宜諮沈常侍詳議洙議

曰禮有變正又有從宜禮小記云久而不葬者唯主喪者不除其餘以麻終月數者除喪則已注云其餘謂傍親如鄭所解衆子皆應不除王衛軍所引此蓋禮之正也但魏氏東關之役既失亡屍柩葬禮無期時議以爲禮無終身之喪故制使除服晉氏喪亂或死於虜庭無由迎殯江左故復申明其制李膺之祖王華之父並存亡不測其子制服依時釋衰此並變禮之宜也孝軌雖因奉使便欲迎喪而還期未尅宜依東關故事在此者並應釋除衰麻毀靈祔祭若喪柩得還別行改葬之禮自天下寇亂西朝傾覆若此之徒諒非一二寧可喪期無數而弗除衰服朝廷自應爲之限制以義斷恩德藻依洙議奏可文帝卽位累遷光祿卿侍東宮讀廢帝嗣位歷尙書左丞衡陽王長史行府國事梁代舊律測囚之法日一上起自晡鼓盡於二更及比部郎范泉刪定律令以舊法測立時久非人所堪分其刻數日再上廷尉以爲新制過輕請集八座丞郎并祭酒孔奐行事沈洙五舍人會尙書省詳議時宣帝錄尙書集衆議之都官尙書周弘正議曰凡小大之獄必應以情政言依準五聽驗其虛實豈可令恣考掠以判刑罪且測人時節本非古制近代以來方有此法起自晡鼓迄於二更豈是常人所能堪忍所以重械之下危墮之上無人不服誣枉者多朝晚二時同等刻數進退而求于事爲衷若謂小促前期數致實罪不服如復時節延長則無愆妄歎且人之所堪既有強弱人之立意固亦多途至如質高榜笞刺熱身無完膚戴就熏針並極困

篇不移豈關時刻長短據測優劣夫與殺不辜盜失不經罪疑惟輕功疑惟重斯則古之聖王垂此明法  
愚謂依范泉著制爲允洙議曰夜中測立緩急易欺兼用晝漏於事爲允但漏刻賒促今古不同漢書律  
厯何承天祖冲之祖暅父子漏經並自關鼓至下鼓自晡鼓至關鼓皆十三刻冬夏四時不異若其日有  
長短分在中時前後今用梁末改漏下鼓之後分其短長夏至之日各十七刻冬至之日各十二刻廷尉  
今牒以時刻短促致罪人不款愚意願去夜測之昧從晝漏之明斟酌今古之閱參會二漏之義捨秋冬  
之少刻從夏日之長暑不問寒暑並依今之夏至朝夕上測各十七刻比之古漏則一上多昔四刻卽用  
今漏則冬至多五刻雖冬至之時數刻侵夜正是少日於事非疑庶罪人不以漏短而爲捍獄囚無以在  
夜而致誣求之鄙意竊謂爲宜依范泉前制宣帝曰沈長史議得中宜更博議左丞宗元饒議曰沈議非  
頓異范正是欲使四時均其刻數寫還刪定曹詳改前制宣帝依事施行洙以太建元年卒

威靈字公文吳郡鹽官人也少聰慧游學都下受三禮於國子助教劉文紹一二年中大義略舉年十九  
梁武帝敕策孔子正言并周禮禮記義褒對高第除揚州祭酒從事史就國子博士宋懷方質儀禮義懷  
方北人自魏攜儀禮禮記疏祕惜不傳及將亡謂家人曰吾死後戚生若赴便以儀禮禮記義本付之若  
其不來卽隨屍而殯爲儒者推許如此尋兼太學博士簡文在東宮召褒講論又嘗置宴集玄儒之士先

命道學互相質難次令中庶子徐摛馳騁大義間以劇談摛辭辯從橫難以答抗諸儒懾氣時褒說朝聘義摛與往復褒精采自若領答如流簡文深加歎賞敬帝立爲江州長史仍隨沈泰鎮南豫州泰之奔齊適襄俱行後自齊逃還又隨程文季於呂梁軍敗入周久之得歸卒於始興王府錄事參軍褒於梁代撰三禮義記逢亂亡失禮記義四十卷行於世

鄭灼字茂昭東陽信安人也幼聰敏勵志儒學少受業於皇侃梁簡文在東宮雅愛經術引灼爲西省義學士承聖中爲兼中書通事舍人仕陳武帝文帝時累遷中散大夫後兼國子博士未拜卒灼性精勤尤明三禮少時嘗夢與皇侃遇於途侃謂曰鄭郎開口侃因唾灼口中自後義理益進灼家貧抄義疏以日繼夜筆毫盡每削用之常蔬食講授多苦心熱若瓜時輒偃臥以瓜鎮心起便讀誦其篤志如此時有晉陵張盛吳郡陸詡吳興沈德威會稽賀德基俱以禮學自命張崖傳三禮於同郡劉文紹天嘉元年爲尙書儀曹郎廣沈文阿儀注撰五禮後爲國子博士陸詡少習崔靈恩三禮義梁時百濟國表求講禮博士詔令翻行天嘉中位尙書祠部郎沈德威字懷遠少有操行梁太清末遁於天目山築室以居雖處亂離而篤學無倦天嘉元年徵出都後爲國子助教每自學還私室講授道俗受業數百人率常如此遷太常丞兼五禮學士後爲尙書祠部郎陳亡入隋官至秦王府主簿卒年五十五賀德基字承業世傳禮學祖

文發父淹仕梁俱爲祠部郎並有名當世德基少游學都下積年不歸衣資罄乏又恥服故弊盛冬止衣  
襖襦袴嘗於白馬寺前逢一婦人容服甚盛呼德基入寺門脫白綸巾以贈之仍謂曰君方爲重器不久  
貧寒故以此相遺耳問姓名不答而去德基於禮記稱爲精明位尙書祠部郎雖不至大官而三世儒學  
俱爲祠部郎時論美其不墜

全緩字弘立吳郡錢唐人也幼受易於博士褚仲都篤志研斲得其精微陳太建中位鎮南始興王府諮  
議參軍緩通周易老莊時人言玄者咸推之

張譏字直言清河武城人也祖僧寶梁太子洗馬父仲悅梁尙書祠部郎譏幼聰俊有思理年十四通孝  
經論語篤好玄言受學於汝南周弘正每有新意爲先輩推服梁大同中召補國子正言生梁武帝嘗於  
文德殿釋乾坤文言譏與陳郡袁憲等預焉敕令論議諸儒莫敢先出譏乃整容而進諮審循環辭令溫  
雅帝甚異之賜羣襦絹等云表卿稽古之力譏幼喪母有錯綵經帕卽母之遺制及有所識家人具以告  
之每歲時輒對帕哽噎不能勝及丁父憂居喪過禮爲士林館學士簡文在東宮出土林館發孝經題譏  
論義往復甚見嗟賞及侯景寇逆於圍城之中獨侍哀太子於武德後殿講老莊臺城陷譏嶠嶮避難卒  
不事景陳天嘉中爲國子助教時周弘正在國學發周易題弘正第四弟弘直亦在講席譏於弘正論議



弘正屈弘直危坐厲聲助其申理譏乃正色謂弘直曰今日義集辯正名理雖知兄弟急難四公不得有助弘直謂曰僕助君師何爲不可舉坐以爲笑樂弘正嘗謂人曰吾每登坐見張譏在席使人懷然宣帝時爲武陵王限內記室兼東宮學士後主在東宮集宮僚置宴時造玉柄麈尾新成後主親執之曰當今雖復多士如林至於堪捉此者獨張譏耳卽手授譏仍令於溫文殿講莊老宣帝幸宮臨聽賜御所服衣一襲後主嗣位爲國子博士東宮學士後主嘗幸鍾山開善寺召從臣坐於寺西南松林下敕譏暨義時索麈尾未至後主敕取松枝手以屬譏曰可代麈尾顧羣臣曰此卽張譏後事陳亡入隋終於長安年七十六譏性恬靜不求榮利常慕閑逸所居宅營山池植花果講周易老莊而教授焉吳郡陸元朗朱孟博一乘寺沙門法才法雲寺沙門慧拔至真觀道士姚綏皆傳其業譏所撰周易義三十卷尙書義十五卷毛詩義二十卷孝經義八卷論語義二十卷老子義十一卷莊子內篇義十二卷外篇義二十卷雜篇義十卷玄部通義十二卷游玄桂林二十四卷後主嘗敕就其家寫入祕閣子孝則官至始安王記室參軍顧越字允南吳郡鹽官人也所居新坂黃岡世有鄉校由是顧氏多儒學焉祖道望齊散騎侍郎父仲成梁護軍司馬豫章王府諮議參軍家傳儒學並專門教授越幼明慧有口辯勵精學業不捨晝夜弱冠游學都下通儒碩學必造門質疑討論無倦至於微言玄旨九章七曜音律圖緯咸盡其精微時太子詹事



周捨以儒學見重名知人一見越便相歎異命與兄子弘正弘直游厚爲之談由是聲譽日重時又有會稽賀文發學兼經史與越名相埒故都下謂之發越焉初爲南平元襄王偉國右常侍與文發俱入府並見禮重尋轉行參軍大通中詔颺勇將軍陳慶之送魏北海王顥還北主魏慶之請越參其軍事時慶之所向剋捷直至洛陽旣而顥遂肆驕縱又上下離心越料其必敗以疾得歸裁至彭城慶之果見摧衄越竟得先反時稱其見機及至除安西湘東王府參軍及武帝撰制旨新義選諸儒在所流通遺越還吳敷揚講說越徧該經藝深明毛詩傍通異義特善莊老尤長論難兼工綴文閑尺牘長七尺三寸美鬚眉武帝嘗於重雲殿自講老子僕射徐勉舉越論義越抗首而請音響若鍾容止可觀帝深贊美之由是擢爲中軍宣城王記室參軍尋除五經博士仍令侍宣城王講大同八年轉安西武陵王府內中錄事參軍尋遷府諮議及侯景之亂越與同志沈文阿等逃難東歸賊黨數授以爵位越誓不受命承聖二年詔授宣惠晉安王府諮議參軍領國子博士越以世路未平無心仕進因歸鄉棲隱於虎丘山與吳興沈炯同郡張種會稽孔奐等每爲文會紹泰元年復徵爲國子博士陳天嘉中詔侍東宮讀除東中郎鄱陽王府諮議參軍甚見優禮尋領羽林監遷給事中黃門侍郎國子博士侍讀如故時朝廷草創疑議多所並決咸見施用每侍講東宮皇太子常虛己禮接越以宮僚未盡時彥且太子仁弱宣帝有奪宗之兆內懷憤激

乃上疏曰臣梁世薄宦祿不代耕季年板蕩竄身窮谷幸屬聖期得奉昌運朝廷以臣微涉藝學遠垂徵引擢臣以貴仕資臣以厚秩二宮恩遇有異凡流木石知感犬馬識養臣獨何人罔懷報德伏惟皇太子天下之本養善春宮臣陪侍經籍於今五載如愚所見多有曠官輔弼丞疑未極時選至如文宗學府廉潔正人當趨奉龍樓晨游夕論恆聞前聖格言往賢政道如此則非僻之語無從而入臣年事使迫非有邀求政是懷此不言則爲有負明聖敢奏狂瞽願留中不泄疏奏帝深感焉而竟不能改革及廢帝卽位拜散騎常侍兼中書舍人黃門侍郎如故領天保博士掌儀禮猶爲帝師入講授甚見尊寵時宣帝輔政華皎舉兵不從越因請假東還或譖之宣帝言越將扇動蕃鎮遂免官太建元年卒於家年七十七所著喪服毛詩老子孝經論語等義疏四十餘卷詩頌碑誌牋表凡二百餘篇時有東陽龔孟舒者亦通毛詩善談名理仕梁位尋陽郡丞元帝在江州遇之甚重躬師事焉天嘉中位太中大夫

沈不害字孝和吳興武康人也幼孤而修立好學陳天嘉初除衡陽王府中記室參軍兼嘉德殿學士自梁季喪亂至是國學未立不害上書請崇建儒宮帝優詔答之又表改定樂章詔使製三朝樂歌詞八首合二十曲行之樂府後爲國子博士領羽林監敕修五禮掌策文諡議等事太建中位光祿卿通直散騎常侍兼尙書左丞卒不害通經術善屬文雖博綜經典而家無卷軸每製文操筆立成曾無尋檢汝南周

弘正常稱之曰沈生可謂意聖人乎著五禮儀一百卷文集十四卷子志道字崇基少知名位安東新蔡王記室參軍陳亡入隋卒王元規字正範太原晉陽人也祖道實齊晉安郡守父瑋梁武陵王府中記室參軍元規八歲而孤兄弟三人隨母依舅氏往臨海郡時年十二郡土豪劉瑱者資財巨萬欲妻以女母以其兄弟幼弱欲結強援元規泣請曰因不失親古人所重豈得苟安異壤輒昏非類母感其言而止元規性孝事母甚謹晨昏未嘗離左右梁時山陰縣有暴水流漂居宅元規唯有一小船倉卒引其母妹并姑姪入船元規自執檝棹而去留其男女三人閣於樹杪及水退俱獲全時人稱其至行少從吳興沈文阿受業十八通春秋左氏孝經論語喪服仕梁位中軍宣城王記室參軍陳天嘉中爲鎮東鄱陽王府記室參軍領國子助教後主在東宮引爲學士就受禮記左傳喪服等義國子祭酒新安王伯固嘗因入宮適會元規將講乃啟請執經時論榮之俄除尙書祠部郎自梁代諸儒相傳爲左氏學者皆以賈逵服虔之義難駁杜預凡一百八十條元規引證通析無復疑滯每國家議吉凶大禮常參預焉後爲南平王府限內參軍王爲江州元規隨府之鎮四方學徒不遠千里來請道者常數十百人陳亡入隋卒於秦王府東閣祭酒元規著春秋發題辭及義記十二卷讀經典大義十四卷孝經義記兩卷左傳音三卷禮記音兩卷子大業聰敏知名時有吳郡陸慶少好學徧通五經尤明春秋左氏傳節操甚高仕梁爲婁令陳天

嘉初徵爲通直散騎侍郎不就永陽王爲吳郡太守聞其名欲與相見慶辭以疾時宗人陸榮爲郡五官掾慶嘗詣焉王乃微服往榮宅穿壁以觀之王謂榮曰觀陸慶風神凝峻殆不可測嚴君平鄭子真何以尙茲郡陽晉安王俱以記室徵不就乃築室屏居以禪誦爲事由是經傳受業者蓋鮮焉

論曰語云上好之下必有甚焉者是以鄒纓齊紫且以移俗況祿在其中可無尙歟當天監之際時主方崇儒業如崔巖何伏之徒前後互見升寵於時四方學者靡然向風斯亦曩時之盛也自梁迄陳年且數十雖時經屯詖郊生戎馬而風流不替豈俗化之移人乎古人稱上德若風下應猶草美矣豈斯之謂也

南史卷七十一考證

伏曼容傳曼容多伎術○伎監本訛俊今改从閣本

何佟之傳都下稱其高儒○高一本作醇

沈洙傳所以重械之下危墮之上無人不履誣枉者多○一本墮作墮上作士

顧越傳詩頌碑誌表凡二百餘篇○監本缺殘字今增从南本

南史卷七十一考證



唐

李

延

壽

列傳第六十二

文學

巨靈

子遲

檀超

熊襄 超叔道鸞

卞彬

諸葛昂 袁暉 高爽 孫抱

巨源

孔廣 孔道 虞通之 袁仲明 孫詵 司馬憲

王智深

崔慰祖 祖冲之 子暉之 孫皓 來巖 賈希鏡 袁峻 劉昭 子縉 鍾嶸 兄峴 峴弟嶼

周興嗣

吳均 江洪 劉綈

何思澄

子朝 王子雲 任孝恭

顏協

紀少瑜

杜之偉

顏晃

岑之敬 何之元 徐伯陽

張正見

阮卓

易云

觀乎人文以化成天下 孔子曰 煥乎其有文章 自漢以來 辭人代有大則憲章典誥 小則申抒性靈 至於經禮樂而緯國家 通古今而述美惡 非斯則莫可也 是以哲王在上 咸所敦悅 故云言之不文行之不遠 自中原沸騰 五馬南渡 綴文之士 無乏於時 降及梁朝 其流彌盛 蓋由時主儒雅 篤好文章 故才秀之士 煥乎俱集 於時武帝 每所臨幸 輒命羣臣賦詩 其文之善者 賜以金帛 是以縉紳之士 咸知自勵 至有陳受命 運接亂離 雖加獎勵 而向時之風 流息矣 詩云人之云亡 邦國殄悴 豈金陵之數將終三百年

乎不然何至是也宋史不立文學傳齊梁皆有其目今綴而序之以備此篇云爾

卮靈鞠吳興烏程人也祖系祕書監父道真護軍長史靈鞠少好學善屬文州辟從事詣領軍沈演之演之曰身昔爲州職詣領軍謝晦賓主坐處政如今日卿將來復如此也累遷員外郎宋孝武殷貴妃亡靈鞠獻挽歌三首云雲橫廣階閣霜深高殿寒帝適句嗟賞後爲烏程令不得志泰始初坐事禁錮數年褚彥回爲吳興太守謂人曰此郡才士唯有卮靈鞠及沈勃耳乃啟申之明帝使著大鶴南討記論久之除太尉參軍昇明中爲正員郎兼中書郎時方禪讓齊高帝使靈鞠參掌詔策建元元年轉中書郎敕知東宮手筆嘗還東詣司徒褚彥回別彥回不起曰比脚疾更增不復能起靈鞠曰脚疾亦是大事公爲一代鼎臣不可復爲覆餗其疆切如此不持形儀唯取笑適尋又掌知國史武帝卽位爲通直常侍尋領東觀祭酒靈鞠曰人居官願數遷使我終身爲祭酒不恨也永明二年領驍騎將軍靈鞠不樂武位謂人曰我應遭東掘顧榮冢江南地方數千里士子風流皆出此中顧榮引諸僉輩度妨我輩塗轍死有餘罪靈鞠好飲酒臧否人物在沈淵坐見王儉詩淵曰王令文章大進靈鞠曰何如我未進時此言違儉靈鞠宋時文名甚盛入齊頗減蓬髮弛縱無形儀不事家業王儉謂人曰卮公仕宦不進才亦退矣位長沙王車

騎長史卒著江左文章錄序起大興訖元熙文集行於時子遲

遲字希範八歲便屬文靈鞠常謂氣骨似我黃門郎謝超宗徵士何點並見而異之在齊以秀才累遷殿中郎梁武帝平建鄴引爲驃騎主簿甚被禮遇時勸進梁王及殊禮皆遲文也及踐阼遷中書郎待詔文德殿時帝著連珠詔羣臣繼作者數十人遲文最美坐事免乃獻責躬詩上優辭答之後出爲永嘉太守在郡不稱職爲有司所糾帝愛其才寢其奏天監四年中軍將軍臨川王宏北侵魏以爲諮議參軍領記室時陳伯之在北與魏軍來拒遲以書喻之伯之遂降還拜中書侍郎遷司空從事中郎卒官遲辭采麗逸時有鍾嶸著詩評云范雲婉轉清便如流風回雪遲點綴映媚似落花依草雖取賤文通而秀於敬子其見稱如此

仲孚字公信靈鞠從孫也少好學讀書常以中宵鐘鳴爲限靈鞠嘗稱爲千里駒也齊永明初爲國子生王儉曰東南之美復見丘生舉高第未調還鄉里家貧乃結羣盜爲之計劫掠三吳仲孚聰明有智略羣盜畏服所行皆果故亦不發爲于湖令有能名太守呂文顯當時倖臣陵詆屬縣仲孚獨不爲屈明帝卽位爲曲阿令會稽太守王敬則反乘朝廷不備反問至而前鋒已屈曲阿仲孚鑿長岡埭瀉瀆水以阻其路敬則軍至遇瀆涸果頓兵不得進遂敗仲孚以拒守功遷山陰令居職甚有聲稱百姓謠曰二傅沈劉不如一丘前世傅琰父子沈憲劉玄明相繼宰山陰並有政績言仲孚皆過之齊末政亂頗有贖賄爲有

司所舉將見收竊逃還都會赦不問梁武帝踐阼復爲山陰令仲孚長於撥煩善適權變吏人敬服號稱  
神明政爲天下第一後爲衛尉卿恩任甚厚初起雙闕以仲孚領大匠累遷豫章內史在郡更勵清節頃  
之卒贈給事黃門侍郎喪將還豫章老幼號哭攀送車輪不得前仲孚爲左丞撰皇典二十卷南宮故事  
百卷又撰尙書具事雜儀行於世

檀超字悅祖高平金鄉人也祖嶷之字弘宗宋南琅邪太守父道彪字萬壽位正員郎超少好文學放誕  
任氣解褐州西曹蕭惠開爲別駕超便抗禮惠開自以地位居前稍相陵辱而超舉動嘯傲不以地勢推  
之張目謂曰我與卿俱是國家微賤時外戚耳何足以一爵高人蕭太后惠開之祖姑長沙景王妃超祖  
姑也故超以此議之惠開欣然更爲刎頸之交後位國子博士兼左丞超嗜酒好談詠自比晉郗超言高  
平有二超又謂人曰猶覺我爲優也齊高帝賞愛之後爲司徒右長史建元二年初置史官以超與驃騎  
記室江淹掌史職上表立條例開元紀號不取宋年封爵各詳本傳無假年表又制著十志多爲左僕射  
王儉所不同旣與物多忤史功未就徙交州於路見殺江淹撰成之猶不備也時有豫章熊襄著齊典上  
起十代其序云尙書堯典謂之虞書則附所述通謂之齊書名爲河洛金匱又有吳邁遠者好爲篇章宋  
明帝聞而召之及見曰此人連絕之外無所復有邁遠好自誇而蚩鄙他人每作詩得稱意語輒擲地呼

曰曹子建何足數哉超聞而笑曰昔劉季緒才不逮於作者而好抵訶人文章季緒瑣瑣焉足道哉至於邁遠何爲者乎超叔父道鸞字萬安位國子博士永嘉太守亦有文學撰續晉陽秋二十卷

卞彬字士蔚濟陰宛句人也祖嗣之中領軍父延之弱冠爲上虞令有剛氣會稽太守孟顛以令長裁之積不能容脫幘投地曰我所以屈卿者政爲此幘耳今已投之卿矣卿以一世勳門而傲天下國士拂衣而去彬險拔有才而與物多忤齊高帝輔政袁粲劉彥節王蘊等皆不同而沈攸之又稱兵反粲蘊雖敗攸之尙存彬意猶以高帝事無所成乃謂帝曰比聞謠云可憐可念尸著服孝子不在日代哭列管暫鳴死滅族公頗聞不時蘊居父憂與粲同死故云尸著服也服者衣也孝子不在日代哭者褚字也彬謂沈攸之得志褚彥回當敗故言哭也列管謂蕭也高帝不悅及彬退曰彬自作此後常於東府謁高帝高帝時爲齊王彬曰殿下卽東宮府則以青溪爲鴻溝鴻溝以東爲齊以西爲宋仍詠詩云誰謂宋遠跂予望之遂大忤旨因此擯廢數年不得仕進乃擬趙壹窮鳥爲枯魚賦以喻意後爲南康郡丞彬頗飲酒擯棄形骸仕旣不遂乃著蚤蝨蝸蟲蝦蟇等賦皆大有指斥其蚤蝨賦序曰余居貧布衣十年不製一袍之縕有生所託資其寒暑無與易之爲人多病起居甚疎縈寢敗絮不能自釋兼攝性懈墮懶事皮膚澡刷不謹澣沐失時四體氾氾加以臭穢故葦席蓬纒之間蚤蝨猥流淫癢涓濇無時怨肉探揣搗撮日不替手



蝨有諺云朝生暮孫若吾之蝨者無湯沐之慮絕相弔之憂晏聚乎久袴爛布之裳復不勸之討捕孫  
子子三十五歲焉其略言皆實錄也又爲禽獸決錄目禽獸云羊性淫而佞猪性卑而率鵝性頑而傲狗  
性險而出皆指斥貴勢其羊淫佞謂呂文顯猪卑率謂朱隆之鵝頑傲謂潘敞狗險出謂文度其險詣如  
此蝦蟇賦云紆青拖紫名爲蛤魚世謂比令僕也又云蝨斗唯唯羣浮閭水唯朝繼夕聿役如鬼比令史  
詔事也文章傳於閭巷後歷尚書比部郎安吉令車騎記室彬性飲配以瓠壺瓢勺枕皮爲着著帛冠十  
二年不改易以大瓠爲火籠什物多諸詭異自稱卞田居婦爲傅蠹室或謂曰卿都不持操名器何由得  
此彭曰擲五木子十擲輒韃豈復是擲子之拙吾好擲政極此耳後爲綏建太守卒官永明中琅邪諸葛  
婦之弟子生作雲中賦指祭酒以下皆有形似之目坐事繫東冶作東冶徒賦武帝見赦之又有陳郡袁  
而去淋其文謂人云我詩應須大材走之不爾飛去建武末爲諸暨令被王敬則賊所殺時有廣陵高爽  
藩不詣劉蒨爲晉陵縣爽經途詣之了不相接爽甚銜之俄而爽代蒨爲縣蒨遣迎贈甚厚爽受餉答  
才淋字晉陵自答人問其所以答云劉蒨餉晉陵令耳何關爽事又有人送書於爽告贖云比日守羊困  
盡食食守羊無食何不貸羊糴米孫抱爲延陵縣爽又詣之抱了無故人之懷爽出從縣閣下過取筆  
曰曹子參世吳人圍腹無一寸腸面皮如許厚受打未詎央爽機悟多如此坐事被繫作鰓魚賦以自況



其文甚工後遇赦免卒抱東莞人父廉吳興太守抱善吏職形體肥壯腰帶十圍爽故以此激之

巨源蘭陵蘭陵人也少舉丹陽郡孝廉爲宋孝武所知大明五年敕助徐爰撰國史帝崩江夏王義恭取掌書記明帝卽位使參詔誥引在左右自南臺御史爲王景文鎮軍參軍寧喪還家元徽初桂陽王休範在尋陽以巨源有筆翰遣船迎之餉以錢物巨源因齊高帝自啟敕板起之使留都下桂陽事起使於中書省撰符檄事平除奉朝請巨源望有封賞旣而不獲乃與尙書令袁粲書自陳竟不被申沈攸之事高帝又使爲尙書符荊州以此又望賞異自此意常不滿後除武昌太守拜竟不樂江外行武帝問之巨源曰古人云寧飲建鄴水不食武昌魚臣年已老寧死於建鄴乃以爲餘杭令明帝爲吳興巨源作秋胡詩有譏刺語以事見殺時又有會稽孔廣孔道皆才學知名廣字淹源美容止善吐論王儉張緒咸美之儉常云廣來使人廢簿領匠不須來來則莫聽去緒數巾車詣之每歎云孔廣使吾成輕薄祭酒仕至揚州中從事道抗直有才藻製東都賦於時才士稱之陳郡謝朓年少時遊會稽還父莊問入東何見見孔道不見重如此著三吳決錄不傳卒於衛軍武陵王東曹掾又時有虞通之虞獻司馬憲袁仲明孫詵等皆有學行與廣埒名通之獻皆會稽餘姚人通之善言易至步兵校尉獻位中書郎廷尉少好學居貧屋漏恐漏墮典乃舒被覆書書獲全而被大漏時人以此高鳳憲字景思江內溫人待詔東觀爲學士至殿

中郎口辯有才地使魏見稱於北仲明陳郡人撰晉史未成而卒初仲明與劉融卞鏗俱爲袁粲所賞恆在坐席粲爲丹陽尹取鏗爲主簿好詩賦多譏刺世人坐徙巴州誅字休羣太原中都人愛文尤賞泉石卒于御史中丞

王智深字雲才琅邪臨沂人也少從陳郡謝超宗學屬文好飲酒拙澀乏風儀仕齊爲豫章王大司馬參軍兼記室武帝使太子家令沈約撰宋書疑立袁粲傳以審武帝帝曰袁粲自是宋家忠臣約又多載孝武明帝諸竊黷事上遣左右語約曰孝武事迹不容頓爾我昔經事宋明帝卿可思諱惡之義於是多所省除又敕智深撰宋紀召見扶容堂賜衣服給宅智深告貧於豫章王王曰須卿書成當相論以祿書成三十卷武帝後召見智深於睿明殿令拜表奏上表未奏而武帝崩隆昌元年敕索其書智深遷爲竟陵王司徒參軍免官家貧無人事嘗餓五日不得食掘堇根食之司空王僧虔及子志分與衣食卒於家

崔慰祖字悅宗清河東武城人也父慶緒永明中爲梁州刺史慰祖解褐奉朝請父喪不食鹽母曰汝旣無兄弟又未有子惰毀不滅性政當不進肴羞耳如何絕鹽吾今亦不食矣慰祖不得已從之父梁州之資家財十萬散與宗族漆器題爲日字日字之器流乎遠近料得父時假贖文疏謂族子絃曰彼有自當見還彼無吾何言哉悉火焚之好學聚書至萬卷隣里年少好事者來從假借日數十表慰祖親自取與

未嘗爲辭爲始安王遙光撫軍刑獄兼記室遙光好棊數召慰祖對戲慰祖輒辭拙非朔望不見也建武中詔舉士從兄慧景舉慰祖及平原劉孝標並碩學帝欲試以百里慰祖辭不就國子祭酒沈約吏部郎謝朓嘗於吏部省中賓友俱集各問慰祖地理中所不悉十餘事慰祖口吃無華辭而酬據精悉一坐稱服之朓歎曰假使班馬復生無以過此慰祖賣宅須四十五萬買者云寧有減不答曰誠異韓伯休何容二價買者又曰君但賣四十六萬一萬見與慰祖曰豈是我心乎少與侍中江祀歎及祀貴常來候之而慰祖不往也與丹陽丞劉渢素善遙光據東府反慰祖在城內城未潰一日渢謂之曰卿有老母宜出門者出之慰祖詣闕自首繫尙方病卒慰祖著海岱志起太公迄西晉人物爲四十卷半成臨卒與從弟緯書云常欲更注遷固二史採史漢所漏二百餘事在廚篋可檢寫之以存大意海岱志良未周悉可寫數本付護軍諸從事人一通及友人任昉徐寅劉洋裴揆令後世知吾微有素業也又令以棺親土不須輒勿設靈坐

祖冲之字文遠范陽道人也曾祖台之晉侍中祖昌宋大匠卿父朔之奉朝請冲之稽古有機思宋孝武使直華林學省賜宅宇車服解褐南徐州從事公府參軍始元嘉中用何承天所製厯比古十一家爲密冲之以爲尙疎乃更造新法上表言之孝武令朝士善厯者難之不能屈會帝崩而施行厯位爲婁縣令

謁者僕射初宋武平關中得姚興指南車有外形而無機杼每行使人於內轉之昇明中齊高帝輔政使  
沖之追修古法沖之改造銅機圓轉不窮而司方如一馬均以來未之有也時有北人索馭驎者亦云能  
造指南車高帝使與沖之各造使於樂游苑對共校試而頗有差僻乃毀而焚之晉時杜預有巧思造欬  
器三改不成永明中竟陵王子良好古沖之造欬器獻之與周廟不異文惠太子在東宮見沖之麻法啟  
武帝施行文惠尋薨又寢轉長水校尉領本職沖之造安邊論欲開屯田廣農殖建武中明帝欲使沖之  
巡之行四方興造大業可以利百姓者會連有軍事竟不行沖之解鍾律博塞當時獨絕莫能對者以諸  
萬亮有木牛流馬乃造一器不因風水施機自運不勞人力又造千里舩於新亭江試之日行百餘里於  
樂游苑造水碓磨武帝親自臨視又特善算永元二年卒年七十二著易老莊義釋論語孝經注九章造  
綴述數十篇子暉之

暉之字景爍少傳家業究極精微亦有巧思入神之妙般倅無以過也當其詣微之時雷霆不能入嘗行  
遇僕射徐勉以頭觸之勉呼乃悟父所改何承天麻時尙未行梁天監初暉之更修之於是始行焉位至

太府卿

暉之子皓志節慷慨有文武才略少傳家業善算麻大同中爲江都令後拜廣陵太守侯景陷臺城皓在

城中將見害乃逃歸江西百姓感其遺惠每相蔽匿廣陵人來嶷乃說皓曰逆豎滔天王室如燬正是義夫發憤之秋志士忘軀之日府君荷恩重世又不爲賊所容今逃竄草間知者非一危亡之甚累某非論董紹先雖景之心腹輕而無謀新尅此州人情不附襲而殺之此亦壯士之任耳今若糺率義勇立可得三二百人意欲奉戴府君勦除兇逆遠近義徒自當投赴如此尅捷可立桓文之勳必天未悔禍事生理外百代之下猶爲梁室忠臣若何皓曰僕所願也死且甘心爲要勇士耿光等百餘人襲殺景兗州刺史董紹先推前太子舍人蕭勔爲刺史結束魏爲援馳檄遠近將討景景大懼卽日率侯子鑿等攻之城陷皓見執被縛射之箭過體然後車裂以徇城中無少長皆埋而射之來嶷字德山幼有奇節兼資文武旣與皓義舉邵陵王承制除步兵校尉秦郡太守封永寧縣侯及皓敗并兄弟子姪遇害者十六人子法敏逃免仕陳爲海陵令

賈希鏡平陽襄陵人也祖彌之晉員外郎父匪之驃騎參軍家傳譜學宋孝武時青州人發冢銘云青州世子東海女郎帝問學士鮑照徐爰蘇寶生並不能悉希鏡對曰此是司馬越女嫁荀晞兒檢訪果然由是見過敕希鏡注郭子昇明中齊高帝嘉希鏡世學取爲驃騎參軍武陵王國郎中令歷大司馬司徒府參軍竟陵王子良使希鏡撰見客譜出爲句容令先是譜學未有名家希鏡祖彌之廣集百氏譜記事



心習業晉泰元中朝廷給弭之令史書史撰定繕寫藏祕閣及左戶曹希鏡三世傳學凡十八州士族譜合百帙七百餘卷該究精悉皆如貫珠當時莫比永明中衛將軍王儉抄次百家譜與希鏡參懷撰定建元初希鏡遷長水校尉信人王泰寶買襲琅邪譜尚書令王晏以啟明帝希鏡坐被收當極法子棲長謝罪稽顙流血朝廷哀之免希鏡罪後爲北中郎參軍卒撰氏族要狀及人名書並行於時

袁峻字孝高陳郡陽夏人魏郎中令渙之八世孫也早孤篤志好學家貧無書每從人假借必皆抄寫自課日五十紙紙數不登則不止訥言語工文辭梁武帝雅好辭賦時獻文章於南闕者相望焉天監六年峻乃擬楊雄言箴奏之帝嘉焉賜束帛除員外郎散騎侍郎直文德學士省抄史記漢書各爲二十卷又奉敕與陸倕各製新闕銘云

劉昭字宣卿平原高唐人晉太尉寔九世孫也祖伯龍居父憂以孝聞宋武帝敕皇太子諸王並往弔慰官至少府卿父彪齊征虜晉安王記室昭幼清警通老莊義及長勤學善屬文外兄江淹早相稱賞梁天監中累遷中軍臨川王記室初昭伯父彤集衆家晉書注千寶晉紀爲四十卷至昭集後漢同異以注范曄後漢世稱博悉卒於剡令集注後漢一百八十卷幼童傳一卷文集十卷子緡字言明亦好學通三禮位尚書祠部郎著先聖本記十卷行於世緡弟緩字含度爲湘東王中錄事性虛遠有氣調風流跌宕名



高一府常云不須名位所須衣食不用身後之譽唯重目前知見

鍾嶸字仲偉潁川長社人晉侍中雅七世孫也父蹈齊中軍參軍嶸與兄岷弟嶼並好學有思理嶸齊永明中爲國子生明周易衛將軍王儉領祭酒頗賞接之建武初爲南康王侍郎時齊明帝躬親細務綱目亦密於是郡縣及六署九府常行職事莫不爭自啟聞取決詔敕文武勳舊皆不歸選部於是憑勢互相通進人君之務粗爲繁密嶸乃上書言古者明君揆才頒政量能授職三公坐而論道九卿作而成務天子可恭己南面而已書奏上不憚謂太中大夫顧勗曰鍾嶸何人欲斷朕機務卿識之不答曰嶸雖位末名卑而斯言或有可採且繁碎職事各有司存今人主總而親之是人主愈勞而人臣愈逸所謂代庖人宰而爲大匠斲也上不顧而他言永元末除司徒行參軍梁天監初制度雖革而未能盡改前弊嶸上言曰永元肇亂坐弄天爵勳非卽戎官以賄就揮一金而取九列寄片札以招六校騎都塞市郎將填街服旣纒組尙爲臧獲之事職雖黃散猶躬胥徒之役名實淆紊茲焉莫甚臣愚謂永元諸軍官是素族士人自有清貫而因斯受爵一宜削除以懲澆競若吏姓寒人聽極其門品不當因軍遂濫清級若僞雜槍楚應在綏撫正宜嚴斷祿力絕其妨正直乞虛號而已敕付尙書行之衡陽王元簡出守會稽引爲寧朔記室專掌文翰時居士何胤築室若邪山山發洪水漂拔樹石此室獨存元簡令嶸作瑞室頌以旌表之辭

甚典麗遷西中郎晉安王記室嶸嘗求譽於沈約約拒之及約卒嶸品古今詩爲評言其優劣云觀休文衆製五言最優齊永明中相王愛文王元長等皆宗附約于時謝朓未適江淹才盡范雲名級又微故稱獨步故嘗辭密于范意淺于江蓋追宿憾以此報約也頃之卒官岢字長丘位建康令卒著良吏傳十卷嶼字季望永嘉郡丞

周興嗣字思纂陳郡項人也世居姑熟博學善屬文嘗步自姑熟投宿逆旅夜有人謂曰子才學邁世初當見識貴臣卒被知英主言終不測所之齊隆昌中侍郎謝朓爲吳興太守唯與興嗣談文史而已及罷郡因大相談薦梁天監初奏休平賦其文甚美武帝嘉之拜安成王國侍郎直華林省其年河南獻舞馬詔興嗣與待詔到沆張率爲賦帝以興嗣爲工擢拜員外散騎侍郎進直文德壽光省時武帝以三橋舊宅爲光宅寺敕興嗣與陸倕各製寺碑及成俱奏帝用興嗣所製自是銅表銘柵塘碣檄魏文次韻王羲之書千字並使興嗣爲文每奏帝稱善賜金帛後佐撰國史興嗣兩手先患風疽十二年又染癘疾左目盲帝撫其手嗟曰斯人而有斯疾手疏疽方以賜之任昉又愛其才常曰興嗣若無此疾旬日當至御史中丞十七年爲給事中直西省周捨奉敕注武帝所製歷代賦啟興嗣助焉普通二年卒所撰皇帝寶錄皇德記起居注職儀等百餘卷文集十卷吳均字叔庠吳興故鄣人也家世寒賤至均好學有俊才沈約

嘗見均文頗相稱賞梁天監初柳惲爲吳興召補主簿日引與賦詩均文體清拔有古氣好事者或敦之謂爲吳均體均嘗不得意贈惲詩而去久之復來惲遇之如故弗之憾也薦之臨川靖惠王王稱之於武帝卽日召之賦詩悅焉待詔著作累遷奉朝請先是均將著史以自名欲撰齊書求借齊起居注及羣臣行狀武帝不許遂私撰齊春秋奏之書稱帝爲齊明帝佐命帝惡其實錄以其書不實使中書舍人劉之遴請問數十條竟支離無對敕付省焚之坐免職尋有敕召見使撰通史起三皇訖齊代均草本紀世家已畢唯列傳未就卒均注范曄後漢書九十卷著齊春秋二十卷廟記十卷十二州記十大卷錢塘先賢傳五卷續文釋五卷文集二十卷先是有濟陽江洪工屬文爲建陽令坐事死

劉勰字彥和東莞莒人也父尚越騎校尉勰早孤篤志好學家貧不婚娶依沙門僧祐居遂博通經論因區別部類錄而序之定林寺經藏勰所定也梁天監中兼東宮通事舍人時七廟饗薦已用蔬果而二郊農社猶有犧牲勰乃表言二郊宜與七廟同改詔付尚書議依勰所陳遷步兵校尉兼舍人如故深被昭明太子愛接初勰撰文心雕龍五十篇論古今文體其序略云予齒在逾立嘗夜夢執丹漆之禮器隨仲尼而南行寤而喜曰大哉聖人之難見也迺小子之垂夢歟自生靈以來未有如夫子者也數讚聖旨莫若注經而馬鄭諸儒弘之已精就有深解未足立家唯文章之用實經典枝條五禮資之以成大典因之

致用於是搦筆和墨乃始論文其爲文用四十九篇而已既成未爲時流所稱颺欲取定於沈約無由自達乃貢書候約於車前狀若貨鬻者約取讀大重之謂深得文理常陳諸几案颺爲文長於佛理都下寺塔及名僧碑誌必請颺製文敕與慧震沙門於定林寺撰經證功畢遂求出家先燔鬚髮自誓敕許之乃變服改名慧地云

何思澄字元靜東海郟人也父敬叔齊長城令有能名在縣清廉不受禮遺夏節至忽踰門受餽數日中得米二千餘斛他物稱是悉以代貧人輸租思澄少勤學工文爲遊廬山詩沈約見之大相稱賞自以爲弗逮約郊居宅新構閣齋因命工書人題此詩於壁傅昭嘗請思澄製釋奠詩辭文典麗天監十五年敕太子詹事徐勉舉學士入華林撰遍略勉舉思澄顧協劉杳王子雲鍾嶼等五人以應選八年乃書成合七百卷思澄重交結分書與諸賓朋校定而終日造謁每宿昔作名一束曉便命駕朝賢無不悉狎狎處卽命食有人方之婁護欣然當之投晚還家所齋名必盡自廷尉正遷治書侍御史宋齊以來此職甚輕天監初始重其選車前依尙書二丞給三駟執盛印青囊舊事糾彈官印綬在前故也後除安西湘東王錄事參軍兼東宮通事舍人時徐勉周捨以才具當朝並好思澄學常遞日招致之後卒於宣惠武陵王中錄事參軍文集十五卷初思澄與宗人遜及子朗俱擅文名時人語曰東海三何子朗最多思澄聞之

曰此言誤耳如其不然故當歸遜思澄意謂宜在己也子朗字世明早有才思周捨每與談服其精理嘗爲敗冢賦擬莊周馬極其文甚工世人語曰人中爽爽有子朗卒于國山今年二十四集行於世王子雲太原人及江夏費昶並爲閬里才子昶善爲樂府又作鼓吹曲武帝重之敕曰才意新拔有足嘉異昔耶憚博物卞蘭巧辭東帛之賜寔惟勸善可賜絹十匹子雲嘗爲自序文甚美

任孝恭字孝恭臨淮人也會祖農夫宋南豫州刺史農夫弟侯伯位輔國將軍行湘州事並任將帥孝恭幼孤事母以孝聞精力勤學家貧無書嘗崎嶇從人假借每讀一遍諷誦略無所遺外祖巨宅與武帝有舊帝聞其有才學召入西省撰史初爲奉朝請進直壽光省爲司文侍郎俄兼中書通事舍人敕遣製建陵寺刹下銘又啟撰武帝集序文並富麗自是專掌公家筆翰孝恭爲文敏速若不留思每奏稱善累賜金帛少從蕭寺雲法師讀經綸明佛理至是蔬食持戒信受甚篤而性頗自伐以才能尙人於流輩中多有忽略世以此少之太清三年侯景寇逼孝恭啟募兵隸蕭正德正德入賊孝恭還赴臺臺門閉侯景獲之使作檄求還私第檢討景許之因走入東府城陷景斬剉之文集行于世

顏協字子和琅邪臨沂人也晉侍中含七世孫也父見遠博學有志行初齊和帝鎮荊州以爲錄事參軍及卽位兼御史中丞梁武帝受禪見遠不食發憤數日而卒帝聞之曰我自應天從人何豫天下士大夫



事而顏見遠乃至於此協幼孤養於舅氏少以器局稱博涉羣書工於草隸飛白時吳人范懷約能隸書協學其書殆過直也荆楚碑碣皆協所書時又有會稽謝善助能爲八體大文方寸千言京兆韋仲善飛白並在湘東王府善助爲錄事參軍仲爲中兵參軍府中以協優於韋仲而減於善助善助飲酒至數斗醉後輒張眼大罵雖復貴賤親疎無所擇也時謂之謝方眼而曾襟夷坦有士君子之操焉協家雖貧素而脩飾邊幅非車馬未嘗出游湘東王出鎮荊州以爲記室時吳郡顧協亦在蕃邸與協同名才學相亞府中稱爲二協翼陳郡謝暕卒協以有鞠養恩居喪如伯叔禮議者甚重焉又感家門事義不求顯達恆辭徵辟游於蕃府而已卒元帝甚歎惜之爲懷舊詩以傷之協所撰晉仙傳五篇日月災異圖兩卷行於世其文集二十卷遇火湮滅子之儀之推並早知名

紀少瑜字幼瑒丹陽秣陵人也本姓吳養於紀氏因而命族早孤幼有志節常慕王安期之爲人年十三能屬文初爲京華樂王僧孺見而賞之曰此子才藻新拔方有高名少瑜嘗夢陸倕以一束青鏤管筆授之云我以此筆猶可用卿自擇其善者其文因此邁進年十九始遊太學備探六經博士東海鮑敝雅相欽悅時敝有疾請少瑜代講少瑜既妙立言善談吐辯捷如流爲晉安國中尉卽梁簡文也深被恩遇後侍宣城王讀當陽公爲郢州以爲功曹參軍轉輕車限內記室坐事免大同七年始引爲東宮學士邵陵



王在郢啟求學士武帝以少瑜充行少瑜美容貌工藁草吏部尙書到漑嘗曰此人有大才而無貴仕將拔之會漑去職後除武陵王記室參軍卒

杜之偉字子大吳郡錢塘人也家世儒學以三禮專門父規梁奉朝請之偉幼精敏有逸才年十五遍觀文史及儀體故事時輩稱其早成僕射徐勉嘗見其文重其有筆力中大同元年梁武帝幸同泰寺捨身敕勉撰儀注勉以先無此禮召之偉草具其儀乃啟補東宮學士與學士劉陟等抄撰羣書各爲題目所撰宮教政道二篇皆之偉爲序後兼太學限內博士大同七年梁皇太子釋奠於國學時樂府無孔子頌子登歌詞令之偉製文伶人傳習以爲故事再遷安前邵陵王刑獄參軍之偉年位甚卑特以強識俊才頗有名當世吏部尙書張纘深知之以爲廊廟之器陳武帝爲丞相素聞其名召補記室參軍遷中書侍郎領大著作及受禪除鴻臚卿餘並如故之偉求解著作優敕不許再遷太中大夫仍撰敕梁史卒官文集十七卷

顏晃字元明琅邪臨沂人也少孤貧好學有辭采解褐梁邵陵王兼記室參軍時東宮學士庾信使府中王使晃接對信輕其少曰此府兼記室幾人晃曰猶當少於宮中學士當時以爲善對侯景之亂奔荊州承聖初除中書侍郎陳天嘉初累遷員外散騎常侍兼中書舍人掌詔誥卒贈司農卿謚曰貞子晃家世

單門傍無戚援而介然修立爲當世所知其表奏詔誥下筆立成便得事理有集二十卷

岑之敬字思禮南陽棘陽人也父善紆梁世以經學聞官至吳寧令司義郎之敬年五歲讀孝經每燒香正坐親戚咸加歎異十六策春秋左氏制旨孝經義擢爲高第御史奏曰皇朝多士例止明經若顏閔之流乃應高第梁武帝省其策曰何妨我復有顏閔邪因召入面試令之敬升講坐敕中書舍人朱异執孝經唱士孝章武帝親自論難之敬剖釋從橫左右莫不嗟服仍除童子奉車郎賞賜優厚十八預重雲殿法會時武帝親行香熟視之敬曰未幾見兮突而弁兮卽日除太學限內博士尋爲壽光學士司義郎太清元年表試吏除南沙令承聖二年除晉安王宣惠府中記室參軍時蕭勃據嶺表敕之敬宣旨慰喻會魏尅江陵仍留廣州陳太建初還朝授東宮義省學士累遷南臺書侍御史征南府諮議參軍之敬始以經業進而博涉文史雅有詞筆不爲醇儒性謙謹未嘗以才學矜物接引後進恂恂如也每母忌日營齋必躬自洒掃涕泣終日士君子以篤行稱之十一年卒有集十卷行於世子德潤有父風位中軍吳興王

### 記室

何之元廬江潯人也祖僧達齊南臺書侍御史父法勝以行業聞之元幼好學有才思居喪過禮梁天監末司空袁昂表薦之因得召見累遷信義令其宗人敬容位望隆重類相顧訪之元終不造焉或問其故

之元曰昔楚人得寵於觀起有馬者豈亡夫德薄任隆必近覆敗吾恐不獲其利而招其禍識者以是稱之侯景之亂武陵王以太尉承制授南梁州刺史北巴西太守武陵王自成都舉兵東下之元與蜀中人庶抗表請無行王以爲沮衆囚之元於艦中及武陵兵敗之元從邵陵太守劉棻之郡俄而魏剋江陵劉棻卒王琳召爲記室參軍及琳立蕭莊署爲中書侍郎王琳敗齊王以爲揚州別駕所居卽壽春也及衆軍北伐湘州刺史始興王叔陵遣功曹史柳咸齋書召之之元始與陳朝有隙書至大惶恐讀書至孔璋無罪左車見用遂隨咸至湘州再遷中衛府諮議參軍及叔陵誅之元乃屏絕人事著梁典起齊永元元年迄于琳遇獲七十五年行事爲三十卷陳亡移居常州之晉陵縣隋開皇十三年卒於家

徐伯陽字隱忍東海人也父僧權梁東宮通事舍人領祕書以善書知名伯陽敏而好學善色養家有史書所讀者近三千餘卷梁大同中爲候官令甚得人和侯景之亂至廣州依蕭勃勃平還都陳天嘉中除司空侯安都府記室參軍太建初與中記室李爽記室張正見左戶郎賀徹學士阮卓黃門郎蕭詮三公耶王由禮處士馬樞記室祖孫登比部郎賀循長史劉刪等爲文會友後有蔡凝劉助陳暄孔範亦預焉皆一時士也遊宴賦詩動成卷軸伯陽爲其集序盛傳於世後除鎮北新安王府中記室參軍兼南徐州別駕帶東海郡丞鄱陽王爲江州刺史伯陽常奉使造焉王率府僚與伯陽登匡嶺置宴酒酣命筆賦劇

韻三十伯陽與祖孫登前成王賜以奴婢雜物後除鎮右新安王府諮議參軍事聞姊喪發疾卒

張正見字見贖清河東武城人也祖善之魏散騎常侍勃海長樂二郡太守父脩禮魏散騎侍郎歸梁仍拜本職遷懷方太守正見幼好學有清才梁簡文在東宮正見年十三獻頌簡文深贊賞之梁元帝卽位爲彭澤令屬喪亂避地匡俗山陳武帝受禪正見還都累遷尙書度支郎撰史著士卒有集十四卷其五言尤善

阮卓陳留尉氏人也祖詮梁散騎侍郎父問道梁岳陽王府記室參軍卓幼聰敏篤志經籍尤工五言性至孝父隨岳陽王出鎮江州卒卓時年十五自都奔赴水漿不入口者累日載柩還都度彭蠡湖中流遇疾風船幾沒者數四卓仰天悲號俄而風息人以爲孝感之至陳天嘉元年爲新安王府記室參軍隨府轉翊右記室帶撰史著士及平歐陽紇交阯夷獠往往聚爲寇抄卓奉使招慧交阯通日南象郡多金翠珠貝珍怪之產前後使者皆致之唯卓挺身而還時論咸伏其廉後爲始興王中衛府記室參軍及叔陵誅後主謂朝臣曰阮卓素不同逆宜加旌異至德元年入爲德教殿學士尋兼通直散騎常侍副王詵聘隋隋文帝夙聞其名遣河東薛道衡琅邪顏之推等與卓談宴賦詩賜遺加禮還除南海王府諮議參軍以目疾不之官退居里舍改構亭宇修山池卉木招致賓友以文酒自娛陳亡入隋行至江州追感其父

所終遺疾卒

論曰文章者蓋情性之風標神明之律呂也蘊思含豪遊心內運放言落紙氣韻天成莫不稟以生靈遷乎愛嗜機見殊門賞悟紛雜感召無象變化不窮發五聲之音響而出言異句寫萬物之情狀而下筆殊形暢自心靈而宣之簡素輪扁之言或未能盡然縱假之天性終資好習是以古之賢哲咸所用心至若巨靈鞠等或克荷門業或夙懷慕尚雖位有窮通而名不可滅然則立身之道可無務乎





南史卷七十二考證

文學傳敘大則憲章典誥小則申抒性靈○憲監本訛獻今改正

巨靈鞠傳在沈淵坐見王儉詩○一本淵作深儉注云一作徐

子遲傳遲字希範○遲監本訛達今改正

卞彬傳我詩應須大材迨之不爾飛去○迨監本作廷今从閣本

崔慰祖傳悉火焚之○火監本訛人今从南本改正

可寫數本付護軍諸從事人一通○南本脫事字今以監本爲是

何思澄傳又作鼓吹曲○鼓吹監本誤取次今改从閣本

任孝恭傳初爲奉朝請○奉監本訛舉今改正

少從蕭寺雲法師讀經論明佛理○師監本訛諦今从閣本改正

顏協傳晉侍中含七世孫也○含監本訛舍今改从南本

杜之偉傳年十五遍觀文史及儀體故事○體一本作禮

岑之敬傳位中軍吳興王記室○吳興監本誤英與今改从閣本

史臣論然則立身之道可無務乎○身監本誤少今从南本改正

唐

李

延

壽

撰

列傳第六十三

孝義上

龔穎

劉瑜黃陽 賈恩

郭世通子原平

嚴世期

吳達

潘綜

陳遺 秦繡 張進之俞愈 張楚

巨傑

師覺授

王彭

蔣恭

徐耕嚴成

王道蓋

孫法宗

范叔孫

吳國夫

卜天與張弘 之等

天與弟天生

許昭先

余齊人

孫棘妻許 錢延慶

徐元妻許

何子平

崔懷順

王慮之

顧昌衍

江柔之 江軻 吳慶之

蕭叡明

鮮于文宗 文宗姊文英

蕭矯妻羊

羊緝之女佩任 蔣雋之妻黃

吳康之妻趙

吳翼之母丁

會稽陳氏三女 永興樞中里王氏女 吳興乘公濟妻姚 吳郡范法恂妻褚

諸暨屠氏女

公孫僧遠

吳欣之

韓係伯聞人 魯

巨冠先

孫淡

華寶

薛天生 劉懷胤 叔謙宗元卿 匡昕

庾震 魯康祚

朱文濟 謝昌寓 韓靈敏

劉颯弟謙 柳叔夜

封延伯

陳玄子 范道根

邵榮興 譚弘實

文獻叔 何弘

徐生之 陽黑頭

范安祖 王續祖

李聖伯 郝道福

吳達之蔡曇智 何伯璵

王文殊

樂頤之

弟預 沈昇之

江泌

庾道愍

族孫沙彌 沙彌子持

易曰立人之道曰仁與義夫仁義者合君親之至理實忠孝之所資雖義發因心情非外感然企及之旨

聖哲遺言至於風離化薄禮違道喪忠不樹國孝亦愆家而一代之毗權利相引仕以勢招榮非行立乏  
嗶翔之感棄捨生之分霜露未改大痛已忘於心名節不變戎車遠爲其首斯並軌訓之理未弘汲引之  
塗多闕若夫情發於天行成乎己捐軀捨命濟主安親雖乘理闕至匪由勸賞而宰世之人曾微誘激乃  
至事隱閭閻無聞視聽考于載籍何代無之故宜被之圖篆用存旌勸今搜綴湮落以備闕文云爾

龔穎遂寧人也少好學益州刺史毛瓌辟爲勸學從事瓌爲譙縱所殺故佐吏並逃亡穎號哭奔赴殯送  
以禮縱後設宴延穎不獲已而至樂奏穎流涕起曰北面事人亡不能死何忍舉觴聞樂蹈逆亂乎縱  
大將譙道福引出將斬之道福母卽穎姑也跣出救之得免及縱僭號備禮徵又不至乃脅以兵刃執志  
終無回改至于蜀平遂不屈節其後刺史至輒加辟引歷府參軍州別駕從事史宋文帝元嘉二十四年  
刺史陸徽表穎節義遂不被朝命終於家

劉瑜歷陽人也七歲喪父事母至孝年五十二又喪母三年不進鹽酪號泣晝夜不絕聲勤身力以營葬  
事服除二十餘年布衣蔬食言輒流涕常居墓側未嘗暫違宋文帝元嘉初卒又元嘉七年南豫州舉所  
統西陽縣人董陽三世同居外無異門內無異煙詔榜門曰篤行董氏之閭闕一門租布

賈恩會稽諸暨人也少有志行元嘉三年母亡居喪過禮未葬爲隣火所逼恩及妻柏氏號哭奔救隣近

赴助棺槨得免恩及柏俱燒死有司奏改其里爲孝義里蠲租布三世追贈恩天水郡顯親左尉

郭世通會稽永興人也年十四喪父居喪殆不勝哀家貧傭力以養繼母婦生一男夫妻恐廢侍養乃垂泣瘞之母亡負土成墳親戚或共賻助微有所受葬畢傭賃還先直服除後思慕終身如喪者未嘗釋衣  
愾仁孝之風行於鄉黨隣村小大莫有呼其名者嘗與人共於山陰市貨物誤得一千錢當時不覺分背  
方悟追還本主錢主驚歎以半直與之世通委之而去元嘉四年大使巡行天下散騎常侍袁愉表其淳  
行文帝嘉之敕榜表門閭蠲其租調改所居獨楓里爲孝行焉太守孟顓察孝廉不就

子原平字長蒸幼稟至行養親必以己力傭賃以給供養性甚巧每爲人作止取散夫價主人設食原平  
自以家貧父母不辦有着味唯餐鹽飯而已若家或無食則虛中竟日義不獨飽須日暮作畢受直歸家  
於里糴買然後舉爨父篤疾彌年原平衣不解帶口不嘗鹽菜者跨積寒暑又未嘗睡臥父亡哭踊慟絕  
數日方蘇以爲奉終之義情禮自畢心墮凶功不欲假人本雖巧而不解作墓乃訪邑中有營墓者助人  
運力經時展勤久乃閑練又自賣十夫以供衆費窀穸之事儉而當禮性無術學因心自然葬畢詣所買  
主執役無懈與諸奴分務讓逸取勞主人不忍使每遣之原平服勤未嘗暫替傭賃養母有餘聚以自贖  
既學構家尤善其事每至吉歲求者盈門原平所起必自貧始既取賤價又以夫力助之及父喪終自起

兩間小屋以爲祠堂每至節歲常於此數日中哀思絕飲粥父服除後不復食肉高陽許瑤之罷建安郡丞還家以綿一斤遺之不受瑤之乃自往曰今歲過寒而建安綿好以此奉尊上下耳原平乃拜而受之及母終毀瘠彌甚僅乃免喪墓前有數十畝田不屬原平每至農月耕者恆裸袒原平不欲使人慢其墳墓乃買家資貴買此田三農之月輒束帶垂泣躬自耕墾每出賣物裁求半價邑人皆共識悉輒加本價與之彼此相讓要使微賤然後取直宅上種竹夜有盜其筍者原平遇見之盜者奔走墜溝原平乃於所植竹處溝上立小橋令通又採筍置籬外隣里慙愧無復取者宋文帝崩原平號慟日食麥餅一枚如此五日人曰誰非王臣何獨如此原平泣而答曰吾家見異先朝蒙褒贊之賞不能報恩私心感動耳又以種瓜爲業大明七年大旱瓜瀆不復通船縣令劉僧秀愍其窮老下瀆水與之原平曰普天大旱百姓俱困豈可減溉田之水以通運瓜之船乃步從他道往錢塘貨賣每行來見人牽隸未過輒迅楫助之己自引船不假旁人若自船已度後人未及常停住須待以此爲常嘗於縣南郭鳳隸助人引船遇有鬪者爲吏所錄鬪者逃散唯原平獨住吏執以送縣縣令新到未相諳悉將加嚴罰原平解衣就罪義無一言左石大小咸稽顙請救然後得免由來不謁官長自此乃始脩敬太守蔡興宗臨郡深加貴異以私米饋原平及山陰朱百年妻各百斛原平誓死不受百年妻亦固辭會稽郡貴重望計及望孝盛族出身不減祕



著明帝泰始七年興宗欲舉山陰孔仲智子爲望計原平次息爲望孝仲智會士高門原平一邦至行欲以相敵會明帝別敕用人故二選並寢興宗徵還都表其殊行舉爲太學博士會興宗薨事不行卒於家三子一弟並有門行

嚴世期會稽山陰人也性好施同里張邁等三人妻各產子歲饑欲棄而不舉世期分食解衣以贍其乏三子並得成長同縣俞陽妻莊年九十莊女闌七十並老病無所依世期餽之二十年死並殯葬宗親嚴弘鄉人潘伯等十五人荒年並餓死露骸不收世期買棺殯埋存育孩幼宋元嘉四年有司奏榜門曰義行嚴氏之門復其身徭役蠲租稅十年

吳達吳興烏程人也經荒饑饉係以疾疫父母兄嫂及羣從小功之親男女死者十三人達時病困隣里以葦席裹之埋于村側旣而親屬皆盡唯達夫妻獲全家徒四壁立冬無被褥晝則傭賃夜則伐木燒塲妻亦同達此誠無有懈倦達夜行遇猛獸猛獸輒下道避之暮年中成七墓葬十三棺隣里嘉之葬日悉出赴助送終之事亦儉而周禮達時逆取隣人夫直葬畢衆悉以放之達一無所受皆傭力報答焉太守張崇之三加禮命太守王韶之擢補功曹史達以門寒固辭不就舉爲孝廉潘綜吳興烏程人也孫恩之亂祿黨攻破村邑綜與父驪共走避賊驪年老行遲賊轉逼驪語綜我不能去汝走可脫幸勿俱死驪

困乏坐地綜迎賊叩頭曰父年老乞賜生命賊至驃亦請賊曰兒年少自能走今爲老子不去老子不惜死乞活此兒賊因斫驃綜抱父於腹下賊斫綜頭面凡四創綜當時悶絕有一賊從傍來相謂曰卿欲舉大事此兒以死救父云何可殺殺孝子不祥賊乃止父子並得免鄉人祕書監卮系祖廷尉沈赤黔以綜異行薦補左戶令史除遂昌長歲滿還家太守王韶之臨郡發教列上州臺陳其行跡及將行設祖道贈以四言詩元嘉四年有司奏改其里爲純孝里蠲租布三世又宋初吳郡人陳遺少爲郡吏母好食鍋底飯遺在役恆帶一囊每煮食輒錄其焦以貽母後孫恩亂聚得數升恆帶自隨及敗逃竄多有餓死遺以此得活母晝夜泣涕目爲失明耳無所聞遺還入戶再拜號咽母豁然卽明後又有河南孝廉秦繇遭母喪送葬不忍復還鄉人爲作茅菴仍止其中若遇有米則食粥無米食菜而已哀號之聲行者爲之潸淚服訖猶不還家遇疾不療卒臨亡告人曰若死者無知固不宜獨存有知則大獲吾志

張進之永嘉固人也爲郡大族少有志行歷五官主簿永嘉固二縣領校尉家世富足經荒年散財救贖鄉里遂以貧罄全濟者甚多太守王味之有罪當見收逃避進之家供奉經時盡其誠力味之嘗避地墮水沉沒進之投水天拯救相與沉淪久而得免時劫掠充斥每入村抄暴至進之門輒相約不得侵犯其信義所感也此元嘉初詔在所蠲其徭役又孫恩之亂永嘉太守司馬逸之被害妻子並死兵寇之

際莫敢收藏郡吏俞僉以家財冒難棺斂逸之等六喪送至都葬畢乃歸鄉里元嘉中老病卒時又益州梓潼人張楚母疾命在屬續楚祈禱苦至燒指自誓精誠感悟疾時得愈見榜門曰孝行張氏之閭易其里爲孝行里蠲租布三世身加旌命

卮傑字偉跽吳興烏程人也十四遭喪以熟茶有味不嘗於口歲餘忽夢見母曰死止是分別耳何事乃爾茶苦汝噉生茶遇蝦蟇毒靈牀前有三丸藥可取服之傑驚起果得甦甦中有藥服之下科斗子數升卮氏世保此甦大明七年災火焚失之

師覺授字覺授南陽涅陽人也與外兄宗少文並有素業以琴書自娛於路忽見一人持書一函題曰至孝師君苦前俄而不見捨車奔歸聞家哭聲一叫而絕良久乃蘇後撰孝子傳八卷宋臨川王義慶辟爲州祭酒主簿並不就乃表薦之會卒

王彭旰台直瀆人也少喪母元嘉初父又喪亡家貧力弱無以營葬兄弟二人晝則傭力夜則號感鄉里並哀之乃各出夫力助作塋塋須水而天旱穿井數十丈泉不出墓處去淮五里荷擔遠汲困而不周彭號天自訴如此積日一旦大霧霧歇塋竈前忽生泉水鄉隣助之者並嗟神異縣邑近遠悉往觀之葬竟水便自竭元嘉九年太守劉伯龍依事表言改其里爲通靈里蠲租布三世

蔣恭義興臨津人也元嘉中晉陵蔣崇平爲劫見禽云與恭妻弟吳晞張爲侶晞張先行不在本村遇水妻息避水移寄恭家時錄晞張不獲禽收恭及兄協付獄科罪恭協並款舍住晞張家口而不知劫情恭列晞張妻息是婦之親親今有罪恭身甘分求免兄協協列是戶主求免弟恭兄弟二人爭求受罪郡縣不能制依事上詳州議以爲並不合罪後除恭義成令協義招令

徐耕晉陵延陵人也元嘉二十一年大旱人飢耕詣縣陳辭以米千斛助官振貸縣爲言上當時議以耕比漢卜式詔書褒美酬以縣令大明八年東土飢旱東海嚴成東莞王道蓋各以私穀五百餘斛助官振

卹

孫法宗一名宗之吳興人也父隨孫恩入海溢被害屍骸不收母兄並俄死法宗年小流迸至十六方得還單身勤苦露行草宿營辦棺槨造立冢墓葬送母兄儉而有禮以父屍不測入海尋求世間論是至親以血瀝骨當悉凝浸乃操刀浴海見枯骸則刻肉灌血如此十餘年臂脛無完皮血脉枯竭終不能逢遂衰經終身常居墓所山禽野獸皆悉馴附每屬鹿觸網必解放之償以錢物後忽苦頭創夜有女人至曰我是天使來相謝行創本不關善人使者遠相及取牛糞煮傅之卽驗一傅便差一境賴之終身不娶饋遺無所受宋孝武初揚州辟爲文學從事不就卒

范叔孫吳郡錢唐人也少而仁厚周窮濟急同里范法先父母兄弟七人同時疫死唯餘法先病又危篤喪屍經日不收叔孫悉備棺器親爲殯埋又同里施夫疾病父死不殯范苗父子並亡范敬宗家口六人俱得病二人喪沒親隣長遠莫敢營視叔孫並爲殯瘞躬卹病者並皆得全鄉曲貴其義行莫有呼其名者宋孝武孝建初除竟陵王國中軍不就義興吳國夫亦有義讓之美人有竊其稻者乃引還爲設酒食以米送之

卜天與吳興餘杭人也父名祖宋武帝聞其有幹力召補隊主從征伐封關中侯歷二縣令天與善射弓力兼倍容貌嚴毅笑不解顏文帝以其舊將使教皇子射元嘉二十九年爲廣威將軍領左細仗元凶入弑事變倉卒舊將羅訓徐牢皆望風屈謝天與不暇被甲執刀持弓疾呼左右出戰徐牢曰殿下入汝欲何爲天與罵曰殿下常來去云何卽時方作此語只汝是賊手射劬於東堂幾中逆徒擊之臂斷乃見殺其隊將張弘之朱道欽陳滿與天與同出拒戰並死孝武卽位贈天與龍驤將軍益州刺史謚曰壯侯車駕臨哭弘之等各贈郡守給天與家長廩子伯宗殿中將軍明帝泰始初領幢擊南賊於赭圻戰沒伯宗弟伯興官至南平昌太守直閣領細仗隊主昇明元年與袁粲同謀伏誅天與弟天生少爲隊將十人同火屋後有一坑廣二丈餘十人共跳之皆度唯天生墜天生乃取實中苦竹剡其端使利交橫布坑內更



呼等類共跳並懼不敢天生乃復跳之往反十餘曾無留礙衆並歎服以兄死節爲孝武所留心大明末爲弋陽太守明帝泰始初與殷琰同逆被斬

許昭先義興人也叔父肇之坐事繫獄七年不判子姪二十許人昭先家最貧薄專獨料訴無日在家餉饋肇之莫非珍新資產既盡賣宅以充之肇之諸子倦怠唯昭先無有懈怠如是七載尙書沈演之嘉其操行肇之事由此得釋昭先舅夫妻並疫病死亡家貧無以殯送昭先賣衣物以營殯葬舅子三人並幼贍護皆得成長昭先父母皆老病家無僮役竭力致養甘旨必從宗黨嘉其孝行雍州刺史劉真道板爲征虜參軍昭先以親老不就補迎主簿昭先以叔未仕又固辭

余齊人晉陵人也少有孝行爲邑書吏宋大明二年父殖在家病亡信未至齊人謂人曰比肉痛心煩有如割截居常惶駭必有異故信尋至以父病報之四百餘里一日而至至門方知父死號踊慟絕良久乃蘇問父所遺言母曰汝父臨終恨不見汝齊人卽曰相見何難於是號叫殯所須與便絕州縣上言有司奏改其里爲孝義里蠲租布賜其母穀百斛

孫棘彭城人也宋大明五年發三五丁弟薩應充行坐違期不至棘詣郡辭列棘爲家長令弟不行罪應百死乞以身代薩薩又辭列自引太守張岱疑其不實以棘薩各置一處報云聽其相代顏色並悅甘心



赴死棘妻許又寄語屬棘君當門戶豈可委罪小郎且大家臨亡以小郎屬君竟未妻娶家道不立君已  
有二兒死復何恨岱依事表上孝武詔特原罪州加辟命并賜帛二十疋先是新蔡徐元妻許二十一喪  
夫子甄年三歲父攬愍其年少以更適同縣張買許自誓不行父逼載送買許自經氣絕家人奔赴良久  
乃蘇買夜送還攬許歸徐氏養元父季元嘉中八十餘卒又明帝泰始二年長城吳慶恩殺同郡錢仲期  
子延慶屬役在都聞父死馳還於庾浦埭逢慶恩手刃殺之自繫烏程獄吳興太守郗顯表不加罪許之  
何子平廬江灣人也曾祖楷晉侍中祖友會稽王道子驃騎諮議叅軍父子先建安太守子平世居會稽  
少有志行母至孝揚州辟從事史月奉得白米輒貸市粟麥人曰所利無幾何足爲煩子平曰尊者在  
東不辦得米何心獨饗白粲每有贈鮮肴者若不可寄致至家則不肯受母本側庶籍注失實實未及養  
而籍年已滿便去職歸家時鎮軍將軍顧覲之爲州上綱謂曰尊上年實未八十親故所知州中差有微  
祿當敢相留子平曰公家正取信黃籍籍年既至便應扶持何容苟冒榮利乃歸家竭力供養元嘉二十  
年元凶弑逆隨王誕入討以爲行叅軍子平以凶逆滅理故廢已受職事寧自解未除吳郡海虞令縣祿  
唯供養母一身不以及妻子人疑其儉薄子平曰希祿本在養親不在爲己問者慙而退母喪去官哀毀  
踰禮每至哭踊頓絕方蘇屬大明末東土飢荒繼以師旅八年不得營葬晝夜號哭常如祖括之日冬不

衣絮暑不避清涼一日以數合米爲粥不進鹽菜所居屋敗不蔽風日兄子伯興欲爲葺理子平不肯曰我情事未申天地一罪人耳屋何宜覆蔡興宗爲會稽太守甚加矜賞爲營冢壙子平居喪毀甚及免喪殆至不立幼持操檢敦厲名行雖處閭室如接大賓學義堅明處之以默安貧守善不求榮進好退之士彌以此貴之卒年六十

崔懷順清河東武城人也父邪利魯郡太守宋元嘉中爲魏所獲懷順與妻房氏篤愛聞父見虜卽日遣妻布衣蔬食如居喪禮歲時北向流涕邪利後仕魏書戒懷順不許如此懷順得書更號泣懷順從叔模爲滎陽太守亦入魏模子雖居處改節不廢婚宦宋大明中懷順宗人冀州刺史元孫北使魏魏人問之曰崔邪利模並力屈歸命二家子姪出處不同義將安在元孫曰王尊驅驥王陽回車欲令忠孝並弘臣子兩遂泰始初淮北入魏懷順因此歸北至代都而邪利已卒懷順絕而後蘇載喪還青州徒跣冰雪土氣寒酷而手足不傷時人以爲孝感喪畢以弟在南齊建元初又逃歸而弟已亡懷順孤貧宗黨哀之日斂給其斗米永明中卒

王虛之字文靜廬江石陽人也十三喪母三十三喪父二十五年鹽酢不入口疾病著牀忽有一人來問疾謂之曰君病尋差俄而不見病果尋差庭中楊梅樹隆冬三實又每夜所居有光如燭墓上楠樹一冬

再寶時人咸以爲孝感所致齊永明中詔榜門蠲其三世時又有顧昌衍江柔之江軻並以篤行知名昌衍吳人居喪幾致滅性王儉言之天子曰昌衍既有至行且張永之甥宜居禮闈以光郎署乃以爲尙書庫部郎柔之軻並濟陽人柔之字叔達孝悌通亮亦至臺郎軻字伯倫貞嚴有行宗人江槩位至侍中性豪侈唯見軻則敬揖焉

吳慶之字文悅濮陽人也寓居江興宋江夏王義恭爲揚州召爲西曹書佐及義恭誅慶之自傷爲吏無狀不復肯仕終身蔬食後王琨爲吳興太守欲召爲功曹答曰走素無人世情直以明府見接有禮所以奔走歲時若欲見吏則是蓄魚於樹栖鳥於泉耳不辭而退琨追謝之望塵不及矣

蕭叡明字景濟南蘭陵人也母病風積年沉臥叡明晝夜祈禱時寒叡明下淚爲之冰如筋額上叩頭血亦冰不溜忽有一人以小石函授之曰此療夫人病叡明跪受之忽不見以函奉母函中唯有三寸絹丹書爲日月字母服之卽平復于時秣陵朱緒無行母病積年忽思菹羹緒妻到市買菹爲羹欲奉母緒曰病復安能食先嘗之遂併食盡母怒曰我病欲此羹汝何心併啖盡天若有知當令汝啜死緒便聞心中介介然卽利血明日而死叡明聞之大悲慟不食積日問緒尸在何處欲手自戮之旣而曰滌吾刀乃止永明五年居母喪不勝哀卒詔贈中書郎時又有鮮于文宗漁陽人年七歲喪父父以種芋時亡至明年

芋時對芋嗚咽如此終身姊文英適荀氏七日而夫亡執節不嫁及母卒晝夜哭泣遂喪明

蕭嬌妻羊字淑禕性至孝居父喪哭輒吐血母嘗有疾淑禕於中夜祈禱忽見一人在樹下自稱枯桑君曰若人無患令泄氣在亥西南求白石鎮之言訖不見明日如言而疾愈又時有羊緝之女佩任者烏程人隨母還舅氏母亡晝夜號哭不飲食三日而亡鄉里號曰女表又有晉陵吳康之妻趙氏父亡弟幼遇歲饑母老病篤超詣鄉里告乞言辭哀苦鄉里憐之各分升米遂得免及嫁康之少時夫亡家欲更嫁誓言不貳焉又義興蔣雋之妻黃氏夫亡不重嫁家逼之欲自殺乃止建元三年詔蠲表門閭又會稽永興吳翼之母丁氏少喪夫性仁愛遭年荒分衣食以飴里中飢餓者隣里求借未嘗違同里陳壤父母死孤單無親戚丁收養之及長爲營婚娶又同里王禮妻徐荒年客死丁陰爲買棺器自往斂葬元徽末大雪商旅斷行村里比室飢餓丁自出鹽米計口分賦同里左僑家露四喪無以葬丁爲辦冢椁有三調不登者代爲送丁長子婦王氏守寡執志不再醮州郡上言詔表門閭蠲租稅又會稽寒人陳氏有三女無男祖父母年八九十老無所知父篤癰病母不安其室遇歲饑三女相率於西湖採菱尊更日至市貨賣未嘗虧怠鄉里稱爲義門多欲娶爲婦長女自傷毀獨誓不肯行祖父母尋相繼卒三女自營殯葬爲菴舍居墓側又永興概中里王氏女年五歲得毒病兩目皆盲性至孝年二十父死臨尸一叫眼皆血出小妹

娥誅其血左目卽開時人稱爲孝感又諸暨東灣里屠氏女父失明母瘡疾親戚相棄鄉里不容女移父母遠住紉會晝採樵夜紡績以供養父母俱卒親營殯葬負土成墳忽空中有聲云汝至性可重山神欲相驅使汝可爲人療病必得大富貴女謂是魃魅弗敢從遂得病積時隣舍人有溪蟻毒者女試療之自覺病便差遂以巫道爲人療疾無不愈家產日益鄉里多欲娶之女以無兄弟誓守墳墓不嫁爲山劫所殺又吳興乘公濟妻姚氏生二男而公濟及兄公願乾伯並卒各有一子姚養育之賣田宅爲取婦自與二男寄比隣家明帝詔爲其二子婚表閭復徭役又吳郡范法恂妻褚氏亦勤苦執婦業宋昇明中孫曇瓘謀反亡命褚謂其子僧簡曰孫越州先姑之姊子與汝父親則從母兄弟交則義重古人逃竄脫不免汝宜收之曇瓘尋伏法褚氏令僧簡往斂葬年七十餘永明中卒僧簡在都聞病馳歸未至褚已卒將殯舉尸不起尋而僧簡至焉

公孫僧遠會稽剡人也居父喪至孝事母及伯父甚謹年饑僧遠省飡減食以養母及伯父兄弟亡貧無以葬身自販貼與隣里供斂送終之費躬負土手種松柏兄姊未婚嫁乃自賣爲之成禮名聞郡縣齊高帝卽位遣兼散騎常侍虞炎等十二部使表列僧遠等二十三人詔並表門閭蠲租稅

吳欣之晉陵利城人也宋元嘉末弟慰之爲武進縣吏隨王誕起義元凶遣軍主華欽討之吏人皆散慰



之獨留見執將死欣之詣欽乞代弟命辭淚哀切兄弟皆見原齊建元三年有詔蠲表之永明初廣陵人童超之二息犯罪爭死太守劉俊表以聞

韓係伯襄陽人也事父母謹孝襄陽人隣居種桑樹於界上爲誌係伯以桑枝蔭妨他地遷界上開數尺隣畔隨復侵之係伯輒更改種久之隣人慙愧還所侵地躬往謝之齊建元三年蠲表門閭以壽終時有吳興人聞人暨年十七結客報父仇爲高帝所賞位至長水校尉

巨冠先字道玄吳興烏程人也少有節義齊永明中位給事中時求使蠕蠕國尙書令王儉言冠先雖名位未升而義行甚重若爲行人則蘇武鄭衆之流也於是使蠕蠕蠕蠕逼令拜冠先執節不從以刃臨之冠先曰能殺我者蠕蠕也不能以天子使拜戎狄者我也遂見殺武帝以冠先不辱命賜其子雄錢一萬布三十疋雄不受詣闕上書曰臣父執節如蘇武守死如谷吉遂不書之良史甄之褒策萬代之後誰死社稷建元四年車僧朗銜使不異抗節是同詔贈正員外郎此天朝舊準臣父成例也今僧朗反葬冢塋臣父漣棄絕域語忠烈則亦不謝車論荼苦則彼優而此劇名位不殊禮數宜等乞申哀贈書奏不省孫淡太原人也世居長沙事母至孝母疾不眠食以羞爲期母哀之後有疾不使知也齊建元三年蠲表



華寶晉陵無錫人也父豪晉議熙末戍長安年八歲臨別謂寶曰須我還當爲汝上頭長安陷寶年至七十不婚冠或問之寶輒號慟日不忍答也同郡薛天生母遭艱菜食天生亦菜食母未免喪而死天生終身不食魚肉又同郡劉懷胤與弟懷則年十歲遭父喪不衣絮帛不食鹽菜齊建元三年並表門閭解叔謙字楚梁鴈門人也母有疾叔謙夜於庭中稽顙祈福聞空中語云此病得了公藤爲酒便差卽訪醫及本草注皆無識者乃求訪至宜都郡遙見山中一老公伐木問其所用答曰此丁公藤療風尤驗叔謙便拜伏流涕具言來意此公愴然以四段與之并示以漬酒法叔謙受之顧視此人不復知處依法爲酒母病卽差齊建武初以奉朝請徵不至時又有宗元卿庾震朱文濟匡昕魯康祚謝昌寓皆有素履而叔謙尤高元卿字希蔣南陽人有至行早孤爲祖母所養祖母病元卿在遠輒心痛大病則大痛小病則小痛以此爲常鄉里宗事之號曰宗曾子震字彥文新野人喪父母居貧無以葬負書以營事至手掌穿然後葬事獲濟南陽劉虬因此爲撰孝子傳文濟字敬達吳興人自賣以葬母太守謝濬命爲儒林不就昕字令先廬陵人有至性隱金華山服食不與俗人交母病亡已經日昕奔還號叫母卽蘇皆以爲孝感所致康祚扶風人亦有至行母患乳癰諸醫療不愈康祚乃跪兩手捧癰大悲泣母卽覺小寬因此漸差時人以其有冥應康祚位至屯騎校尉昌寓陳郡人也爲劉俊廣州叅軍孝性甚至嘗養一鵠昌寓病二

旬而鵠二旬不食昌寓亡而鵠遂飛去

韓靈敏會稽剡人也早孤與兄靈珍並有孝性母尋又亡家貧無以營凶兄弟共種瓜朝採瓜子暮生已復遂辦葬事靈珍亡無子妻胡氏守節不嫁慮家人奪其志未嘗告歸靈敏事之如母

劉渢字處和南陽人也父紹仕宋位中書郎渢母早亡紹被敕納路太后兄女爲繼室渢年數歲路氏不以爲子奴婢輩捶打之無期度渢母亡日輒悲啼不食彌爲婢輩所苦路氏生濂兄渢怜愛之不忍捨恆在牀帳側輒被驅捶終不肯去路氏病經年渢晝夜不離左右每有增加輒流涕不食路氏病差感其意慈愛遂隆路氏富盛一旦爲渢立齋宇筵席不減侯王濂有識事渢過於同產事無大小必諮兄而後行渢妹適江祜弟禧與祜兄弟異常自尙書比部郎後爲遙光諮議專知腹心任時遙光任當顧託朝野向渢如雲渢忌之求出爲丹陽丞雖外遷而意任無改及遙光舉事巨方召渢渢以爲宜悉呼佐史渢之徒丹陽丞也遙光以蕭懿第四弟晉安王之文學暢爲諮議領錄事及召入遙光謂曰劉暄欲有異志今夕當取之遙光去歲暴風性乖錯多時方愈暢曰公去歲違和今欲發動顧左右急呼師視脉遙光厲聲曰諮議欲作異邪因訶令出須臾渢入暢謂曰公昔年風疾今復發渢曰卿視今夕處分云何而作此語及迎垣厯生至與渢俱勸夜攻臺旣不見納渢厯生並撫膺曰今欲作賊而坐守此城今年坐公滅族矣

及遙光敗，胤靜坐園舍，濂爲度支郎，亦奔亡。遇胤，仍不復肯去。胤曰：「吾爲人作吏，自不避死，汝可去無相守。同盡。」答曰：「向若不逢兄，亦草間苟免。今旣相逢，何忍獨生？」因以衣帶結兄衣，俱見殺。何胤聞之，歎曰：「兄死，君難弟死，兄禍美哉！」又柳叔夜，河東人。父宗，宋黃門郎。叔夜年十六，爲新野太守，甚有名績。補遙光諮議參軍，及事敗，左右扶上馬，欲與俱亡。答曰：「吾已許始安，以死豈可負之也？」遂自殺。

封延伯，字仲連，渤海人也。世爲州郡著姓，寓居東海。三世同財，爲北州所宗。附延伯好學，退讓事寡嫂甚謹。坦崇祖爲兗州，請爲長史，不就。崇祖軾其門，不肯相見。後爲豫州，上表薦之。詔書優禮，起家爲平西長史。梁郡太守爲政清靜，有高士風，俄以疾免。還東海，于時四州八魏士子皆依海曲，爭往宗之。如遼東之仰邴原也。建元三年，大使巡行天下，義興陳玄子四世同居，一百七口。武陵邵榮興、文獻叔並八世同居。東海徐生之、武陵范安祖、李聖伯、范道根並五世同居。零陵譚弘寶、衡陽何弘華、陽黑頭、疎從四世同居。詔俱表門閭蠲租稅。又蜀郡王續、祖華、陽郝道福並累世同爨。建武三年，明帝詔表門閭調役。吳達之，義興人也。嫂亡，無以葬，自賣爲十夫客，以營冢。椁從，祖弟敬伯夫妻荒年被略，賣江北。達之有田十畝，貸以贖之，與同財共宅。郡命爲主簿，因以讓兄。又讓世舊田與族弟，弟亦不受。田遂閑廢。齊建元三年，詔表門閭，先是有蔡曇智鄉里號，蔡曾子廬江何伯璵兄弟鄉里號，爲何展禽，並爲高士。沈顛所重。

云聞蔡曇智之風怯夫勇鄙夫有立志聞何伯瑱之風僞夫正薄夫厚云伯瑱與弟幼瑱俱厲節操養孤  
兄子及長爲婚推家業盡與之安貧枯槁誨人不倦郡守下車莫不修謁伯瑱卒幼瑱末好佛法翦落長  
齋持行精苦梁初卒兄弟年八十餘

王文殊字令章吳興故鄣人也父沒魏文殊思慕泣血終身蔬食不衣帛服麻縵而已不婚不交人物吳  
興太守謝朓聘爲功曹不就立小屋於縣西端拱其中歲時伏臘月朝十五未嘗不北望長悲如此三十  
餘年太守孔瑒之表其行鬱林詔榜門改所居爲孝行里

樂頤之字文德南陽涅陽人也世居南郡少而言行和謹仕爲京府叅軍父在郢病亡頤之忽悲戀涕泣  
因請假還中路果得父凶問便徒跣號咷出陶後渚遇商人附載西上水漿不入口數日嘗遇病與母隔  
壁忍病不言嚙被至碎恐母之哀己也湘州刺史王僧虔引爲主簿以同僚非人棄官去吏部郎庾杲之  
嘗往候頤之爲設食唯枯魚菜菹杲之曰我不能食此母聞之自出常膳魚羹數種杲之曰卿過於茅季  
偉我非郭林宗仕至郢州中從事

弟預字文介亦至孝父臨亡執手以託郢州行事王英預悲感悶絕吐血數升遂發病官至驃騎錄事參  
軍隆昌末預謂丹陽尹徐孝嗣曰外傳藉藉似有伊周之事君蒙武帝殊常之恩荷託付之重恐不得同

人此事人笑褚公至今齒冷無爲効尤孝嗣故吏吳興沈昇之亦說之曰昇之與君俱有項領之功今一言而二功俱解豈願聞之乎君受恩二祖而更參惟新之政以君爲反覆人事成則無處逃咎矣昇之草萊百姓言出禍已隨之孰與超然謝病高枕家園則與松柏比操風霜等烈豈不美邪孝嗣並改容謝之預建武中爲永世令人懷其德卒官時有一媪年可六七十擔糶葉造市貨之聞預亡大泣棄溪中曰失樂令我輩孤獨老姥政應就死耳市人亦皆泣其感化如此

江泌字士清濟陽考城人也父亮之員外郎泌少貧晝日斫屨爲業夜讀書隨月光光斜則握卷升屋睡極墮地則更登性行仁義衣弊緇多綿裹置壁上恐蠶飢死乃復置衣中數日間終身無復蠶母亡後以上闕供養過鮭不忍食菜不食心以其有生意唯食老葉而已母墓爲野火所燒依新宮災三日哭淚盡纒之以血歷仕南中郎行參軍所給募吏去役得時病莫有舍之者吏扶杖投泌泌自隱卹吏死泌爲買棺無僮役兄弟共輿埋之後領國子助教乘車至梁烏頭見一老公步行下車載之躬自步去梁武帝以爲南康王子琳侍讀建武中明帝害諸王後泌憂念子琳訪誌公道人問其禍福誌公覆香鑪灰示之曰都盡無餘及子琳被害泌往哭之淚盡續以血親視殯葬畢乃去泌尋卒族人兗州中從事泌黃門郎愈子也與泌同名世謂泌爲孝泌以別之



庾道愨潁川臨陵人晉司空冰之玄孫也有孝行頗能屬文少出孤悴時人莫知其所生母流漂交州道愨尚在襁褓及長知之求爲廣州綏寧府佐至南而去交州尙遠乃自負擔冒險僅得自達及至交州尋求母雖經年日夜悲泣嘗入村日暮雨驟乃寄止一家且有一嫗負薪外還而道愨心動因訪之乃其母也於是行伏號泣遠近赴之莫不揮淚道愨尤精相板宋明帝時山陽王休祐屢以言語忤顏見道愨託以己板爲他物令道愨占之道愨曰此乃甚貴然使人多愆忤休祐以褚彥回詳密求換其板他日彥回侍明帝自稱下官帝多忌甚不悅休祐具以狀言帝乃意解道愨仕齊位射聲校尉族孫沙彌亦以孝行著

沙彌晉司空冰之六世孫也父佩玉仕宋位長沙內史昇明中坐沈攸之事誅時沙彌始生及年五歲所生母爲製采衣輒不肯服母問其故流涕對曰家門禍酷用是何爲及長終身布衣蔬食爲中軍田曹行參軍嫡母劉氏寢疾沙彌晨昏侍側衣不解帶或應針灸輒以身先試及母亡水漿不入口累日初進大麥薄飲經十旬方爲薄粥終喪不食鹽酢冬日不衣綿纈夏日不解衰絰不出廬戶晝夜號慟憐人不忍聞所坐薦淚霑爲爛墓在新林忽生旅松百許株枝葉鬱茂有異常松劉好噉甘蔗沙彌遂不食焉宗人鄒官尙書蘇表言其狀應純孝之畢梁武帝召見嘉之以補欵令還除輕車邵陵王參軍事隨府會稽復



丁所生憂喪還都濟浙江中流遇風舫將覆沒沙彌抱柩號哭俄而風靜咸以爲孝感所致後卒於長城  
令子持

持字元德少孤性至孝父憂居喪過禮篤志好學仕梁爲尚書左戶郎後兼建康監陳文帝爲吳興太守  
以爲郡丞兼掌書翰天嘉初爲尚書左丞封崇德縣子拜封之日請令史爲客受其餉遣文帝怒之因坐  
免後爲臨安令坐杖殺人免還爲給事黃門侍郎歷鹽官令祕書監知國史事又爲少府卿遷太中大夫  
領步兵校尉卒持善字書每屬辭好爲奇字文士亦以此譏之有集十卷

南史卷七十三

南史卷七十三考證

孫法宗傳一境賴之○監本缺賴字今增入

余齊人傳余齊人晉陵人也○晉陵下閣本尙有晉陵二字

何子平傳元嘉二十年元凶弒逆○二係三之訛

蕭矯妻羊傳同里陳攘父母死孤單無親戚丁收養之○攘一本作穰

又同里王禮妻徐荒年客死丁陰爲買棺器自往斂葬○丁一本作山當以此爲正

隣舍人有溪蠚毒者女試療之○蠚監本作蠚今改从閣本

鄉里多欲娶之○娶監本訛要今改正

褚氏令僧簡往斂葬○往監本誤猛今改从閣本



南史卷七十四

唐

李

延

壽

撰

列傳第六十四

孝義下

滕曇恭

徐普濟張佛等

陶季直

沈崇傑

荀匠

吉翊

甄恬

趙拔扈

韓懷明

褚修

張景仁

宛陵女子劉景昕

衛敬瑜妻王

陶子鏘

成景傷

李慶緒

謝蘭

子貞

殷不害

弟不佞

司馬嵩

張昭

弟乾王知玄

滕曇恭豫章南昌人也年五歲母楊氏患熱思食寒瓜土俗所不產曇恭歷訪不能得銜悲哀切俄遇一桑門問其故曇恭具以告桑門曰我有兩瓜分一相遺還以與母舉室驚異尋訪桑門莫知所在及父母卒曇恭並水漿不入口者旬日感慟嘔血絕而復蘇隆冬不著繭絮蔬食終身每至忌日思慕不自堪晝夜哀慟其門外有冬生樹二株時忽有神光自樹而起俄見佛像及夾侍之儀容光顯著自門而入曇恭家人大小咸共禮拜久之乃滅遠近道俗咸傳之太守王僧虔引曇恭為功曹固辭不就王儉時隨僧虔在郡號為滕曾子梁天監元年陸璣奉使巡行風俗表言其狀曇恭有子三人皆有行業時有徐普濟者

長沙臨湘人居喪未葬而隣家火起延及其舍普濟號慟伏棺上以身蔽火隣人往救之焚灸已悶絕累日方蘇又有建康人張悌家貧無以供養以情告隣富人富人不與不勝忿遂結四人作劫所得衣物三劫持去實無一錢入己縣抵悌死罪悌兄松訴稱與弟景是前母子後母唯生悌松長不能教誨乞代悌死景又曰松是嫡長後母唯生悌若從法母亦不全亦請死母又云悌應死豈以弟罪枉及諸兄悌亦引分金兩兄供養縣以上讞帝以爲孝義特降死後不得爲例

陶季直丹陽秣陵人也祖愨祖宋廣州刺史父景仁中散大夫季直早慧愨祖甚愛異之嘗以四函銀列置於前令諸孫各取其一季直時年四歲獨不取曰若有賜當先父伯不應度及諸孫故不取愨祖益奇之五歲喪母哀若成人初母未病令於外染衣卒後家人始贖季直抱之號慟聞者莫不酸感及長好學澹於榮利徵召不起時人號曰聘君後爲望蔡令以病免時劉彥節袁粲以齊高帝權盛將圖之彥節素重季直欲與謀季直以袁劉儒者必致顛殞固辭不赴俄而彥節等敗齊初爲尙書比部郎時褚彥回爲尙書令素與季直善頗以爲司空司徒主簿委以府事彥回卒尙書令王儉以彥回有至行欲諡文孝公季直曰文孝是司馬道子諡恐其人非具美不如文簡儉從之季直又請爲彥回立碑始終營護甚有吏節再遷東莞太守在郡號爲清和後爲鎮西諮議參軍齊武帝崩明帝作相誅鋤異己季直不能阿意取



睿明帝頗忌之出爲輔國長史北海太守邊職上佐素士罕爲之者或勸季直造門致謝明帝留以爲驃騎諮議參軍兼尙書左丞遷建安太守爲政清靜百姓便之梁臺建爲給事黃門侍郎常稱仕至二千石始願畢矣無爲久預人間事乃辭疾還鄉里梁天監初就拜太中大夫武帝曰梁有天下遂不見此人十年卒于家季直素清苦絕倫又屏居十餘載及死家徒四壁子孫無以殯斂聞者莫不傷其志事云

沈崇僚字思整吳興武康人也父懷明宋兗州刺史崇僚六歲丁父憂哭踊過禮及長事所生母至孝家貧常傭書以養天監二年太守柳惲辟爲主簿崇僚從惲到郡還迎其母未至而母卒崇僚以不及侍疾將欲致死水漿不入口晝夜號哭旬日殆將絕氣兄弟謂曰殯葬未申遽自毀滅非全孝道也崇僚心悟乃稍進食母權瘞去家數里哀至輒之瘞所不避雨雪每倚墳哀慟飛鳥翔集夜恆有猛獸來望之有聲狀如歎息者家貧無以遷厝乃行乞經年始獲葬焉旣而廬于墓側自以初行喪禮不備復以葬後更行服三年久食麥屑不噉鹽酢坐臥於單薦因虛腫不能起郡縣舉至孝梁武聞卽遣中書舍人慰勉之乃詔令釋服擢補太子洗馬旌其門閭崇僚奉詔釋服而涕泣如居喪固辭不受官乃除永寧令自以祿不及養哀思不自堪未至縣卒

荀匠字文師潁陰人晉太保勗九世孫也祖瓊年十五復父仇於成都市以孝聞宋元嘉末度淮逢武陵

王舉義爲元凶追兵所殺贈員外散騎侍郎父法超仕齊爲安復令卒官匠號慟氣絕身體皆冷至夜乃蘇旣而奔喪每宿江渚商侶不忍聞其哭聲梁天監元年其兄斐爲鬱林太守征徕賊爲流矢所中死於陣喪還匠迎于豫章望舟投水傍人赴救僅而得全及至家貧不時葬居父憂并兄服歷四年不出廬戶自括髮不復櫛沐髮皆禿落哭無時聲盡則係之以泣目皆皆爛形骸枯槁皮骨裁連雖家人不復識郡縣以狀言武帝詔遣中書舍人爲其除服擢爲豫章王國左常侍匠雖卽吉而毀頓逾甚外祖孫謙誠之曰主上以孝臨天下汝行過古人故擢汝此職非唯君父之命難拒故亦揚名後世所顯豈獨汝身哉匠乃拜竟以毀卒

吉玆字彥霄馮翊蓮勺人也家居襄陽玆幼有孝性年十一遭所生母憂水漿不入口殆將滅性親黨異之梁天監初父爲吳興原鄉令爲吏所誣逮詣廷尉玆年十五號泣衢路祈請公卿行人見者皆爲隕涕其父理雖清白而恥爲吏訊乃虛自引咎罪當大辟玆乃搥登聞鼓乞代父命武帝異之尙以其童幼疑受教於人敕廷尉蔡法度嚴加脅誘取其款實法度乃還寺盛陳徽纒厲色問曰爾求代父死敕已相許便應伏法然刀鋸至劇審能死不且爾童孺志不及此必爲人所教姓名是誰若有悔異亦相聽許對曰囚雖羸弱豈不知死可畏憚顧諸弟幼藐唯囚爲長不忍見父極刑自延視息所以內斷曾臆上千萬乘

今欲殉身不測委骨泉壤此非細故奈何受人教邪法度知不可屈撓乃更和顏誘語之曰主上知尊侯無罪行當釋亮觀君神儀明秀足稱佳童今若轉辭幸父子同濟奚以此妙年苦求湯鑊玃曰凡鯤鯢蟻蟻尚惜其生況在人斯豈願盡粉但父挂深効必正刑書故思殞仆冀延父命玃初見囚獄掾依法備加桎梏法度矜之命脫其二械更令著一小者玃弗聽曰玃求代父死死囚豈可減乎竟不脫械法度以聞帝乃宥其父丹陽尹王志求其在廷尉故事并諸鄉居欲於歲首舉充純孝玃曰異哉王尹何量玃之薄夫父辱子死斯道固然若玃有覲面目當其此舉則是因父買名一何甚辱拒之而止年十七應辟爲本州主簿出監萬年縣攝官朞月風化大行自雍還郢湘州刺史柳忱復召爲主簿後秣陵鄉人裴儉丹陽郡守臧盾揚州中正張仄連名薦玃以爲孝行純至明通易老敕付太常旌舉初玃以父陷罪因成悖疾後因廢而卒

甄恬字彥約中山無極人也世居江陵數歲喪父哀感有若成人家人矜其小以肉汁和飯飼之恬不肯食年八歲嘗問其母恨生不識父遂悲泣累日忽若有見言形貌則其父也時以爲孝感家貧養母常得珍羞及居喪廬於墓側恆有烏玄黃雜色集於廬樹恬哭則鳴哭止則止又有白鳩白雀栖宿其廬州將始興王憺表其行狀詔旌表門閭加以爵位恬官至安南行參軍

趙拔扈新城人也兄震動富於財太守樊文茂求之不已震動怒曰無慮將及我文茂聞其語聚其族誅之拔扈走免亡命聚黨至社樹呪曰文茂殺拔扈兄今欲報之若事克斫樹處更生不克卽死三宿三積生十丈餘人間傳以爲神附者十餘萬旣殺文茂轉攻傍邑將至成都十餘日戰敗退保新城求降文茂黎州刺史文熾弟襄陽人也

韓懷明上黨人也客居荊州十歲母患尸疰每發輒危殆懷明夜於星下稽顙祈禱時寒甚切忽聞香氣空中有人曰童子母須臾永差無勞自苦未曉而母平復鄉里以此異之十五喪父幾至滅性負土成墳賻助無所受免喪與鄉人郭麻俱師南陽劉虬虬嘗一日廢講獨居涕泣懷明竊問虬家人答云是外祖亡日時虬母亦已亡矣懷明聞之卽日罷學還家就養虬歎曰韓生無巨吾之恨矣家貧肆力以供甘脆嬉怡膝下朝夕不離母側母年九十以壽終懷明水漿不入口一旬號哭不絕聲有雙白鳩巢其廬上宇乳馴狎若家禽焉服釋乃去及除喪蔬食終身衣食無所改梁天監初刺史始興王憺表言之州累辟不就卒于家

褚脩吳郡錢塘人也父仲都善周易爲當時之冠梁天監中歷位五經博士脩少傳父業武陵王紀爲揚州引爲宣惠參軍兼限內記室脩性至孝父喪毀瘠過禮因患冷氣及丁母憂水漿不入口二十三日每

號慟輒嘔血遂以毀卒

張景仁廣平人也父梁天監初爲同縣章法所殺景仁時年八歲及長志在復讐普通七年遇法於公田渚手斬其首以祭父墓事竟詣郡自縛乞依刑法太守蔡天起上言於州時簡文在鎮乃下教褒美之原其罪下屬長蠲其一戶租調以旌孝行又天監中宣城宛陵女子與母同床眠母爲猛獸所取女啼號隨擊猛獸行數十里獸毛盡落獸乃置其母而去女抱母猶有氣息經時乃絕鄉里言於郡縣太守蕭琮表上詔榜其門閭又霸城王整之婦嫁爲衛敬瑜妻年十六而敬瑜亡父母舅姑咸欲嫁之誓而不許乃截耳置盤中爲誓乃止遂手爲亡婿種樹數百株墓前栢樹忽成連理一年許還復分散女乃爲詩曰墓前一株栢根連復並枝妾心能感木頽城何足奇所住戶有薏葉常雙飛來去後忽孤飛女感其偏栖乃以縷繫脚爲誌後歲此薏果復更來猶帶前縷女復爲詩曰昔年無偶去今春猶獨歸故人恩旣重不忍復雙飛雍州刺史西昌侯藻嘉其美節乃起樓於門題曰貞義衛婦之閨又表於臺後有河東劉景昕事母孝謹母常病癖三十餘年一朝而瘳鄉里以爲景昕誠感荊州刺史湘東王繹辟爲主簿

陶子鏘字海育丹陽秣陵人也父延尚書比部郎兄尚宋末爲倖臣所怨被繫子鏘公私緣訴流血稽顙行路嗟傷逢謝超宗下車相訪回入縣詣建康令勞彥遠曰豈忍見人昆季如此而不留心勞感之只得



釋母終居喪盡禮與范雲隣雲每聞其哭聲必動容改色欲相申薦會雲卒初子鏞母嗜蓐母沒後恆以  
供奠梁武義師初至此年冬營蓐不得子鏞痛恨慟哭而絕久之乃蘇遂長斷蓐味

成景儻字超范陽人也祖興仕魏爲五兵尙書父安樂淮陽太守梁天監六年常邕和殺安樂以城內附  
景儻謀復讐因殺魏宿預城主以地南入普通六年邕和爲鄱陽內史景儻購人刺殺之未久重購邕和  
家人鳩殺其子弟噍類俱盡武帝義之每爲屈法景儻家讐旣雪每思報効後除北豫州刺史侵魏所向  
必推其智勇時以比馬仙琕兼有政績見懷北豫州吏人樹碑紀德卒諡曰忠烈云

李慶緒字孝緒廣漢郿人也父爲人所害慶緒九歲而孤爲兄所養日夜號泣志在復讐投州將陳顯達  
仍於部伍白日手刃其仇自縛歸罪州將義而釋之梁天監中爲東莞太守丁母憂去職廬于墓側每慟  
嘔血數升後爲巴郡太守號良吏累遷衛尉封安陸縣侯益州一二百年無復貴仕慶緒承恩至此便欲  
西歸尋徙太子右衛率未拜而卒

謝蘭字希如陳郡陽夏人晉太傅安之八世孫也父經北中郎諮議叅軍蘭五歲時父未食乳媪欲令先  
飯蘭終不進舅阮孝緒聞之歎曰此兒在家則曾子之流事君則蘭生之匹因名曰蘭稍授以經史過目  
便能諷誦孝緒每曰吾家陽元也及丁父憂晝夜號慟毀瘠骨立母阮氏常自守視臂抑之服闋吏部尙



書蕭子顯嘉其至行擢爲王府法曹行參軍累遷外兵記室參軍時甘露降士林館蘭獻頌武帝嘉之有詔使製北兖州刺史蕭楷德政碑又奉詔令製宣城王奉述中庸頌後爲兼散騎常侍使魏會侯景入附境上交兵蘭母旣慮不得還感氣而卒及蘭還入境夜夢不祥旦便投列馳歸及至號慟嘔血氣絕久之水漿不入口每哭眼耳口鼻皆血流經月餘日因夜臨而卒所製詩賦碑頌數十篇子貞

貞字元正幼聰敏有至性祖母阮氏先苦風眩每發便一二日不能飲食貞時年七歲祖母不食貞亦不食往往如此母王氏授以論語孝經讀訖便誦八歲嘗爲春日閑居詩從舅王筠奇之謂所親曰至如風定花猶落乃追步惠連矣年十三尤善左氏春秋工草隸蟲篆十四丁父艱號頓於地絕而復蘇者數矣初貞父蘭以憂毀卒家人賓客復憂貞從父洽族兄鬻乃共請華嚴寺長爪禪師爲貞說法仍譬以母須侍養不宜毀滅乃少進饘粥及魏尅江陵入長安鬻逃難番禺貞母出家于宣明寺及陳武帝受禪鬻還鄉里供養貞母將二十年初貞在周嘗侍周武帝愛弟趙王招讀招厚禮之聞其獨處必晝夜涕泣私問知母在鄉乃謂曰寡人若出居藩當遣侍讀還家後數年招果出因辭面奏請放貞還帝奇招仁愛遣隨聘使杜子暉歸國是歲陳太建五年也始自周還時始興王叔陵爲揚州刺史引祠部侍郎阮卓爲記室辟貞爲主簿尋遷府錄事參軍領丹陽丞貞知叔陵有異志因與卓自疎每有宴遊輒以疾辭未嘗參預

叔陵雅重之弗之罪也及叔陵肆逆唯貞與卓不坐再遷南平王友掌記室事府長史汝南周確新除都官尙書請貞爲讓表後主覽而奇之及問知貞所作因敕舍人施文慶曰謝貞在王家未有祿秩可賜米百石以母憂去職頃之敕起還府累啟固辭敕不許貞哀毀羸瘠終不能之官舍吏部尙書姚察與貞友善及貞病篤問以後事貞曰孤子豐禍所集將隨灰壤族子凱等粗自成立已有疏付之此固不足仰塵厚德弱兒年甫六歲名靖字依仁情累所不能忘敢以爲託是夜卒後主問察曰謝貞有何親屬察以靖答卽敕長給衣糧初貞之病有遺疏告族子凱氣絕之後若依僧家尸隄林法是吾所願正恐過爲獨異可用薄板周身載以露車覆以草席坎山次而埋之又靖年尙小未闕人事但可三月施小床設香水盥卿兄弟相厚之情卽除之無益之事勿爲也

殷不害字長卿陳郡長平人也祖汪齊豫章王行參軍父高明梁尙書兵部郎不害性至孝居父憂過禮由是少知名家世儉約居甚貧窶有弟五人皆幼弱不害事老母養小弟勤劇無所不至士大夫以篤行稱之年十七仕梁爲廷尉平長於政事兼飾以儒術名法有輕重不便者輒上書言之多見納用大同五年兼東宮通事舍人時朝政多委東宮不害與舍人庾肩吾直日奏事梁武帝嘗謂肩吾曰卿是文學之士吏事非卿所長何不使殷不害來邪其見知如此簡文以不害善事親賜其母蔡氏錦裙襦氎席被褥

單復畢備侯景之亂不害從簡文入臺及臺城陷簡文在中書省景帶甲將兵入朝陛見過謁簡文左右甚不遜侍衛者莫不驚恐辟易唯不害與中庶子徐摛侍側不動簡文爲景所幽遣人請不害與居處景許之不害供侍益謹梁元帝立以不害爲中書郎兼廷尉卿魏平江陵失母所在時甚寒雪凍死者填滿溝壑不害行哭尋求聲不暫輟過見死人溝中卽投身捧視舉體凍僵水漿不入口者七日始得母屍憑屍而哭每輒氣絕行路皆爲流涕卽江陵權殯與王褒庾信俱入長安自是蔬食布衣枯槁骨立見者莫不哀之太建七年自周還陳除司農卿遷晉陵太守在郡感疾詔以光祿大夫徵還養疾後主卽位加給事中初不害之還也周留其長子僧首因居關中禎明三年陳亡僧首來迎不害道卒年八十五不害弟不佞

不佞字季卿少立名節居父喪以至孝稱好讀書尤長吏術梁承聖初爲武康令時兵荒饑饉百姓流移不佞循撫招集糴負至者以千數會魏剋江陵而母卒道路隔絕久不得奔赴四載之中晝夜號泣居處飲食常爲居喪之禮陳武帝受禪除婁令至是第四兄不齊始於江陵迎母喪柩歸葬不佞居處之節如始聞問若此者又三年身自負土手植松柏每歲時伏臘必三日不食文帝時兼尙書右丞遷東宮通事舍人及廢帝嗣立宣帝爲太傅錄尙書輔政甚爲朝望所歸不佞素以名節自立又受委東宮乃與僕射

到仲舉中書舍人劉師知尙書左丞王暹等謀矯詔出宣帝衆人猶豫未敢先發不佞乃馳詣相府面宣詔旨令相王暹第及事發仲舉等皆伏誅宣帝雅重不佞特赦之免其官而已及卽位以爲軍師始興王諮議參軍後兼尙書左丞加通直散騎常侍卒官不佞兄不疑不占不齊並早亡事第二寡嫂張氏甚謹所得祿奉不入私室長子梵童位尙書金部郎

司馬暹字文昇河內温人也高祖柔之晉侍中以南頓王孫紹齊文獻王攸後父子產卽梁武帝之外兄也位岳陽太守暹幼聰警有至性年十二丁內艱哀慕過禮水漿不入口殆經一旬每號慟必悶至絕父母喻之令進粥然猶毀瘠骨立服闋以姻戚子弟入問訊梁武帝見其羸疾歎息久之字其小字謂其父曰昨見羅兒面顏顛頓使人惻然便是不墜家風爲有子矣後累遷正員郎丁父艱哀毀愈甚廬于墓側日進薄麥粥一升墓在新林連接山阜舊多猛獸暹結廬數載豺狼絕迹常有兩鳩栖宿廬所馴狎異常承聖中除太子庶子魏尅江陵隨例入長安而梁宗屠戮太子殯瘞失所及周受禪暹以宮臣乃抗表求還江陵改葬辭甚酸切周朝優詔答之卽敕荊州以禮安厝陳太建八年自周還宣帝特降殊禮歷位通直散騎常侍太中大夫卒有集十卷子延義字希忠少沉敏好學初隨父入關丁母憂喪過于禮及暹還都延義乃躬負靈柩晝伏宵行冒履冰霜手足皸瘃至都遂致變廢數年乃愈位司徒從事中郎

張昭字德明吳郡吳人也幼有孝性父煥常患消渴嗜鮮魚昭乃身自結網捕魚以供朝夕弟乾字玄明聰敏好學亦有至性及父卒兄弟並不衣綿帛不食鹽酢日唯食一升麥屑粥每一感慟必致歐血隣里聞之皆爲涕泣父服未終母陸氏又卒兄弟遂六年哀毀形容骨立家貧未得大葬遂布衣蔬食十有餘年杜門不出屏絕人事時衡陽王伯信臨郡舉乾孝廉固辭不就兄弟並因毀成疾昭一眼失明乾亦中冷苦癘年並未五十終于家子胤俱絕宣帝時有太原王知玄者僑居會稽剡縣居家以孝聞及丁憂哀毀而卒帝嘉之詔改所居青苔里爲孝家里

論曰自漢風一起人倫毀薄蓋抑引之教導俗所先變里旌閭義存勸獎是以漢世士務修身故忠孝成俗至于乘軒服冕非此莫由晉宋以來風衰義缺刻身厲行事薄膏腴若使孝立閭庭忠被史策多發溝畎之中非出衣簪之下以此而言聲教不亦卿大夫之恥乎





南史卷七十四考證

吉玢傳冀延父命○監本缺冀字今增入

甄恬傳又有白鳩白雀栖宿其廬○一本無白鳩二字

褚脩傳脩少傳父業○梁書此下有兼通孝經論語善尺牘頗解文章數語

謝蘭傳且便投列馳歸○列一本作効

殷不害傳大同五年兼東宮通事舍人○監本缺事字今从閣本增正

南史卷七十四考證